

**EIGHTH LEGISLATIVE ASSEMBLY OF MIZORAM  
(SEVENTH SESSION)**

**LIST OF BUSINESS**

FOR NINTH SITTING ON TUESDAY, THE 9<sup>th</sup> MARCH, 2021  
(Time 10:30 A.M. to 1:00 P.M. and 2:00 P.M. to 4:00 P.M.)

**QUESTIONS**

1. **Questions** entered in separate list to be asked and oral answers given.

**ELECTION TO FINANCIAL COMMITTEE**

2. to elect a member of Public Accounts Committee.

**FINANCIAL BUSINESS**

***\*\* DISCUSSION AND VOTING ON DEMANDS***

3. **PU LALCHHANDAMA RALTE**, Minister to submit to the vote of the House various Demands under his charge.
4. **PU TAWNLUIA**, Deputy Chief Minister to submit to the vote of the House various Demands under his charge.

H. LALRINAWMA  
Commissioner & Secretary

....

---

\*\* Please see Bulletin Part-II Sl. No. 163 dated 1st March, 2021 for Demands to be moved by Ministers.

**SPEAKER** : *He Pathian hi kumkhaw tlaitluana kan Pathian a ni dawn si a, Thih thleng pawh a min hruaitu a ni ang.* *Sam 48:14*

Zawhna leh Chhanna-ah kan kal ang a, Starred Question No. 116 zawt turin member zahawmtak Pu Zothantluanga ka sawm e.

**PU ZOTHANTLUANGA** : Pu Speaker, ka lawm e. Ka zawhna, hon. Minister Sports & Youth Services chhan atan:

Mizoram Sports Person-te tana hamthatna Mizoram sawrkarin siam a nei em? Engah te nge hamthatna pek an nih? tih a ni e.

**SPEAKER** : Chhang turin Sports Minister zahawmtak, Pu Robert Romawia Royte ka sawm e.

**PU ROBERT ROMAWIA ROYTE, MINISTER:** Pu Speaker, Aizawl West-I bialtu MLA zahawmtak Pu Zothantluanga zawhna chhana chu:

Mizoram sawrkar hiam Sports Person-te hamthatna tur tamtak a siam sak thin a. Mizoram State Sports Council atangin infiam mi, Sports Person-te tan hetiang hian hamthatna a pe thin:

1. Infiam mi thei bikte tan 5% job reservation siam a ni.
2. Infiam mite hmasawn nan National emaw, International Coach thlengin a rawih sak thin.
3. Talent Identification and Development hnuaria naupang te'n awmze nei zawka an thiamna an chher theih nan regular coaching pek thin an ni.
4. Infiamna bungrua/hmanruate infiam mite hnenah Association emaw, Club kal tlangin emaw a thlawnin an pe thin.
5. Ram aiawh thei mite “Outstanding Sports Person” te pawisa fai, infiamna bungrua, food supplement leh an zinna senso thlengin a tul angin a tum sak thin.
6. Kan infiam mite'n eng emaw inhliam/tawh sual an tawhin a tul angin a enkawl thin a, an senso thlengin a tum sak thin.
7. Infiam mite'n awlsam zawka enkawlna a bik taka an dawn theih nan Sports Medical Section hnuaria Physiotherapy khawl nen inchhawpin an mamawh ang zelin enkawl an ni.
8. Regional, National leh International Level-a lawmman late pawisa fai ‘Incentive Cash Award’ pek thin an ni.
9. Infiam mite'n training tha zawk an dawn theih nan Academies eng emaw zat siam a ni.

Heng bakah hian Mizoram Sports Policy, 2019 hnuaria Sports Person-te tan heng hamthatna hrang hrangte hi siam a ni:-

1. Infrastructure Development;
2. Sports Stadium la neih lohna District a Stadium siam te;

3. Sports Academies/Training Centre tam zawk siam te;
4. School leh College-a infiamna hmunhma changlung zawka chei that;
5. Adventure, Water leh Motor Sports-te tihhmasawn; tin, Mizoram Para-gliding Rules, 2020 leh Mizoram Hiking Rules, 2020 te chu Mizoram Sawrkarin a pawm tawh bawk a ni.
6. Infiam mite an theihna mila enkawl leh anmahni enkawltu Coach-te pawh upgrade zel tura ruahmanna siam.
7. Infiam mite'n Sawrkar hna awlsam zawka an hmuh theihna tura Reservation siam te a ni.

Pu Speaker, helai a chhanna hmasa ber ‘Sports Council hnuai’ tih ang deuha lang hi tihsual palh a ni em aw ka ti a, a tawp 7-na a chhanna hian a rawn chhang fuh zawk awm e. Ka lawm e.

**SPEAKER** : Zawhbelhna zawt turin Member zahawmtak Pu Zothantluanga, a zawhna neitu ka sawm e.

**PU ZOTHANTLUANGA** : Pu Speaker, Sports Department hian hma a la tha hlein a hriat a. Hmanni lawkah Professional Boxing Championship Mizoram-ah kan thleng a, kan thalaite 5 laiin an tumpui te hnehin, Professional Boxing-a lut thei thalai kan nei te hi a ropui ka ti a.

Tichuan, Professional Boxing chungchang hi min hrilhfiah thei em tih kha ka zawhbelhna point pakhat ni sela. Tin, MLA-te, Minister-te leh bialtu ten khatiang hnehma ropui tak an chan avangin an bial mite in han tanpui a ni tih te kan hria a, heng chungchangah hian sawfiah tur a awm em? Sawrkarin a ti nge nia Finance lam atanga buaipui tih kha. Tin, kan inlawmpui dan chungchang hi sawfiah a thain ka hria a, chu chu ka han zawhbelh bawk a.

Tin, niminah khan Sairang, ka bial Dintha Veng-ah MFA Football Stadium ropui tak mai hawn a ni a. Kan Sports Minister-in inauguration a hmang nghe nghe a ni a. Khu khu a veng mipui ten Sports lama hma kan sawn theihna atan leh, India rama awm kan ni a, National Games kan tih tam bera hi vai ram khawpui lianah te, hmun lum tak taka kan zuk inkhelh thin avang hian Zoram boruak nuam tak hnuia kan fit hi khutah kan zuk fit lo leh thin a. Chuvangchuan, he thil hi a tha hlein ka hria a, tun hmaa ka lo ngaihtuah thin Mizo thalaite fit takin Mizoram atangin competition hrang hrangah an kal thin a. Amaherawhchu, fitness vangin a tawpah kan Champion zo lo fo mai a, khu ti lai hmun Mizoram-ah pawh khawlum ber pawl boruak India ram hmun dang nen pawha inang tura ngaihna hmuna khutiang kan han nei khu a lawmawm ka ti a. Tin, sawrkar hmasa NEDP atanga bul tan a ni a, amaherawhchu a tawpna lamah erawh chuan, kan Sports Minister chak tak Pu Robert Romawia Department atangin a final-na tur te, hawn theiha a lo awmna tur atan te nuai 30 lai mai sawrkar hmasa thil tih te chhunzawma a lo awm hi ropui ka ti a ni.

Tichuan, ka han zawh leh duha chu, Football phul lem phah hi kan nei ve nual tawh a, kan phah mek bawk a, phahna tur te pawh kan la nei zel a. Chutihlai chuan kan weight pui, keimahni aia rit emaw kan hnekna ni lo tur ang chi, kan va combat tur kan weight pui ang chia hma kan sawn theihna turin, hei, boxing-ah pawh kan hmu zo chiah a, khatiang Indoor Stadium ang chi kha khulai hmuna vek khuan siam belh ni se a va tha em! Chutiang siam chu a la tih theih zel ang em tih kha ka zawt belh ni sela. Tin, helai Aizawl atanga hmun hla deuh hlek a nih avangin tuna kan sawrkara Chief Minister kaihhruaina hnuaih hian a bulah khuan Hostel infiam mite chen nghalna, an riah nghalna tur, ei leh in, engkim an tih theihna hmun tur buatsaiah mek a ni a, nuaih 350 man project kal lai a awm a. Khulai hmunah bawk khuan boruak thatak hnuaih boxing kan tih te, judo kan tih ang te hi buatsaiah leh theih a ni em tih kha ka zawhbelh a ni e. Ka lawm e.

**SPEAKER** : Zawhbelhna zawt turin member zahawmtak Dr. K. Pachhunga ka sawm leh e.

**DR. K. PACHHUNGA** : Pu Speaker, ka lawm e. Hon. Minister, Sports & Youth Services Department chhan atana ka zawhbelh chu:

Sorkar hmasa kum sawm chhung khan Sports Department hian Mizoram budget pawn atangin sum engzat nge a hmuh tih leh, tun kum hnih chhung lek hian Sports Department hian sum a hmuh leh approval a tlangpui min hrilh thei em tih kha ka zawhna a ni a. Ka zawhna pangngai a chhuak hman dawn lo va, chu chu a tlangpui min hrilh theih chuan ka lawm hle ang.

**SPEAKER** : Zawhbelhna zawt turin Member zahawm tak Pu C. Lalsawivunga ka sawm e.

**PU C. LALSAWIVUNGA** : Pu Speaker, ka lawm e. Ka zawh belhna chu -

- i) Sports lama thei bik te tana 5% sawrkar hna reservation dah a ni tih kan hria a, 2019-2021 chhung hian hemi reservation kal tlang hian mi engzah nge sawrkar-ah hna pek a awm tawh?
- ii) State Games-ah khan gold medalist, infiamna lam a thei chungchuang, sawrkar hna thawk mekte pawh an awm a, khang mite kha he 5% reservation kal tlang hian promotion pek an awm em? An awm anih chuan tute nge?
- ii) Republic Vengthlang, Hawla Indoor Stadium-ah Ni 7, February, 2021-ah khan Aizawl Indoor Stadium sakna tur Dy. Chief Minister zahawm takin lungphum a phum kha pawisa pawh awmsa vek tawh tih a ni a, engtikah nge hna tan anih ang?

Tin, LPS Boxing tunlaiah kan hria a, Chanchinhar-ah te an rawn puang a, “Mizo boxer-te an lo chak anih chuan an awmna hmun MLA biala mi ten cheng nuai khat an pe ang” tih Sports Minister-in a puang a, hei hi eng behchhana puang nge tih kha ka zawh belhna a ni e.

**SPEAKER :** Aw le, zawnate a karkik hlawm khawp mai a, a theih ang anga chhang turin Sports Minister zahawm tak, Pu Robert Romawia Royte ka sawm e.

**PU ROBERT ROMAWIA ROYTE, MINISTER:** Pu Speaker, ka lawm e. A zawnha neitu, Aizawl West-I bialtu MLA zahawm tak Pu Zothantluanga zagh belhna Professional Boxing chungchang kha sawi belh tur tam tak a awm a. Professional Boxing leh Amateur Boxing a awm tih chu kan hre vek ang a, Professional Boxing-ah chuan Gold Medal emaw, Silver Medal emaw te khatianga inchuh zawng ni lova company lian promoters ten sum te thapa pa deuh taka inbeihna a ni a, judge an ruat dan phung te, medical support an inpek dan phung te, life insurance system te pawh a dang khawp mai a. Chutiang zawng chuan Boxing hi Mizo ten kan la luh chilh thui lo a, tun hnaiah kan han hre chho ve a ni a, Olympic pawh a ropui tho rual hian kan hriat angin khawvel boxer lar chu professional lamah kal te an ni a, he laiah hian Mizote pawh hian kan tih chi a ni ang a tiin Boxing lam tui miten hetiang lama hma an la hi a lawmawm khawpin ka hria.

Tun hnaia development lawmawm deuh ka sawi duh erawh chu tawngkam maia ka hriat a ni a, thudik niin a lang a. India ram pawh hian foreign ramte tih ang hian Professional Boxer ten Asian Games te, Olympic Games te, Common Wealth Games ang chia medal hlawh zawnga an chet vena ang chi hi kan inphalsak a, hetiang zawnga kan chet ve hi a hun tawh a ni tih hi tunlai hian argument chak tak a awm mek a, kei pawh chu chu ka support zawng tak a ni a. Central sawrkar lama kan hotute pawh ka sawipui tawh a, mumal zawka Minister dangte nen tan tlana India aiawha thawkchhuak chu, Olympic a ni emaw, Asian Games-ah a ni emaw a tha berte khan India aiawh mai rawh se. Professional line-a lo awm thin te, Amateur Association lama lo awm thin te pawhin lo phalsak se la, AIBA lam te pawhin lo phalsak se la, professional line-a an awm avanga medal chuh zawnga an kal thei lo ang chi, helaia kan lo indang thin ang chi hi a fuh lo e tih ngaihdan chaktak a awm tawh a, example tam tak hi a lo awm a. Khawvel hmun tam takah hian Professional Boxing khel mek chunga an ram aiawhin Olympic-ah te khela, khatiang zawnga insiam rem theih dan te hi a awm e an ti a, chu chuan professional line lama kal a ti phurawmin ka hria a. A ziak chiang fek fawk chhiar lo mah ila nizan hmasa lawka IBC President-in ka hnen ngeia a sawi te a ni a, chutiang zawnga thil a kal anih phei chuan Professional line-ah chuan an lo bei nasa a, an training te pawh a lo tha a, a hratkhawkheng ho kalna line tura ngaih a ni a. Khangho kha Mizoram aiawh tea kan hman zel theih bawka National Games leh International Events hrang hranga kan hman theih chuan, kan ram tan hian a tha dawn mang e aw tih kha rilruah a awm a. Chutiang zawnga nawr ngai ngai nawr tur chuan Sports Minister ka nihna ang pawhin tan lak ve ka tum a ni tih kha ka sawi duh a.

Tin, Professional Boxing hi World Boxing Council (WBC) an ti a, tuna Aizawl-a LPS Fight Night, Grass Root Boxing Promotion and Management leh LPS ten a an host ang hi World Boxing Council-in permission a rawn pek thlap a ni a, chumi hnuah chuan Ministry of Youth Affairs & Sports te, Home Ministry te, Defence Ministry te phalna lak a ngai a, sawrkar pawh kan chet viau a ngai a, chutianga tan lain he Professional Boxing hi India rama

thleng a ni a. Mizoram-in kan thleng kan han ti bawk tak naa, India, IBC-in a thleng a nihna lai te pawh a awm a ni tih kha ka sawi tel duh a ni.

2019 kuma Sports Department-a mawhpfurhna ka lak hlim khan Professional Boxing Mizoram-a khelh anih theih dan tur leh World Boxing Council-in a pawm theih chin kan tlin theih dan turte ka ngaihtuah ve a, NE Live TV te hi ka sawm a, Pu Himanta Biswas Sharma pawh hi ka bia a, whatsapp te pawhin kan inbia a, a naute an lo phur bawk a, a nupui ta niin an sawi a, he TV hi. Chutiang chuan kan phur chho viau dawn emaw tih laiin thil a kal zel hlei thei lova, chuvang chuan LPS an lo zuang chhuak a, World Boxing Council phalna hial an han sual chhuak a, sawrkar te nen a theih ang anga tang hoa hetiang kan han buatsaih hi a lawmawm a ni. A vawikhatna, a bul tanna a ni a, tunah hian Lalrinsanga Tlau in title a thutbet ran tawh a, a hreng tlat tawh a, a rawn chotu hian pawisa engzah in nge an rawn cho dawn? engzah nge a inchhiar dawn tih kha chu an promoters te nen an rel tawh ang a, chutiang chuan a hmalam hun hi a eng viauin ka hria a, kum 21 chauh ala ni a Lalrinsanga Tlau hi, kum 24 thleng a title hi a humhim thei a, kum 24 thleng hi Youth Category an ti a, kum 24 thleng chance a neih chhung hian Youth sector-ah a title hi a hum tluan dawn nge kan hre lo a, hum tluan ngai lovin Senior level-ah hian a kumin ala tlin hma hian a zuang lut mai thei bawk a, chutiang ang chance tha tak chu Lalrinsanga Tlau hian a nei a, boxer dangte pawh hian an nei tho a ni. Tin, Mizo Boxer paruk professional line-ah an inziak lut tawh a, nizan hmasa lawk khan NT Lalbiakkima, kan boxer chhuanvawr hi promoter dang hnuia awm anih avangin a khelh ve dan tur kha kan ngaihtuah viau a, mahse promoters dang an nih avangin a tih hleih theih loh a, a khel ve ta lo a. Ani chuan record te pawh a lo nei tawh a, vawi khat a chak tawh a ni tih kan hriat kha. Chutiang chuan Professional Boxer paruk (6) Mizo-in kan nei mek a, tuna a landanah chuan World Boxing Council atanga lo kal ho te leh IBC President Brig. Raja ngei pawh a rawn tel a, khang ho ngaihtuahnaah chuan Mizoram-ah hian category dang emaw, tun ang category ang chi emaw hi world event ang hiala professional boxing event hi tih chhoha, LPS lam pawhin partner lian zawk pawh an hmuh chhoh theih te pawh a rinawm a, media kher lovah pawh partner dangte pawh, chutiang chuan kawl a eng viauin ka hria. Zawhna a awm takah chuan kan boxer chhuanawm tak takte leh anmahnir zirtirtu Boxing Academy-a coaching staff-te vawiinah hian sawrkar ang pawhin kan lawmpui a ni tih sawina remchangah ka han hmang ang e.

Tin, zawhna pahnihna-ah khan MLA leh Minister thenkhat khan an biala Professional Boxing-a chakna changte kha cheng nuai khat an pe dawn a ni tih kha puan a awm a, kha kha engnge a awmzia tih kha, nimin lamah khan kan Speaker phalnain Sairang-ah programme kan hman avangin chawhnu lam ka awm lova, member zahawm tak takte lam atangin zawnate a awm niin ka hria a, khami zana cheng nuai khat bialtu MLA ten an pe ang kan tih dan kha, bialtu MLA ten kan pe ang kan ti tawp lo a, fimkhur deuh maiin puang ka ni a kha kha, kan Deputy Chief Minister nen a biala mi kha a chak hmasa lamah a rawn tang bawk a, kan phur deuh nge ni, kan inbia a, a hmunah Pu Ramthanmawia teho an awm sa bawk a, khalaiah khan MNF lam party khata awm ta chu a concerned MLA ti mai

ang, hnehna changtu nei MLA ho kha an inrawn a, tahchuan a inang tlang deuha tih te pawh hi a tha ang a, inang lo zeng zung chu a chi loh ang tiin, cheng nuai khat theuh pek dan i ngaihtuah ang u hmiang an ti a, kha kha phur takin ka rawn puang mai a ni kei kha chuan. Engatinge South-II bial lam te pawh kan awm ve si a tih te kha, a aia tam pawh kha a pek theih bialtu MLA-in, pek reng theih a ni tihte kha ka sawi duh a. (**Pu C. LALSAWIVUNGA:** *Pu Speaker, khawngaihin, tuna insawimam ngawt kha a ni ber lova, LPS Chanchinthar-ah chuan khatiang khan a puang miah lo.*) Ka thusawi zawk kha a official zawk ang, a record-in a la awm vek a, ka tawng ang ang khan fimkhurna avangin kan dah thlap a ni. Chuvangin insawithiamna lam pawh a ni lova. Pu Zothantluanga, Aizawl West-I bialtu zahawm takin sawifiah turin min ngen a, nimin lamah sawite a awm a, nimin lam kha chu ka awm ve lo a, khalam kha chu sawi theih a ni lova...(*interruption*).. Anih chuan a that chu, i fiah phah turah ngai ila. Tichuan, hei hi official-a party-ina sawi khawm pawh kha a awm lova, sawrkar anga sawi khawm pawh a awm lova, bialtu MLA tan chuan khatianga chakna an chang kha han lawmpui ve kha a awm a, thildanga an chak pawhin kan lo lawmpui fo tawh thin a. Bialtu MLA ten khatianga tan an han la kha a hminga Sports Minister nihna ang pawhin a lawmawm tak zet a, an chungah pawh lawmthu ka sawi duh a.

Tin, sporting fraternity, infiammite lawm dan hi a soin a so bulh bulh tih tur a ni a, chuvangin, nimina zawhna awm pawh kha an khel nasa khawp mai; an lawm ve lo em ni, chuti khati tih te pawh social media leh chi hrang hrangah a awm. Kha kha MLA ten an vaia rawn kala platform atanga puan an tan a remchang lova, ka puan sak ve mai a ni.

**PU LALCHHUANTHANGA :** Pu Speaker, ka lo ding ve lawk ang e. Nimina ka sawi ang khan Title Fight Night-a chakte, a awmna bial MLA ten cheng nuai khat an pe ang tih a ni a.....

**PU ROBERT ROMAWIA ROYTE, MINISTER :** Chutiang chuan ka puang lo, an hming ka sawi a, chu chuan chuti zat a pe ang tiin; a sensitive tih ka hria a, opposition bialte a tel tih pawh ka hria, chuvang chuan fimkhur takin ka puang a, ka duh dan thlapin ka puang chhuak a ni. LPS-in engtin nge a puan chhuah a, ZONET-in engtin nge a puan chhuah a, Vanglaini-in engtin nge a ziah tih lam kha chu ka hre zui lo kei chuan. Ka puan chhuahna-ah kha chuan, Pu Speaker.....

**PU LALRINSANGA RALTE:** Pu Speaker, South-II MLA zahawm tak khan hming that ve a duh chuan a fund atang pawhin a pe thei a, mimal sum pawhin a pe thei a, helaia a lo pe te thik zawnga tawng lo khan a duh chuan a pe ve thei mai a lawm maw le.

**PU ROBERT ROMAWIA ROYTE, MINISTER:** A lawmawm e. Khalaia an lo puan dan si se kha chu kei chuan ka lo en tawh lova, hriat pawh ka lo hre lova, mahse, ‘MLA ten an pe ang’ ka ti lova, a petu tur hming leh a amount nen khan, a constituency leh a khua nen ka puang zat zat a ni, confusion leh engemaw awm thei a ni tih kha ka hriat avangin. Ka puan dan kha a record kha in lo en leh theih chuan a fel viau a nia.

Tichuan, pathumna Sairang Dinhar-ah Football Ground tha tak FIFA tanpuinain leh Mizoram sawrkar, a hmasa leh tun sawrkar pawhin a theih angin kan han tang ve bawk a, kan la tang zel turah te pawh ngai ila. ‘Din a ni a, hawn a ni ta a, a lawmawm a,’ a rawn ti a, Pu Zothantluanga MLA zahawm tak, a zaghna neitu khan. A bulah khuan contact sports lampang weight category/weight system-a inelna chi hi tih ve tumna a awm em, tih ve a tha lawm ni tih kha ngaiantuahna ka lo la hmang miah lova. Frank deuhin sawi mai ila, rawtna emaw eng emaw pawh kan la nei miah lo, khulaia indoor stadium eng emaw din turin, a hmun pawh hi a awm em tih te pawh ngaiantuah a ngai ang a, khawlum hmuna hetiang neih erawh hi chu a tha tih chu kan hria a ni. Tin, hostel kha an rawn sawi ri a, Dr. K. Beichhua hmalaknain khulai MFA football ground sirah khuan, nakina training leh eng emaw atana tangkai em em tur hostel building tha tak mai sak mup mup a ni a, khu khu Sports Department ang pawhin a changtu Minister min rawn ruahman saktu Minister leh kan Chief Minister chungah pawh ka lawm hle a, MFA leh DFA lam pawh an lawm hle a ni tih kha an aiawh pawhin ka han sawi ang e.

Tin, Dr. K. Pachhunga zaghna, budget pawn lam atanga kum sawm chhunga sum hmuh tih kha a figure hi ka nei mai lo a, ka han sawi mai thei lova, Assembly zaghna kha a awm thoin ka hria a, chhuah pawh a la chhuak mai thei a, hun a la awm a, min hrethiam sela, ka sawi chiah thei lo e tih kha ka chhanna ni mai sela.

Tin, kum hnii chhunga budget approval, state pawnlam atanga approval tih hi, hei pawh hi a figure ka sawi sual ang tih ka hlau a, schemes hrang hrang a awm a, Sports department bik chauh kha i zawl si a, Sports department ni lem lo pawh hian sports atan hian sum hmu an awm nual a, hma an la a, kan lawm em em a, kan thawkho tha em em a. Sports Department bika sanction approval kan neih hi ka hriatsual loh chuan a vel ka han sawi ang a, cheng nuai 44,000 leh tih vel a ni. Chu chuan sports & youth affairs leh youth sector development chi hrang hrangte pawh a huam a, ‘sports’ kan han ti ngawt thin a, sports-ah hian youth development te a tel a, skill development te a tel a, thil hrang hrang a tel tih erawh chu kan hriat a pawimawh awm e. Kha kha ka chhan theih ni mai se, nakinah zaghna pangngai chhanna kan la sem turah ngai ila.

Tin, Pu C. Lalsawivunga, Aizawl South-I bialtu zahawm tak zaghna kha a pawimawh khawp mai a. 5% sports person te quota atangin mi eng zat nge lut tawh tih hi ka sawi mai thei lova, a chhan chu recommendation la hi department lam atangin an awm nual niin a lang a, eligible, 5% dil thei chin kha an awm a. Tin, kan hriat angin, he Dan Chief Minister zahawm tak Pu Zoramthanga kaihhruiaina hnuai sports person te, a thei bikte, international leh national, state games gold medalist ang chite duhsakna dan, qualified rau rau chhunga a hranpaa duhsakna dan kan siam hi infiammite leh an chhungkhat laina leh thalaite an lawm hle a, hei hi kan siam hnu hian hna lak hi a awm ta meuh lo a, austerity measures Covid hripui avangin hna lak bandh vek a ni a, direct recruitment kha a ngai si a, contract leh engemaw phuahchawpa han lak mai maiah khan he dan hi a applicable lo bawk a ni. He dan hi Group B/C/D direct recruitment atana qualification-ah pawh qualified ve

thlap tho, mahse a nawlpuiin an chuh loh sports person bik chuh tur 5% kha a awm a. Hei hi chu kan la chhawr tangkai zel ka ring a, chhawr tangkai tur pawh hian a dil pha hi tunah hian an rawn chhuak tam tulh tulh ve a ni, Covid hripui karah pawh. Tin, hemi chungchangah hian DP&AR Minister zahawm tak kan Dy. CM Pu Tawnluia leh a department chungah pawh hian lawmthu ka sawi a. Tunhma atanga hei hi sports person tena an demand ve thin, an lo tih ngar ngar thin kha a ni a, kei pawh a demand tute zingah ka tel ve tawh thin a, harsa tak mai, ‘*a very hard decision*’ kan hotute’n an siam a, hetiang Dan a rawn chhuak hi a lawmawm viau a ni.

Tin, State Games-a gold medalist-te leh staff leh sawrkar hnathawk *out of turn promotion* pawh kha Dan khan a keng tel a, sawrkar hnathawk mekte pawh an turn a thlen hmaa promote dan te kha fel deuh maiin DP&AR lamin an rawn siamchhuak a, khatiang kha an awm tawh em tih pawh hi ka chiang chiah lova, ka lo inring chiah lo bawk a, chu chu ka chhan theih ni sela. Assembly zawhna bawk kha a awmin ka hria a hemi chungchangah hian, nakinah a rawn chhuak emaw, chhuak lo emaw engpawh nise an sem leh vek thoin ka ring a, chiangkuang zawkin a awm ang.

Tin, Republic Vengthlang Indoor Stadium sak engtikah nge bultan anih ang tih lai kha, ka sawi ang khan kan Dy. CM zahawm takin *Khelo India Scheme* hnuai atangin administrative approval engkim kan hmuh angin a hawng a, mahse hei hi centre sector ccheme a ni a, Mizoram State Sport Council hi Khelo India Scheme implementing agency-ah an rawn ruat mai kha kan ni a, contractor-te leh kan final design-te Sport Ministry-ah approval kan dil mek a, hmu mai turah kan inngai a, chu chu formality chi khat kha a ni ve a, a rawn chhuah chuan bul kan tan mai ang tih kha ka han sawi duh a. A hawn ni pawh khan kan sawifiah a, nuai 450 chauh min sanction rih a, anni pawhin, working design te han siam ula in mamawh belh dan a zirin kan pek belh ang che u ti sa kha an ni a, kan siam a, nuai 800 tling lo hretin. Keimah ngei pawhin ka zuk umzui a, Union Secretary chuan, “in tih zat hi admissible amount chhunga mi ala ni bawk a, hmu turah khan inngai la” tiin min hrilh thlap a, chutiang hmu turah chuan kan inngai ve a ni.

Tin, cheng nuai khat tih lai bawr kha chu sawifiah ngai tawh lo turah ngai ila a tha awm e.

**SPEAKER** : Ngawi rawh aw, i din lai khan. ‘Cheng nuai khat’ tih kha chu ka hre ve lova, ka biala mi Sangtea kha chu keiman, “hetianga Mizo thalaite a tha zawnga hruaitu leh, tuilet hnuia la awm ngai lo champion a ni” tiin keima thua cheng *nuai khat, singnga* kha pe ka ni. Pu Robert-a nen kan inrawn lo reng reng.

**PU ROBERT ROMAWIA ROYTE, MINISTER:** Ka lo sawi theihnghilh a, kan Speaker zahawm tak pawh hi kan phone a, khami zan khan, (**SPEAKER:** *Ka la lo a.*) a la lo tlat mai a, a entui lutuk a nih ka ring a. Tin, a biala mi kha a chak ve kha a ring lo nge ni, ka hre lo a, a khirh em a, Rinsanga hmabak kha, phone a la lo a kan hre hlei thei lova. Tin,

a champion takah chuan eng emaw kha chu atih kha ka han ring sa a. Nimin khan Youth Commission Chairman zahawm tak Pu Tanpuia nen kan va telpui nghe nghe a, cheng *muai khat, singnga* kan Speaker zahawm tak hian Lalrinsanga Tlau kha a hlan nghe nghe a, a lawmawm viau a ni. Pu Spekaer, ka lawm e.

**SPEAKER :** Starred Question No. 117-ah kan kal ang a, a zaws turin Member zahawm tak Pu Lalrindika Ralte ka sawm e.

**PU LALRINDIKA RALTE :** Pu Speaker, ka lawm e. Social Welfare department changtu Minister zahawm tak chhan atan ka zawnha chu:

Kum 2019 January thla atanga Jordan Centre, Sethawn tichangtlunna atana hnathawh dan-

- i) Contractor-te hming leh an hnathawh project work hming?
- ii) Hnathawhna atana sum sanction zat kimchang?
- iii) Engtik huna zawh tur nge? tih a ni e. Ka lawm e.

**SPEAKER :** A chhang turin a changtu Minister zahawm tak Dr. K. Beichhua ilo sawm ang.

**DR. K. BEICHHUA, MINISTER:** Pu Speaker, ka lawm e. Member zahawm tak Pu Lalrindika Ralte zawnha chhanna chu –

Jordan Centre, Sethawn tichangtlunna atana hnathawn dan chu:

- i) Contractor hming leh project hming –

Sl. No.	Name of agency	Project
1	Oriental Consultancy Services	Civil works for Upgradation/Renovation of Jordan Centre
2	Eldorado Agency	Procurement of materials
3	David's Agency	Procurement of materials
4	Ramngaihawma	Procurement of materials
5	Akai Electronics	Procurement of materials

- ii) Jordan Centre, Sethawn upgradation/renovation hnathawh nan hian ₹ 920.72 lakhs chu sanction a ni.
- iii) Jordan Centre, Sethawn hi Financial Year, 2020-2021 chhunga zawh fel tum a ni. Kumin a nih chu, Pu Speaker.

**SPEAKER :** Zawhbelhna zawt turin zawnha neitu Member zahawm Pu Lalrindika Ralte, chumi zawah Pu Zodintluanga Ralte, chumi zawah Pu Lalrinsanga Ralte; ‘Ralte’ vekin an zawt anih chu.

**PU LALRINDIKA RALTE :** Pu Speaker, ka lawm e. Khulai Sethawn khu hun hmasa lam khan Chief Minister zahawm tak hian ruihhlo ngaite enkawlna ‘world class’ tih kha a sawi thin a, duhthusam a pha chiah lo anih pawhin, tuna hmalak meknaah hian kan

Minister zahawmtak hian a changtu minister anihna angin lawmawm thawkhatah a ngai em tih ka zawt duh a. Tin, khulai RITC for Tribal Youth-a Superintendent khu seniority hmang loa a thar dah a ni em tih ka zawt e.

**SPEAKER :** Zawhbelhna zawt turin Member zahawm tak Pu Zodintluanga Ralte ka sawm e.

**PU ZODINTLUANGA RALTE:** Pu Speaker, ka lawm e. Kum 2019 khan Champhai North Constituency-a Anganwadi Centre 14 repair-na tur cheng nuai 2 theuh sanction a ni a. Chutah chuan contractor-te repair tirin cheng nuai 1 leh sing 5 in hna an thawh tir vek a, nuai 7 la bang kha a bo ta dailh mai a. Ni 29.9.2019 khan ‘MNF Block Champhai North’ tih ringawt a ni a, Treasurer Lalhmangaiha hmingin pawisa hi lakchhuah a ni a, kan Minister zahawm tak hian he pawisa contractor-te hnena lut si lo, lakchhuah ni si hi, a latute hi zawng chhuakin, hrem ngai an nih chuan a hrem thei ang em tih ka zawt e.

**SPEAKER :** Zawhbelhna zawt turin Member zahawm tak Pu Lalrinsanga Ralte ka sawm e.

**PU LALRINSANGA RALTE:** Pu Speaker, ka lawm e. Serchhip Bial by-election lo awm tura party pakhat candidate, hmanni Thenzawl-a a thu a sawinaah, “tar pension sawrkarin a cut sak a ni” tia sawi a awm a, News leh eng emaw-ah te kan hmu nual mai a. Chumi chungchanga ka zawhna, Tar pension kum 80 chunglam tena an dawn tur atang hian cheng 200 cut sak hi a awm reng em tih leh, kum 60 chunglam chin tena pension an lak turah cheng 100 cut sak a awm reng em tih hi hi Social Welfare changtu Minister zahawm tak hian min chhang se ka lawm ngawt ang.

**SPEAKER :** Aw le, a theih ang ang a chhang turin Minister zahawm tak Dr. K. Beichhua ka sawm e.

**DR. K. BEICHHUA, MINISTER:** Pu Speaker, ka lawm e. Member zahawm tak Pu Lalrindika Ralte zawhna, tuna hmalaknaah hian lawmawm thawkhatin i hria em a rawn ti a, Pu Speaker, a lawmawm hlein ka hria a.

Kan Chief Minister zahawm tak hianin ruihhlo ngaite a vei viau mai a, chutiang chuan 2019-ah khan engtin nge hmalak dan tur hi tiin kan rel a, ama hovin. De-addition centre tha tawk kan neih loh chuan State hian tunah chuan accreditation rules te kan lo nei tawh a, chung avang chuan awmze nei deuha de-addition centre hi kan neih loh chuan a dik lo ang e, kan thalaite ruihhloa nasa taka talbuai te an awm si a tiin heng hmalakna tur hi kan Chief Minister zahawm tak thahnemngaihna azarah kan nei thei a. Tuna kan hmalakna khu a lawmawm ka ti a, building tam tak renovate ngai, staff quarters ringawt pawh 10, dormitory hluihlawn deuh ti tih tawh 22, kitchen 2, bathroom toilet 2, biakin pahnih 2, dining hall 1, badminton hall 1, guess room cum hall 1, duty post 7 te kan renovate a ni. Fencing

khu thui tak a ni a, avaiin kan siamtha vek a, chumi piah lamah internal road leh steps zawng zawng khu siamthat vek a ni bawk a.

Tin, Agriculture Department hian an ram khulaia Thingdawl ami min pe bawk a, Land preparation te tiin chutiang chuan hma kan han la chho a, a lawmawm em avangin Central lama Ministry of Social Justice & Empowerment lamah kan zuk zualko a, project siamin kan zuk um ta a, an niin, “a pawimaawh a lawm, project lo siam ula kan lo pe ang che u” an ti a, 15 crore project kan siam a, tunah hian nuai 773.16 lai min rawn sanction sak tawh a ni.

Chutiang chuanin tuna kan hmalakna chinah khuan lawmawm kan ti a, han zo thei ta ila chuanin Mizoram thalaite tan hian a va han tangkai dawn em tih hi kan hmuh dan a ni. Pathianin rem a tia kan tum anga a kal chuan, tun budget session zawh hian hawn theih ngei pawh kan inbeisei a ni.

Tin, RITC khu, Ni e, seniority leh seniority lo tih engmah ziak a awm lem lova, addict hote enkawl tur chuan mithiam deuh bik, experience nei tha leh expert an nih te pawh a ngai a. Chutiang chuan a remchan dan angin khulai posting khu rem kan ruat mai a, tun dinhmunah phei hi chuan tuna kan dah khua *senior most* a ni mai lawm ni kan ti a ni. Chutianga kal chu kan ni tih kha Pu Lalrindika Ralte zawhna ka rawn chhanna ni ta sela, Pu Speaker.

Tin, Member zahawm tak Pu Zodintluanga zawhna, Champhai District Anganwadi building repair-na atan nuai hniih theuh pek chungchang hi ka lo la hre miah lova. Hei hi kan lo zawngchhuak ang a, atul dan azirin hma kan lo la dawn nia tih kha ka chhanna ni se.

Tin, Pu Lalrinsanga Ralte zawhna, Tar pension sawrkari kum 80 chunglam 3,000/- ah cheng 200/- a cut sak a ni tih leh, kum 60 chunglama mite dawn tur 1,500/- cheng 100/- a cut sak tih hi, kan unau Congress candidate-in Thenzawl-a a thusawi Ni 6 ami kha niin ka hria a. Hei hi thil diklo a ni a, thil dik chu hetiang hi a ni -

‘Old age pension’ kan tih hi Ministry of Rural Development, Govt. of India atanga kan dawn a ni a. National Social Assistant Programme hnuaiah hianin National Old Age Pension te, National Widow Pension te, National Ddisable Pension te a awm a. Kum 60 atanga kum 79 leh kum 80 chin chunglam te tan Indira Gandhi Old Age Pension Scheme-ah hian Ministry of Rural Development atanga min rawn pek ang hi central share kan tih a ni ta a, he scheme hnuaiah hian sawrkar laipui ina a pek piah lamah state sawrkar pawhin pek chin a nei ve a ni. Kum 2019-ah khan tun Ministry tharah hi chuan State-in a pek letin cabinet-in a tipung a, state share hi. Kum 60 atanga kum 67 inkara central share hi cheng 200 a ni. Tunhma chuan state-in cheng 50/- alo contribute a, tun sawrkar tharah hi chuan cheng 100/- a contribute a, avaiin cheng 300/- thlakhatah a ni. Kum 80 chunglam hi cheng 500/- central share ania state share hi 50 ni thin kha tunah chuan 50-in kan tipung a, cheng

600/- an dawng bawk a, Ministry of Rural Development, Govt. of India atanga sum hmuu ang zelin semchhuah thin a ni. Chu sum chu tumkhatah thlaruk atan te, thla li atan te release thin a ni a, an rawn release ang ang chu pekchhuah thin a ni. Tun dinhmunah central share hi Serchhip bikah July 2020 tleng sem tawh niin, state share hi September 2020 tleng sem tawh a ni. Central share hi August 2020 atanga October 2020 tleng sem theih mai tura peih a ni tep tawh a ni. Tun atanga reiloteah sem leh theih mai ani dawn tih Pu Speaker ka sawi duh a ni. December 2020 tleng pek theih nan sanction tura buatsaih mek, nawr mek a ni bawk.

Chumi piah lamah chuan Pradhan Mantri Kalyan Yajona kan ti a, hemi hnuaih hian Covid-19 hrilenga chhawmdawlha atan central sawrkarin old age pension dawngtute hnena cheng 1,000/- theuh a pe bawk a, chung chu pek vek an ni. Old age pension sheme hnuaih pension dawngtu tur ten an dawn tur Ministry leh State sorkar ina atih zat hi vawikhatmah lak then sak a ni ngai lova, a kim thlapa pek zel an ni e tih hi Pu Speaker, ka chhanna a ni e.

**PU K.T. ROKHAW :** Pu Speaker, khawngaihin. Tipa EMRS building hi sak zawh vek a ni tawh em? Sak zawh nilo se, engnge a chhan? Engtik kuma sak tan nge ni a engzah nge estimate amoun? Tunge a contractor min hrilh thei em?

**SPEAKER :** Thil serious deuh; i chhanna kha a thui lutuk a, Thenzawl-a party pakhat president-in tar chawmna an cut sak atih kha, in cut sak em ni? Khalai kha a va fiah lo deuh ve.

**DR. K. BEICHHUA, MINISTER :** Kan cut sak lo e, Pu Speaker.

**SPEAKER :** Chulai te chu chiang deuhin aw. I pehhel thui lutuk a ka lo buai hman deuh alawm le.

**DR. K. BEICHHUA, MINISTER :** Pu Speaker, Tipa EMRS hi Ni 18.10.2016-a work order pek a ni a, thla 36 chhunga complete tura tih a ni. Chumi awmzia chu Ni 18.10.2019-a zawh tur tihna a ni. Chumi rual chuan Pu Speaker, kan hriat angin Lawngtlai, Chawngte leh Tipa te hi kilkhawr taka awm kan nih avangin hnathawktu te tan hian thil harsa communication-ah te a awm thin a, fur ah te phei chuan a bik takin Tipa leh Chawngte phei chu kawng a chhe leh zual a. Chungte avang chuan a hun takah an zo thei lo a, nikum lamah khan extension period kan inpe a, kan hriat angin nikum kha chu Covid-19 hrileng avangin awm lo ang tluk a ni a. Chung avang chuan kumin 2021-2022-ah hi chuan zo thei ngei tura beisei an ni. La zo chiah lo mahse, session kan tan tawh a, Tipa tan naupang 90, Lawngtlai tan naupang 90, Chawngte tan naupang 90 leh Ngopa ah 180 kan admit tawh a ni. Pu Speaker, ka lawm e.

**SPEAKER :** Tunah chuan Starred Question No.118 zawt turin Member zahawmtak Pu C. Lalsawivunga ka sawm e.

**PU C. LALSAWIVUNGA :** Pu Speaker, ka lawm e. Vigilance Department changtu Minister zahawmtak chhan atan ka zawhna te chu:

- a) Mizoram Lok Ayukta-ah hian pawikhawih a puh chhui chiang tura complaint
- b) thehluh engzat nge awm? Lok Ayukta hian pwikhawiha puhte dik leh fel taka chhui chiang turin thuneihna leh zalenna pek a ni em? tih ka zawt e.

**SPEAKER :** Chhang turin Vigilance Department changtu Chief Minister zahawm tak Pu Zoramthanga i sawm ang.

**PU ZORAMTHANGA, CHIEF MINISTER:** Pu Speaker, Member zahawm tak Pu C. Lalsawivunga zawhna chhanna chu:

- a) Mizoram Lokayukta-ah hian pawikhawiha puh chhui chian tur complaint 25 a lut tawh a ni.
- b) Section 13 leh 25 of Mizoram Lok Ayukta Act, 2014 hian Lokayukta hi pawikhawiha puhte dik leh fel taka chhui chiang turin thuneihna leh zalenna a pe e.

**SPEAKER :** Zawhbelhna zawt turin a zawhna neitu Member zahawm tak Pu C. Lalsawivunga i sawm ang.

**PU C. LALSAWIVUNGA :** Pu Speaker, ka lawm e. Ka zawhna (a) na chhanna ah khan, case 25 a lut tawh tih a ni a. Heng zingah hian engzatnge chinfel ni tawha, chinfel hmabak engzat nge la awm tih min hrilh thei ang em?

Tin, zawhbelhna pahnihna atan, Lok Ayukta hian ama pualin investigating staff engzat nge a neih tih leh, prosecution staff engzat nge a neih tih ka zawhbelhna a ni a.

Tin, ka zawhbelhna pathumna ah chuan, kum kal taah khan Lok Ayukta-ah hian pawisa a tlem em em mai a, department pawimawh a ni a, hetiang zat lek pawisa hi chuan hna a thawh tak tak theihloh ang a, tih ngaihtuahna a awm a. Chutih laiin, 2021-2022-ah hian nuai 194.38 chauh BE-ah dah a ni a, hlawh atan nuai 111.39 hman a ngai a. Wages atan nuai 33.89 hman a lo ngai bawk nen. Lokayukta hian he kan budget atang hian hna hi an thawk tak tak thei dawn lo niin a lang a. Hei hi kan sawrkar hian ngaipawimawhin hna thataka an thawhtheih nan sum a pek belh thei ang em tih hi ka zawh belhna a ni e.

**SPEAKER :** Zawhbelhna zawt turin Member zahawmtak Dr. Vanlalthlana ka sawm e.

**DR. VANLALTHLANA :** Pu Speaker, ka lawm e. Member Pu C. Lalsawivunga zawhna ang deuh, amaherawh chu tlemin a dang deuh dawn a.

Vigilance Department changtu Minister zahawmtak chhan atan hei hi ka zawh belh e -

Nichina sawi ang khan, ACB-a hlawh dah hi cheng nuai 95.6-in a tlahniam a, tin, Lok Ayukta bik kha hlawh a chanvein tihniam a ni bawk a. Tin, regular-a thawk hi report ah chuan, Lok Ayukta-ah hian pakhat emaw chauh a ni a, chuvang chuan engatinge hlawh hi tihniam/tihtlem anih tak tih hi ka zawhna a ni a. Tin, Lok Ayukta hian investigating unit hran a nei tur a ni a, tunah hian ACB hi a hmang tawp a. ACB hi Vigilance Department Minister changtu hnuiaia awm a ni a, a in connect e tihna a awm miah lo a, amaherawhchu undue influence kha awm palh theih a ni. Lokayukta hnuiaiah hian SEDP Khawnpuiah vaibelchhe 400 kha helai investigating unit emaw, agency emaw tihna tur atan khan pawh theih a ni ang em? Vigilance-ah hian kan tan a ngai a, Lok Ayukta kan tihchak a ngai a, hemi atan hian pek theih dan a awm ang em?

**SPEAKER :** A theih ang anga chhang turin Chief Minister zahawmtak Pu Zoramthanga ka sawm e.

**PU ZORAMTHANGA, CHIEF MINISTER:** Pu Speaker, ka lawm e. Member zahawmtak Pu Lalsawivunga zawhna case 25-ah khan engang nge chinfel tih zawhna kha, case dawn tawh zawng zawng atanga preliminary inquiry adapt tura order pek tawh zat chu 14 a ni a. Tin, preliminary inquiry ti tura Mizoram Lokayukta in order a issue ni lo ACB atanga preliminary inquiry report Mizoram Lokayukta a theh luh zah hi 9 a ni a. Case 2 chu preliminary inquiry ngai loa closed a ni a, tichuan avaiin case 25 a ni.

Tin, staff engzat nge tih kha, Lokayukta-ah hian tun dinhmunah post 35 a awm mek a, post siam belh sawrkarah an rawn dil a, chung chu ngaihtuah mek a ni bawk a ni. Tin, pawisa a pek bel theih ang em tih kha, a tul angin sawrkarin a mamawh ang chu kan lo pe zel ang, an mamawh an rawn dil te chu. Amaherawh chu an dil zah zah ni loin Finance a kal dan uluk taka enin hei hi a mamawh zat ngei nia hriat a ni e tih enhungin pawisa pawh pek belh tum a ni ang. Khang kha Pu C. Lalsawivunga zawhna ka chhanna ni se la.

Tin, Member zahawmtak Dr. Vanlalthlana zawhna kha, engatinge hlawh tih hniam anih tih kha, engpawh nise a deal tutena an pek tur tawk nia an hriata te hi pek an ni mai a. Engpawhnise khang kha chu enin tih hniam a ni emaw tihsan a ni emaw a kal zel turah ngai i la.

Tin, ACB hian mahnia enquiry ti tur hian ACB an hmang rih mai a, Hemi ni lo hian a tharin (**SPEAKER** : *Zawhna leh Chhanna hun a zo a, chhang zo law law rawh se aw.*) ACB hmang loa a hrampaa an mahnia enquiry ti tura siam sak hi tha kan ti a, tih turin ngaihtuah mek a ni. Mahse, hna siam zung zung hi a harsat rih avangin tunah chuan kan siam sak theih hma chu ACB hian a lo la hmui a, ACB-in a lo la tisak a ni. Hemi hnu hian enquiry titu tur chu ACB-ina ti lova a hrana an mahnia nei turin hma lak mek a ni e.

**SPEAKER :** Awle, Zawhna leh Chhanna hun a tawp a, Election to Financial Committee-ah kan kal ang a. Kan hriat angin Public Accounts Committee

Chairman thin Pu Lalduhoma a awm tak loh avangin post pakhat a ruak ta a. Chu chu inthlan ngai a ni kan tih kha, PAC Chairman thar zahawm takin a rawn lay tawh a, helaiah hian a rawn pharh tawh a. Nomination hi March Ni 4 (ningani) tlai dar 4 thleng khan hawn a ni a. Amaherawhchu nomination file-tu dang kan nei lova, Prof. F. Lalnunmawia'n Public Accounts Committee Member atan Pu BD Chakma a nominate a. Nomination dang kan dawn loh avangin, he House-ah hian Member zahawm takte hnenah PAC Committee Member atan Pu BD Chakma thlan tlin a ni tih ka puang e. (**Pu BD CHAKMA: Pu Speaker, ka lawm e.**)

Awle, demand sawi kan tan leh tawh ang a, tunah chuan financial business-ah kan kal ang a. Vawiin hian Minister zahawm tak tak pahnih, Pu Lalchhandama Ralte leh Deputy Chief Minister zahawm tak Pu Tawnluia Demand kan sawiho ang a, pass nghal kan tum bawk dawn a ni. Hun kal taa kan lo tih thin angin Minister pahnihte demand hi a rualin sawi leh mai ila a tha ang e.

Tunah chuan Minister zahawm tak Pu Lalchhandama Ralte ka sawm ang a, House dawhkanah heng:

- 1) Demand No. 18 - Printing & Stationery Department,
- 2) Demand No. 20 - School Education Department,
- 3) Demand No. 28-Labour&Employment Skill Development Entrepreneurship Department Demand-te House-a rawn submit turin ka sawm e.

**PU LALCHHANDAMA RALTE,MINISTER:** Mr Speaker sir, on the recommendation of the Governor of Mizoram and with your permission, Sir, I moved the Demand No. 18, 20 & 28 for ₹15,76,40,32,000.00 only for meeting expenses during 2021-2022 in respect of the following Departments :

Demand No.	Department	Amount (in `)
18	Printing & Satationery	14,72,06,000.00
20	School Education	15,30,33,70,000.00
28	Labour & Employment Skill Development Entrepreneurship	31,34,56000.00
<b>TOTAL</b>		<b>15,76,40,32,000.00</b>

Thank you, Sir.

**PU C. LALSAWIVUNGA :** Pu Speaker, khawngaihin Demand No. 28 amount kha a bu nena inmil lo a awm a, kha kha tihsual palh a ni ang em aw?

**SPEAKER** : Nakin Demand sawi hunah kan hriat thiamloh laite kha kan sawi dawn nia. Tunah chuan Deputy Chief Minister zahawm tak Pu Tawnluia, heng Demand-te:

- 1) Demand No. 13 - Personnel & Administrative Reforms Department,

- 2) Demand No. 25 - Public Health Engineering Department,
- 3) Demand No. 46 - Urban Development & Poverty Alleviation Department te House-ah rawn submit se i lo sawm ang.

**PU TAWNLUIA, DEPUTY CHIEF MINISTER:** Pu Speaker, on the recommendation of the Governor of Mizoram and with your permission, Sir, I moved the Demand No. 13, 25 & 46 for ₹8,95,20,41,000.00 only for meeting expenses during 2021-2022 in respect of the following Departments :

Demand No.	Department	Amount (in `)
13	Personnel & Administrative Reforms	4,91,84,000.00
25	Public Health Engineering	4,63,99,95,000.00
46	Urban Development & Poverty Alleviation	4,26,28,62,000.00
<b>TOTAL</b>		<b>8,95,20,41,000.00</b>

Thank you, Sir.

**SPEAKER** : Awle, Minister zahawm tak ten an demand-te an rawn submit tawh a, sawihona kan tan ang a, Member te minute eng zat nge kan inpek leh ang le? Minute 10-ah kan inlungnral tlangin kan tlin tawk a ni ber e ti rawh u. Kan hriat angin Opposition Group leader-te kha minute 5 kan pek belh thin kha. Tunge han sawi hmasa ber ang? Member zahawm tak Pu Lalrinsanga Ralte i lo sawm ang.

**PU LALRINSANGA RALTE:** Pu Speaker, vawiiyah demand kan han sawi ho dawn a ni a, kan minister pahninte demand sawina-ah hian sawi tur tam tak a awmin ka hria a, hun erawh kan neih tamloh avangin ngaih pawimawh ang zawng pawh a sawi kim theih ka ring lo a. Chuvang chuan ka ngaihpawimawh zual han sawi ka duh a.

Education department hi ka sawi hmasa ber ang a, lawm thu sawina tur hlir mai niin ka hria a. Ka bial khu hmar area. ‘hmar thimpui, zangkhua bungbut hnan’ an tih development-in a thlawh khum thin kha a ni a. Zirtirtu pawh kan lo nei chhe khawp mai a, kan han sawrkar ve takah khan Education Minister zahawm tak leh kan Chief Minister ten remruatna siamin zirtirtu kan indaihlohma min pek belh a. MR teacher 46 vel min pek belh a, kan lawm khawp mai. Dawng hnem pawh min lo ti mai thei a, kan sikul zirtirtute an lo awm tawh mang loh vang a ni a. Hindi teacher 14 min han pe leh a, SEDP atangin High School zirtirtu indaih lo 5 te min han pe leh a. Tin, ruahmannan kan hotute’n mi han siam sak a, a nghet pangngai min han sawn luh sakte nen a vaii zirtirtu kan bialah khuan 79 min han pe ta a kum hnih chhung hian, kan lawm takzet a ni tih kha ka sawi duh a. Hetiang hun harsa karah pawh Kan Chief Minister zahawm tak leh Education Minister ten he ram leh hnam din chhuahna tur, ram siamna tur chuan zirna a pawimawh a ni tih hriain ruahmannan an han siam hi a lawmawm hlein ka hria a. Tin, sum harsa tak karah pawh sikul chhe zual,

ngaihpawimawh zual min han repair sak a kan lawm takzet a ni tih kha Pu Speaker, ka lawmthu sawina ni ta se.

Kha lo pawh kha education-ah hian sawi tur tam tak ala awm a, Vairengte-ah Higher School Science zirna min han pe thar a, ramri dep kan inti fo a, a dik a, hmasawnna a awm si lova, chung angah te Science zirna tur min han pe thar hi a lawmawm takzet a ni tih kha ka han sawi duh a ni.

Tin, Pu Speaker, Education Department hi Mizoram sawrkar department-ah chuan a lian ber niin ka hria a. Tin, a thawktu an tam a, an file hi mihring an ni tlat mai a, chulaiah chuan an department hi a lianin mamawh pawh an ngah hle ang tih pawh a rinawm a. Amaherawhchu Pu Speaker, helaiyah hian pawi han tihpui deuh ka nei a, nikum budget an phak lohna hi nuai 2,400 vel a ni a, chuti chung chuan theih tawkin kan Education Minister hian tan han la se, kan Chief Minister leh Finance Minister ten education kan ram than nan, kan ram leh hnam him nan a pawimawh berte zinga mi a ni tih hriain duhsakna han hlan thei se, RE-ah kan hotupa hian min han hriatsak se thain ka hria a, chulaiah chuan Education department hi kan vulh deuh ngai hian ka hria. Khaw tinah, bial zawng zawnga kan harsatna thlen tamna ber chu education department hi a ni si a, chuvangin duhsakna pe deuh the ila tih kha ka sawi duh a ni.

Tin, Pu Speaker, kan hre theuh a, khaw tinah kan bial chhung theuhah hian khawtlang suma enkawl sikul tam tak a awm a ni. Chungte chu *lumpsum*-a han hlankai te, tin, lumpsum nisa *adhoc-aided* a han dahchhoh te, tin, adhoc tam tak sawrkara han hlanluh te, khatiang ang ruahmanna te kha a tul hlein ka hria a. Kan zirna hi a pawimawh a, a bik takin thinglang, i bial leh ka bialte phei hi chu a kil ropui si a, i bialah pawh hian tam tak ngai an awm ka ring a, khawtlang leh MLA te hian kan fund-a kan enkawl pui sikulte hi an awm nual a, chuvang chuan kan sawrkar hian kha lam hawi zawng khan upgrade ngai sikulte, tanpui ngai sikulte lumpsum a hlan ngai, adhoc-a dah ngaite sawrkar hian ruahmanna kan siama, chutianga kan dahchhoh theihna tur chuan hma la ta ila a tul hlein ka hria a ni.

Tin, Pu Speaker, eduction-ah hian ka sawi leh duh chu, Vairengte khu ka sawi fo thin a, vote-ah pawh vote 7000 chuang awmna, a mihringah phei chuan mihring 20,000 dawn awmna a ni a, Sub-Division hmun niin ramri a ni a. Khulaiah khuan SDEO office hi kan dah ngei ngei a tulin ka hria a, tun kan term chhung ngei hian SDEO office kan neih theih ngeina turin kan Education Minister hian ruahmanna min siam sakin kan hotu dang Deputy Chief Minister leh kan Chief Minister ten min han ngaihpawimawh sak hram se tih kha ka sawi duh bawk a ni.

Pu Speaker, Education Department bikah a tawp nana ka sawi duh chu, tun budget-ah nikum phak lo mahse theih tawp chhuahin tan han la chho se, kan hotute leh Finance Department lam te, Finance Minister te pawhin RE-ah tihpun saka, education hi kan ram leh

kan hnam damna anih avangin tun kumah pawh hian tluang taka an mamawh ang te an neih chhoh theihna tur hian duhsakna hlan se tih kha ka sawi duh a ni.

Tin, LESDE hi han sawi leh ka duh a. A ropui khawp mai a, department lian lutuka lang si lo hi tun Covid chungchangah khan a contribution a ropui khawpin ka hria a. Sorkarin Covid kan buaipui a, ruahmanna hrang hrangte kan han nei a, kan mipuite riltama an awm kan phal si lova. Chulaiah chuan LESDE department hian vaibelchhe 22 chuang lai contribution an rawn nei niin ka hria a, a lawmawm hlein ka hria a ni.

Covid laia ration buhfai a thlawna kan lak theihna turin LESDE department hian cheng nuai 640 chuang a han thawh a, tin, Workers Welfare Board atangin an member-te mi singruk chuang ₹3,000/- theuhin Covid harsat lai khan mirethei leh harsa zualte tan an han pe theite kha a ropui ka ti a, he department LESDE hi a than chhoh leh, a mawmawh leh harsatnate puiha, kan ram tana heiaia nasa zawka hna a thawh theihna turin duhsak an phu hlein ka hria a ni.

Pu Speaker, PHE-ah hian ka kal leh ang a. Thinglang lam bialtu kan ni a, PHE hnathawh hi ropui hlein ka hria a. Keini bialah pawh khawtlangah tui lak harsatna tam tak kan nei a. Tin, tui kan hniang hnar lo khawp mai a kan bial hi, chulaiah chuan PHE-in hma min rawn laksakna te, tin, khawl a chhiaa a pump theihloh kan tih pawh kan Minister-ah kan han thlen a ruahmanna min han neih sak zung zung te kha kan lawm takzet a ni tih ka sawi duh a. Tin, a bik takin Saipum leh Chhimluang khu tui an harsa khawp mai a, hei hi JJM hnuiai kan project-ah khan telh theih anih chuan a lawmawm ngawt ang tih kha ka sawi duh bawk a ni.

Pu Speaker, UD&PA-ah ka kal leh dawr mai ang a. UD&PA-ah hian lawmthu sawi tur ka ngah khawp mai a. Term hmasa lamahte ‘notified town’ kan tih Aizawl leh District Capital dang nilo notified town dangah hian development hi a lut thalo thin em em mai a, Pu Zoramthanga sawirkar a rawn pian hnu hian notified town te hian malsawmna kan lo dawng ve thei ta te hi ropui ka ti a, chutiang ruahmanna siamtu kan Deputy Chief Minister hnenah hian lawmthu kan sawi duh a ni.

Niminah pawh ka sawi tawh a, Vairengte-ah khuan bawlhhlawh pailhna kan neilo reng reng mai a, highway-ah khuan an hal thin a, a khu a, a rimchhe em em mai a, state pawn atanga an rawn hmuh hmasak chu bawlhhlawh pailhna a ni mai a, kan ram rawn hmutu ten. Khu kawng khu Mizoram mipui 90%-in luh leh chhuak nana kan hman a la ni si a. Khu laia bawlhhlawh kan pailhna lutuk, rimchha leh tawp lutuk khu tih reh a ngai tiin kan Deputy Chief Minister-in ruahmanna min siamsak a, tunah chuan bawlhhlawh pailhna hmun tha tak mai Vairengte-ah kan nei thei ta khu kan lawm takzet a, kan Deputy Chief Minister chungah hian kan lawm hle a ni tih kha ka sawi duh a. Chu mai ni lovin a panna kawng pawh fur a thala motorin a pailtheihna turin PCC flooring in min tihchhuah sak vek bawk a, kan lawm hle a ni tih kha ka sawi duh a.

Helaiah hian ka sawinawn duh chu Pu Speaker, bawlhhlawh pailha kan hawn ni hian an Joint YMA hruiatu chuan, “Sawrkar term hmasa lamah pawh helai bawlhhlawh pailha hi hmundanga sawn kan duh a kan rawt thin a, a kal hlei thei si lova, chuvang chuan ramri venhim nan bawlhhlawh helai hmunah hian kan pail mai a ni” tih a sawi a, ka rilru a dek khawp mai a. Chuvang chuan, khumi bawlhhlawh pailha kan hawn nia ka sawi chu, “tun, Pu Zoramthanga sawrkarah chuan bawlhhlawh a pailha hmunah in pail tawh ang a, ramri hi chu Sipaiin an veng tawh ang” tiin ka sawi nghe nghe a ni. Chutiang chuan kan UD & PA Minister, Deputy Chief Minister zahawmtak nibawkin Aizawl khawpui mai nilo leh District Capital mai nilo notified town dang te hmasawnna tura ruahmanna a rilruah a dah liana a rawn siam hi lawmawm tak zetin ka hria a.

Chulaia ka sawi leh duh chu Pu Speaker, Kolasib town area-ah khuan, buaithlak deu hmai chu, Kolasib constituency ni si lo, town area-ah khuan ‘Rengtekawn’ kan tih te, ‘New Builum’ kan tih khua te leh Gosen, FCI godown awmna khu Kolasib town area-ah an awm a. Amaherawhchu, UD&PA atang hian development hi an hmu ngailo hrim hrim mai a, chu chu kan Dy. Chief Minister zahawmtakin hriain nikum khan chumi khaw thumin an mamawh em em an la neihloh hriain Hall sakna tur pawisa min pe a, kan lawm tak zet a. A ruhrel kan din chho tawh a, khu khu sak zawk ngei a ngai si a, khumi Hall pathum khu tam pawh a ngaitawh lova, nuai 10 den den chuan kan zo ngei tawhin kan ring a, UD & PA changtu kan Dy. Chief Minister zahawm takin ruahmanna min siamsak leh theih ngei kan beisei a ni. New Builum phei khu chu Serlui tuikhua avanga insawn chho ta te kha an ni a, hmasawnna tur an la ngah hle mai a, ruahmanna kan hotute’n min siamsak turin ka ngen a ni.

Tin, Pu Speaker, a tawp nana ka sawi duh chu, UD & PA hnuiah hian beisei pakhat ka nei a, Vairengte, Dinthar Veng atanga highway kawnga kalthlaka Silchar lampang chhuk thlak dawn khuan km 3, km 4 vel kal a ngai a, proposal kan thehlut tawh a kan Dy. Chief Minister zahawmtak hnenah, Dinthar Veng atanga Supply check gate bulah khuan by-pass road RCC pavement min siamsak theih chuan kan lawm takzet ang tih kha a tawp nan ka sawi duh a ni e. Pu Speaker, ka lawm e.

**SPEAKER** : Tunge ding ve leh ang le? Hun a uihawm ania, hun hi ren rawh u. Member zahawm tak Pu C. Lalsawivunga ka sawm e.

**PU C. LALSAWIVUNGA :** Pu Speaker, ka lawm e. Nichina ka rawn zawkna kha tihsual palh anih ka ring deuh riau mai a. Budget bu nen khan a inang lo tlat mai. Kan lehkha phek dawn nen hian enchian a thain ka ring mang e aw. Demand No. 38-ah khan ‘vaibelchhe 31, nuai 43’ tih hi ‘nuai 34’ tihtur niin a lang.

**SPEAKER** : Ni e, School Education kha chu a dik a, Labour & Employment, Skills Development & Entrepreneurship ah khan tlema tihsual palh a awm a nih hi, ‘nuai 34’ tih tur a ni e. Khalai te kha, tihsual palh hi a lo awm ve thin a ni e. Tin,

tihsual hi helam atang pawn kan lo tisual ve thei a, kha kha member te hnenah ngaihdam kan han dil bawk a ni.

**PU C. LALSAWIVUNGA :** Pu Speaker, Printing & Stationery-ah hian hma kan sawn thei lo khawp mai a. Kan budget han en hian 2020-2021 BE, kumina BE atang hian Printing & Stationery-ah phei chuan hmasawnna hmuh tawh awm tak a ni a. Stationery Department hi department zawng zawng kan innghahna tur a ni a, amaherawhchu hmasawn hi a har hlein a lang. Engpawhnise, Budget Session lo awm leh turah hi chuan hei aia hmasawn zawka kal dan hi ngaituah ni sela a thain ka ring a ni.

Tin, School Education Department hnuiah hian Pu Speaker, han sawi hmasak ka duh chu, 2020-2021 aiin 2021-2022 BE a hniam hret a, tin, budget bu han en chuan Capital Expenditure atana ruahmannna a awm miah lo mai hi enge a chhan tih min hrilhfiah atan ka zawl duh a. Department lian a ni a, Capital Expenditure atana ruahmannna awm miah lo mai kha a mak angreng mang e aw tih loh theih loh a ni. SEDP cheng vaibelchhe 400 a chi tur atang khan capital expenditure hi kan dah mai dawn nge tih hi ka zawhna a ni e. Hei hi kan Minister zahawm tak khan min lo chhinchhiah sak sela.

Tin, ka bial chhung Aizawl South-I ah hian Government School sak that ngai a awm a, Govt. Central High School leh Central Higher School khu a chhe tawh khawp mai a, Govt. Bethlehem Vengthlang High School khu sak that ngai em em a ni bawk a. Heng School pahnih hi an result pawh a tha thin a, naupang pawh an tam a. A building sakna a rei tawh a, a bang te thawmthat ngai reng a ni a, zirtirtu ten an hlawh te thawh khawmin chutiang chuan an siam tha a. Tin, Govt. Central High School leh Central Higher School building te phei khu chu silpaulin-in kan ceiling a ni; fur laiin a far NASA a, zialo tak a ni. Khawpui chhung a awm ve, school pawimawh tak ni bawk si a ni a, a zialo khawp mai a. Kan Minister bulah pawh kum hmasa lamah khan ka thlen tawh a, tun tumah hian tih takzeten ka thlen a, min ngaihpawimawh saka, a hrarpa taka tun tumah pawisa dah a awm lo anih pawhin SEDP vaibelchhe 400 atang tal khan he building sak thatna hi min pe turin ka ngen a ni. Tin, College Veng-ah khuan science stream, khawtlangin an din leh an enkawl a awm a. Lump-sum Grant in sawrkar-in tunah hian min enkawl a, science stream zirna hi upgrade theih a ni ang em tih ka zawl duh a ni.

Tin, Pu Speaker, Demand No. 28-ah hian ka han lut leh ang a. Budget tihsual palh kha chu kan hria a siamthat mai tur a ni ang a. (**SPEAKER** : *Ngawi rawh aw, khawngaihtakin khalai kha. Keimahni bulletin-in a kan tihsual a ni, a department chuan an ti dik vek a, a bu pawh a dik vek a. Helai kan rawn tihsual te kha ngaihdam kan dil bawk e, Assembly-in*) Kan ngaidam lutuk che u.

Tunlai khawvelah hian mihring nun a inthlak danglam chak em em a, chuvangin, mihring tih hmasawn hi thil pawimawh a ni. Eng thil pawh ti dawn ila, miin skill, talent tha deuh deuh pawh lo nei mahsela, kha a skill leh talent neih that kha hmantlaka chher a ngai

a. Chutah chuan Labour, Employment, Skill Development & Entrepreneurship Department hi chumi atana hma la tur department pawimawh tak mai a ni a. Kan thalaite tih tur leh thawh tur nei lova awm awl an tam em em a, tih tur leh thawh tur an neih loh miau chuan hun awl an lo ngah a, zu leh ruihhlo-ah te an lo tluk luh phah thin a ni. Chuvang chuan, Labor, Employment, Skill Development & Entrepreneurship Department anih ang ngei hian heng kan thalaite tan hian kawng a thara zawna hma lak pawh hi a tul hlein ka hria a.

Tin, Labour cess pawh hi kan hman tangkai a pawimawhin ka hria a. Kum 2020-2021 chhung hian labour cess hi engzat nge lo lut, he department-ah hian mi engzat nge inziak lut tihte hi hriat a chakawm khawp mai a, kan Minister zahawm tak hian min react theih chuan a lawmawm hle ang.

Pu Speaker, Demand No. 13, Personnel & Administrative Reforms-ah hian MSSSB hi din a ni tawh a. Tichuan, Assembly-a zawhna atang te leh department atanga zawhna kan pek chhanna atang hian MSSSB-te hian hna din anih atanga vawiin thleng hian an la la lo niin a lang a. Hnathawk tura lak an ni a, entirnan School Education Department leh department dangah te pawh hna lak a awmin Group B chin an kuta awm tura ngaih a ni a, zirtirtu tam tak lak kan nei tawh a. Heng hmalakah hian MSSSB hian hna lak an la nei lo niin a lang a, a pawi hlein ka hria. Chuvang chuan heihi ennawn a tha awm mang e tih ka sawi duh a ni.

Tin, Demand No. 25, PHE hi, tunlai hian tui a har hle mai a, Aizawl veng dangah hian eng nge an dinhmun chu ka hrelo a, ka bial chhung bikah chuan tui kan har a ni. Bethlehem te, Bethlehem Vengthlang te, College Veng-ah te chuan kar hnih chhung pawhin tui an hmu lo a, a lo haw chhun pawh a tlem em em mai a, kan Minister zahawm tak hian hma min lakpui theih chuan a lawmawm hlein ka ring a, ka ngen a. Aizawl Greater Water Supply Scheme Phase-I leh Phase-II hi kan kham khawp tawh lo a ni tih hi a chiang em em a ni. AGWSS Phase-I leh Phase-II Aizawl khawpui chawmtu hi Brig. Thenphunga Sailo, Chief Minister zahawm tak fam ta hova hmalakna kha a ni a, Mi 80,000 vel tlan theih tura buatsaih anih laiin vawiin thlengin kan ring a ni. Chuvang chuan, SIPMIU hnuia hmalakna te, tin, Alternative Water Supply Scheme of Aizawl, gravity hmanga tui lakna tur hi pawisa pawh hmuh fel tawh nia sawi a ni a. Hei hi tui in tur hnianghnar tak kan neih theihna turin chak taka hmalak theih a ni ang em, tih Pu Speaker kan zawt belh duh a ni.

Sawi tur a tam si a, Urban Development pawh ka la sawi hman lo a ni a. Tawi te in Pu Speaker hun min pek belh teh, khawngaih takin.

Demand No. 46-ah lut ila. K-Deposit a pawisa dah release loh, release tura dil mek Ni 9, February, 2021 thlenga awm kha cheng vaibelchhe 10,63,45,800/- a ni a, tin, bill passed tawh la payment loh contractor 162 an awm mek bawk a ni. Tin, kum 2019-2021 chhung hian restricted tender hmanga hna pek contractor 11 an awm bawk a, a pawisa faiin cheng nuai 3,576.25/- a ni. Hei hi kan in enlet a thain ka ring a. Leiba tam tak, contractor

bill pek theih loh heti zat hi an awm a. Tin, Covid chhuanlama thil kan sawi kan sawi lai hian restricted tender hmanga hna heti zat pek a ni te hi kan in enlet a tan a pawimawh hlein ka hria a. Pu Speaker, chung te chu ka sawiduh a ni. Ka lawm e.

**SPEAKER** : Ruling lam an phar a, Dr. K. Pachhunga, Member zahawm tak ka sawm e.

**DR. K. PACHHUNGA** : Pu Speaker, ka lawm e. Demand No. 18, Printing & Stationery-ah hian, Ni e, kan ngaihthlak tawh ang khan hma kan sawnin ka hria a. Department hrang hrangin kan dawr thain ka hria a. Tin, ka bialah Lunglawn Veng-ah Lunglei District Printing & Stationery Office a awm a, Salem Veng nen an inri naah a awm a, an khawngaihthlak ang reng khawp mai a, ruah a surin office chhungah tui a lut nasa lutuk thin a, hei hi min en sak kan duh khawp a, hma kan sawn viau chuan ka hria e.

Demand No. 20, School Education-ah kan hriat angin harsatna tam tak karah, kum 10 kal taah khan ka bial bik khaw 37 awmna, kum 6 chhung uluk taka kan fan thin naah chuan school building hetia ngaihtuah ai hian a chhia a ni. Hman niah ka bial chhung Khawmawi-ah kan kal a, an middle school inchung a pawp nasa lutuk a, primary school pawh chutiang tho chu a ni a, kum 10 chhung khan education hi kan lo ngaihthah lutuk a, a pawi ka ti hle a ni. Tunhmain Mizoram chu thingtlang deuh vek kan ni a, Sap Mission ten uluk taka zirna min kalpui avangin mithiam tam tak kan chhuak a, an quality pawh a tha a ni. School building a chhiat lutuk chuan, zirtirtu an zahawm lova, naupangin thu an awih lo bawk a, ti mai mai nun alang chiang em em a ni. Kan school building a that loha zirna kan ngaihthah chuan, he ram future hi, “a tha lo” tih a chiang em em a. Kan hriat angin, education hi engkim development bul a ni a, vawiina Mizoram-in a tlakchham ber chu sum anih lain, “tih takna nun” kan tlachham a, school-ah kan inzirtir thar leh a ngai a ni. Mahni hnaah kan tui lova, mahni hna loah hlir kan in concentrate a a pawi takzet a ni. Zirtirtu chu a hnaah tui sela, Pathianin a eizawnna atana a pek a ni a, chutiang chuan vawkvuh tu pawh a hnaah tui sela, chu chu hlawhtlinna a ni. Khawvel ram changkang kan hmu a, an hnaah an tui takzet a, kan ram kan pianusalna chu mahni hnaah kan tui lo hi a ni. Mahni posting-ah kan lungawi lova, hengte hi a buaithlak a, MLA tan pawh a buaithlak a, transfer an rawn dil reng mai a, ka bialah pawh, “I bialah kan rawn awm ang e”, ti hi chu an awm meuh lo a, chhuah hi an tum deuh vek a, a buaithlak hle a. Zirtirtu tha thingtlang pawhihn an mamawh a, thingtlang naupang, talent tha tak tak, mi tha tak tak, IAS tur te, officer tur te mi tam tak an awm ang, teacher tha lovin an career an tih chhiat sak a, zirtirtu tha an pawimawh hle. Tin, building pawh theih tawpa tihtat ve a ngai, chutiang chuan ka bialah ngei pawh mamawhna a sang a. Harsatna karah kum hniih kan kal tawh a, Education Minister leh kan Chief Minister te hma lakna-in kitchen sak te, class room extension te, toilet sak te leh drinking water pek te eng emaw zat min tihsak kan lawm takzet a, khawtlang mipui pawh an lawm a ni. Chutiang chuan tih tur hmabak ala tam em em a, school building thar pawh Lungrang-ah kan nei a, kan lawm takzet a, kan sa tha hle a ni tih pawh ka report duh a. Chutiang chuan Mamte-ah High School an neilo a, a chheh vel khuaa naupangte hnai taka High School an kal ve theihna

turin kan Minister leh CM hmalaknain Mamte-ah RMSA High School min pe hi kan lawm takzet a, a bial mipui aiawhin lawmthu ka sawi duh a ni.

Chutiangin Tawipui tlangdungah khaw lian ve deuh deuh 9 a awm a, High School an nei deuh vek a, Higher Secondary School an nei lo a, chutiang bawkin Lunrang tlangdung, Chawngte tlangdung khaw 14-in +2 school an nei lova, hengah te hian hma min lak sak kan beiseiin kan duh takzet tih ka sawi duh a. Tin, zirtirtu indaihlo phuhruk nan kan sawrkar, kan Chief Minister hmalaknain teacher 1,000 tel lak a ni a, thingtlangah an awm duh lo a, khawpuiah an awm teuh a, khawpuiah zirtir tur naupang kan hmu zo lo tan a, kan tlahniam em em a, mahni thawhna school-ah mahni fate pawh kan kaltir duh lo a, hengah hian inenfiah chu kan ngai hlein ka hria a ni. Ka bialah zirtirtu eng emaw zat min pek belh a kan lawm takzet a. tin, hindi teacher pawh min pek belh a, a la daihlo nain a dil tur te an awm chuan sawrkarin min pe zel turah kan ngai a. Chutiang chuan nasa takin Education-ah kum hnih chhung lek hian hma kan sawn hlein ka hria a ni, lawmawm pawh ka ti a ni.

Demand No. 25, PHE Department hi kan hriat angin, kumin hi Ni-in khawvel a hnaih ber kum a ni a, tui a kang nasa a, harsatna a tam tih pawh kan hria a. Tin, ka bial bik khaw 10 lai NH-54 widening avangin tui lakna pipe eng emaw zat a chhia a, a siam that nan deposit work kan beisei a, sawrkar hmasain deposit work a lo buaipui loh avangin tunah harsatna kan tawk a. Electric-ah chuan kan buai lo a, engkim an lo tih fel thlip thlep avangin. Kan sawrkar hnu nikumah sawrkarin theih tawp chhuahin estimate te siamin deposit work turin NHIDCL ah submit-a hma lak a ni a, chutih rual chuan kan sawrkar, kan Chief Minister hmalaknain JMM Scheme, central scheme kalpui turin ka bialah ngei pawh solar plant khaw 7 lai kan nei dawnin ka hria a, khua zawng zawng tui min pekna siamthat tum a ni te hi kan lawm takzet a, lawmthu ka sawi a.

Pu Speaker, ka bial hi khaw 37 a ni a, sawi tur a tam deuh a. UD & PA-ah ka bial khawpui chhungah malsawmna kan dawng ve a, kan lawm takzet a, khawtlang pawh kan lawm a ni. Kawngpui dungah footpath te kan nei thar a, kan lawm hle a ni. Pu Speaker, ka lawm e.

**SPEAKER** : Member zahawm tak Pu Ramthanmawia ilo sawm ang.

**PU RAMTHANMAWIA** : Pu Speaker ka lawm e. School Education Department, Demand No. 20 hi han sawi ve ila.

Pu Speaker, MNF sawrkar tirh atang khan zirna kan ngaipawimawhin zirtirtu sum harsa tak chungin 1,600 lai kan han la a, chungte chu keini bial harsa tak, zirnaah pawh hnufual tak East Tuipui-ah te pawh a zar kan lo zo a, kan Chief Minister zahawm tak, House Leader ni bawk leh Education Minister zahawm tak Pu Chhantea te, Vice Chairman, Human Resource Development Board Pu Thangmawia ten kan harsatna te min hriatpui a, zirna lama

hma kan sawn theihna turin MR teacher pawh Middle School ah 5, Primary School ah 47, a vaiin 52 min pe a kanlawm takzet a. Tin, Hindi teacher High School ah 5 leh Middle School ah 19, a vaiin 24 min pe bawk a, High School-a indaihlohnha hriain SEDP zirtirtu kan tih mai 9 min pe bawk a kan lawm tak zet zet a ni. A vaiin kan bial hian zirtirtu thar 85 kan nei a ni. Hei hian kan biala zirna tlakhniam zia leh kan lo hniam zia a tilang a, zirtirtu heti zat min pek avangin kan sawrkar leh Education Minister chungah lawmthu ka sawi a ni.

Sawrkar hmasa khan kan biala School building sakthatna tur emaw repairna tur hi dah a ni miah lova, 2019-a kan han sawrkar chhoh khan pakhatmah a lo awm lova, kan minister-in chu chu min hriatsak a, Khuangthing Middle School-ah additional class room min han sak tir a, tin, repair tur engemaw zat min pe dawnin kan hre bawk a kan lawm tak meuh meuh a. Chutianga lawmthu kan sawi rual erawh chuan, zirtirtu khati zat min pek laiin, a thawk mek te kha an lo senior a, an lo pension ve zel bawk a. Primary School pawh MR teacher lak lai khan teacher 4 theuh dah vek a ni a, mahse tunah Primary School pasarih, Khuangleng KM Primary School te, Lianpui te, Chawngtui East te, Leisenzo te, New Hruaikawn te, Thekpui te, Hruaikawn te, Khuangthing PS-II ah te zirtirtu 4 an nei leh tawh lo a ni. Middle School section ah Khuangleng, Vangchhia, New Hruaikawn, Farkawn, RM Middle School-ah te hian zirtirtu an indaih leh tawh lova, Khuangleng Middle School leh RM Middle School Farkawn ah phei chuan zirtirtu 2 chauh an awm leh ta a ni. Heng te hi Minister zahawm takin min lo hriat sak leh sela, a hmaa 4 kha an lo pension leh ta anih chu, khati karah khan. Chutiang chuan Vanzau-a Headmaster pawh January Ni 30 khan a pension a, zirtirtu 2 leh SEDP zirtirtu 1, tunah hian 3 an awm mek a, an Headmaster phei chu kan ui bet a, thla 3 emaw tal min chhuahsan rih lo turin kan ngen a, engemaw chu fund atangin kan rawih chhunzawm a ni.

Tin, kan hria a, kan biala Examination centre 3 - Khawbung, Khuangleng, Thanchhuma High School Farkawn te kan nei a, khingah khian LDC clerk an nei lo vek a ni. LDC neihloh chuan a buaithlak tur zia chu kan hria ang a, IV-Grade staff phei chu school thenkhatah an awm zeuh zeuh tih ang a ni. Tin, tunah hian Bungzung-ah High School exam centre kan dil a, hei pawh hi kan Minister-in min tihhlawhtlin sak ngei se, kan mamawhna a sang hle a ni tih kha ka sawi belh duh a. Tin Minister zahawm takin Headmaster lak theih anih hunah min lo hriatsak ka duh chu, Primary School 17-ah hian headmaster kan nei lova, Middle School 12-ah leh High School 8-ah headmaster kan nei a nih chu. Ka sawi tak ang khan, School building hi a lo hlui tawh a, repair a lo awm vak lova, tunah khian school chhe zualpui 11 chu siamthat ngai tak mai kan nei a. New Hruaikawn Primary leh Middle School phei chu hmanni ka han zin pawh khan, tlumpi a lo lut nasa mai a, a thing awm zawng zawng kha an lo ei ral deuh vek mai a, tuna school kan han tan leh ang a, engtia tih chi tak ni ang maw ka ti a. Chuvang chuan, school kum 1 lai kan han chawlh khan Tlumpi-in a chokut te, a inchhun zawng zawng te a lo ei vek a ni. Tichuan, Minster zahawm takin fund a neih huna min hriatsak atan kan duh chu, school repair ngai kan han sawia kha school 11 a ni a, tin, toilet neilo school 21, a hungna neilo school 43 kan nei bawk a ni.

Tin, Champhai DEO office hi indaihlohma a na hle mai a, middle school teacher pakhat attached-in dah a ni a, a bak regular staff an awmlo a ni. File pawimawh han khawih tur pawhin regular staff pahnih khat tal chu han awm belh theih se tih kha kan ngen sak a ni.

Demand No. 25, Public Health Engineering hi ka han sawi leh ang a. Hei, kumin budget PHE Departmernt-ah hianin vaibelchhe 236, nuai 4, sing 7, sang 8 hi kum hmasa aiin a lo pung a, a lawmawm hle mai. Ka hmaa member zahawm takin a sawi tawh ang khan, Thinglang bialtu kan ni a, thinglangah hian tui a har em em a, tunah hian JJM hmangin tui kan hnianghnar theihna turin hma lak mek a ni a, a lawmawm em em a. Sik leh sa a lo danglam zel a, nikuma tui kan neih that naah te khan kuminah a lo thalo leh a, khua a lo lum a ramngaw kan ti chereu nen, tuihna a kam telh telh a, kan bial pawh a kum telin tuiah harsatna kan nei chho ta zel a. Chutiang chuan kan tui tlan lai te a lo kang a, tunah hian Vaphai phei chu motor-a chawi a ni a, an harsa em em a ni. JJM hian ka bial khaw 7 a cover tawh a, tunah hian thawh mek Farkawn, Thekte, Khawbung leh Sesih a awm a, JJM-in a la cover loh hmalak lohma khua hi khaw 16 a la awm bawk a ni. He JJM hmanga tui harsatna sutkian a ni chhoh zel hi lawmthu ka sawi rualin, khawtin mai hi tui harsa em em mai an nih vek avangin, hei ai hian JJM hian min rawn cover chak sak thei sela a duhawm khawpin ka ring, Pu Deputy Speaker. Tin, JJM cover tawh khuate tui hnianghnar tura ngaih a lo ni a, amaherawhchu, Khuangthing hi JJM cover tawh si tuiah an la harsa tlat mai lai khi, Minister zahawm tak khian a tih dan tur min ngaihtuah saka ngaihtuahna min hmansak theih chuan a lawmawm khawp ang. Khuangthing, Buang, Farkawn, Vanzau, Vaphai, Khuangleng leh Thekte hi ka bialah chuan tuna tui harsa zual khua an ni a. Vanzau hi tui pipe a hlui tawh avangin Minister zahawm hnenah an VC te lo kalin ruahmanna a lo neihpui a, a lawmawm khawp mai a. Tin Buang hi PMGSY kawng thar laihnaah pipe a chhia a, a thlakna plastic pipe kan han lei sak a fund atangin. Amaherawhchu, tui ala haw thei lova, tunah hian GI Pipe 40 mm 100 vel an mamawh leh a, chu pawh chu department-a han tih kan inthlahrung ve deuh tawh a, fund atangin lo chah mai rawh u te kan han inti a. Chutiang chuan Buang pawh hi tui an harsa khawp mai.

Pu Deputy Speaker, minute khat lek, in inhlakthleng chhung kha a rei viau a ni. Khuangleng pawh tui kan har a, hei hi khawtlang leh MLA fund te hmangin leh diesel engine te hmangin tuna an harsat chhunga lo pump dan kan ngaihtuah a, tunah hian an buaipui ve mek a ni. Department lam kan nghak a, an rawn thlen hma si a, eng emaw ti tia phuahchawp deuh hleka diesel engine nen tea tanlak dan a awm ang em tiin Khuangleng-ah hian hmalak mek a ni. Tin, Thekte pawh plastic pipe hmangin tuihna dang atanga hawl hawlh zawmin an khawsa hram hram a.

Pu Deputy Speaker, kan bialah hian PHE department-in nasa takin tunah hian hma a la dawn niin kan hria a. Solar pump hi kan nghakhleh khawp mai a, Zawngtetui, Leithum, Sazep, Vaphai, Leisenzo East, Chawngtui, Vangchhia, Vanzau, Bungzung, Dungtlang, Samthang, Khuangleng, Old Hruaikawn, Khankawn-ah te hian JJM hmangin proposal a kal

mek tih kan hria a, hengte hi kan nghahhleh khawp mai a. NABARD loan te emaw hmanga min rawn thawh saka, a aiawh tur awmloha vanga kan harsatnaah kan Minister hian tan min lakpui turin ka ngen duh leh bawk a ni. Ka lawm e.

**DEPUTY SPEAKER :** Awle, tunah chuan Pu V.L. Zaithanzama, member zahawm tak i lo sawm ang u.

**PU VL. ZAITHANZAMA :** Pu Deputy Speaker, ka lawm e. Vawiinah hian kan Minister zahawm tak tak pahnih budget kan sawiho dawn a, Pu Lalchhandama Ralte department chan pathum te hi ka han en a, nikum aiin betget a hniam vek a, a dangdai ang reng hle mai. Pu Tawnluia, Deputy Chief Minister zahawm tak department chan hi a pung tha khawp mai a, chu mi pahnih chu kan sawiho dawn a ni.

A hmasain School Education Demand No. 20-ah hian ka han lut ve nghal mai ang a. Nikum aiin kan budget hi tlemin a tlahniam a, School Education hian thil chi hrang hrang a hmachhawn teuh mai dawn niin a lang a. Covid-19 hripui leng vangin harsatna namenloin min tlakbuak a, hei vang hian zirlai te, kan thalai te hian eng ang takin nge an tuar dawn tih kan la hrethiam chiah lova. Kan la hmachhawn zel dawn ni pawhin a lang a ni. 2019 - 2021 hi Central YMA khan zirna uar kumah a puangin ka hria a, an ni pawh hi hripui leng avangin an thawm kan hre chau viau a, chutihlai chuan New Education Policy tih te a lo lang bawk a. Khatiang thil chi hrang hrang khan kan school education department hi a nuai chho a, chutiang hmachhawn tur chuan insang mar chhoh a ngai dawn niin a lang a. Budget bu kan en khan, nichin khan member zahawm tak tak te khan an rawn sawi tawh a, salary a tlahniam duai mai a, nuai 1634.8 laiin. Ka hmaa Member zahawm tak tak te sawi atanga a lan dan khan, zirtirtu tharte kan la a, kum hmasa ai khan hnathawkku kan nghah dawnin a lang bawk si a, chutih laia *salary* a tlahniam tlat mai kha, revenue expenditure tih lan tlem tumna a ni mai thei em aw tih te ka ngaihtuah a, a chhan chiah ka hrethiam lo a, chu chu ka sawi lang kher duh a.

Tin, ‘state matching share for midday meal’ kha nikumah nuai 578, sing 5 zet nikumah hman anih laiin kuminah khan dah a ni ta lova. Kum kaltaa kan pawisa dah kha hman lohin a la awm em ni aw, school kan kal mumal si lo a tih ngaihdan a lo lang a. Chungte chu ka han sawi tel ve hrim hrim a ni.

Kuminah school kal a mumal lo hle mai a, a lian lam an han lut tan a, a te lam, primary school naupang, pawl 4 leh hnuai lam school luh hun tur hi hriat a chakawm tawh hle mai. Hripui leng pawh zawi zawiin a tlem tial tial a, kum thar pawl sown a hun mai dawn a, hetiang lam hi kan Minister hian engtin nge a ngaihtuah tih ka zawt duh a. Tin, tunhnaiah Govt. High School 40 dawn laiah Headmaster thar dah a ni tih ka hriat khan ka lawm hle a. Headmaster neilo school nih hi a hrehawm khawp mai tih zirtirtute’n an sawi thin a. Chutihlai erawh chuan Govt. Higher Secondary School awm zawng zatve aia tam

mah Principal post hi a la ruak a, hengte pawh hi la chinfel chhunzawm zel a ni turah ngai ila.

Tin, School Education-ah hian officer indaih lohna a nasa viauin alang a, Joint Director post 2 awm mek pawh hi tihpun sawirik a awm fo thin a. Tunah hian DPC instruction-in a duh angin Additional Director post ruak awm hi hnawhkhah tuma hmalak a ni em tih kan Minister zahawm tak ka zawt nghal a ni.

Tichuan, UD & PA, Demand No. 46 hi, kum 2006-a din chauh kha a ni a, department naupang te nimahsela department pawimawh berte zingah a inhlankai der tawh a, ‘hmasawnna ruhrel, engkim mai khawihtu’ ti ila a dik mai awm e. A budget hi a pung nasa hle mai a, nasa takin hna an thawk dawn niin a lang a, a nghahhlehawm takzet a ni. Hmanniah kan Deputy Chief Minister zahawm tak hian Aizawl khawpui tan thlanmual inhmantawm tur pali buatsaih turin sawrkar-in ngaihtuahna a sen thute a sawi a, a lawmawm hle mai. Veng tin hi thlanmualah kan buai tawh a, tunah hian Aizawl veng lian apiang hi kan buai lian a ni deuh mai a, hei hi kan solve theih chuan a lawmawm khawp ang.

Hmanniah ka bial chhung Bungkawn-ah Community Hall nuai 480 senna tur lungphum kan Deputy Chief Minister zahawm takin a phum a, bial chhung mipuite kan lawm khawp mai a. Khatla-ah sawn hall kan nei lo bawk a, kan thati a bul kan tan mek a ni. Sawta tan pawh sawn beiseina sang tak nen, min zawhpui ngei beisei takin kan lo thlir a ni. Ka bial chhung veng lian pui pui - Maubawk, Bungkawn, Khatla-te sawn hall mumal kan nei lo tleng a, chuvangin, hall kan mamawh takzet a ni.

Thil pakhat sawi chakawm vak lo ka han sawi leh hram ang a. Ka sawi tawh thin a, lawm tikim zan lo, sawinawn leh pawh a nuam lo lek lek a, Mission Vengthlang Table Tennis Training Centre-cum-Basketball Court, Dt. 26<sup>th</sup> Nov., 2019-a hawn tawh kha infiam mite tan hman theih lohin a awm reng a. Tin, table tennis board 8 lai awm tur a ni a, basketball court-ah carpet leh net kan mamawh bawk a. Hemi chungchang hi Dt. 17<sup>th</sup> Feb., 2020 (Monday) khan he House zahawm takah hian ka zawt a, khata kan Deputy Chief Minister zahawm tak min chhannaah khan. “Final installment a lo thlen hunah a tul zawng zawng dah a ni ang” tih kha kan la hre reng a. Final installment hi a la thleng lo nge, a va thleng har ve aw tih vawiinah hian remchanga lain ka zawt nghal a ni.

UD&PA ‘housing for all’ ah hian pawisa a tam hle mai a, nuai 9,399 lai a awm a, state matching share dah a ni lo hi engnge a chhan tih ka zawt tel nghal ni se.

PHE, Demand No. 25 hi a pawimawh em a, tlem sawi hram ka duh a. A budget pawh a pung nasa a, a let aia tam mahin a pung a, hna an thawk nasa dawn niin a lang a. Tun dinhmunah hian kan dinhmun a tha lem lo a, tui kan kham khawp lo a, kan khawpui ber Aizawl pawhin kan kham khawp kan la dawng lo a ni. Amaherawhchu, tunah hian Phase I leh II kan ring a, Phase-III, SIPMIU-in an buaipui mek hi rei vak loa zawh mai a ni turah

ngai ila. September 2020-a zo tura ngaih kha tunah hian kan la zo lo a, kuminah kan zo thei turah ngai ila. Hei hian Aizawl hmarlam hneh taka chawm tura ngaih a ni a, chumi a nih chuan kan hnianghnar viau dawn a ni. (**Dy. SPEAKER : I hun a tawp e.**)

Pu Deputy Speaker, kam hnih khat lek. PHE hmalakna ka sawi laia ka rilrua awm, ka sawichhan ber zawk chu Phase-I leh II hi Reiek kai lam atanga pump chhoh a ni a, Aizawl tlaklam thli engemaw zatin a tibawlhlawh reng a. Phase-III, Tlawng atanga kan pump chhoh leh tur pawh hi Tuikual Lui, Aizawl tlaklam veng tam zawk thli atangin kan pump chho leh dawn a ni. Chuvangin, mahni thli pump chhoiñ kan inchawm dawn a, hetah hian thianghlimna kawngah, a lui tiethianghlim kawngah te tan kan lak a ngai dawn hle mai a. Ka sawi duh tak zawk chu Phase-III-ah hian kan la duh tawk maiin ka ring lo a, Phase-IV pawh kan la ti ang. Chutih hunah chuan kan thli atanga mahni chawmna tur pump chho tawh lo hian kan thli lo lam atang, hmun hla deuh atanga tih dan hi kan hotute'n ngaihtuah se la a tha awm e. Mahni thli in reng mai chu hriselna kawngah a tha lo em mai tih ka han sawi hram a ni. Pu Deputy Speaker, ka lawm e.

**DEPUTY SPEAKER :** A lawmawm e. Tunah chuan Member zahawm tak Pu BD Chakma i lo sawm ang.

**PU B.D. CHAKMA :** Pu Deputy Speaker, ka lawm e. Kumin budget hi nikum aiin a chhe zawk em aw ka ti a. Nikumah pawh thusawi laiin lo ngai haw lek lek an awm a, kuminah pawh buaina ka siam leh dawn a ni.

Vawiin Demand sawi tur zingah department ICU-a awmte zingah Demand No. 18 hi a tel a, Printing & Stationery hi ICU-a awm department tak tak a ni a, heta tanga bail out turin hmalak dan ngaihtuah a ngai a ni. Revenue earning department tur a ni a, mahse department dang zawng zawng hian engzat nge he department-ah hian an dawr thin tih kha khawngaih takin Printing & Stationary Department Minister in-charge atangin ka hre duh a ni.

Opposition ka nih lai pawh a dawr reng thin kha ka ni a, thla hmasaah pawh paper A4 size ream 2 ka leisak a, hmun dang aiin a tlawm deuh a ni. Whole sale rate-in an pe thin a, chuvangin department zawng zawng hian an stationary mamawhte dawr theuh turin compulsory order sawrkhar hian a chhuah theih lo em ni tih kha ka rilruah a awm a. Chutiang anih chuan he department hi ICU atanga lachhuakin revenue earning department-ah a siam theih a ni.

Tin, Demand No. 20, School Education Department-ah pawh thil tamtak sawi tur ka nei a. Tuna Education Policy siam thar tura kan Education Minister zahawmtak hmalakna hi lawmawm ka ti a, mahse lawmawm ka tih rualin tuna zirtirtu lak thar hmingte hi puanchhuah a ni ngei ngei tur a ni a, SEDP teacher nge fixed pay teacher tih pawh kha khawngaihin min han hrilh thei se a lawmawm ngawt ang. UPSC teacher, RMSA teacher,

Hindi teacher tih hming chu a awm vek a, mahse thla khatah sing khat chauh hlawha laktur zirtirtute hming chu engah nge a puan loh ka ti a ni. SEDP teacher-te hming hi puan tur a ni, Pu Deputy Speaker. Tin, an hlawh pawh hi a tlem lutuk lo maw ka ti a, tun kumah thil zawng zawng, arsa man ringawt pawh 300/kg a ni a, chutih laiin zirtirtu pakhat high school-ah thawk turin thla khatah cheng 10,000/- chauh pek kha enge awmzia? ASHA member-te, aganwadi teacher-te pawhin thla khatah cheng 5,000/- vel an la thin a, chutih laiin high school zirtirtu thla khatah cheng 10,000/- chauh pek kha chu nilo deuhin ka hria a, hei hi Pu Deputy Speaker, tihpun deuh dan a awm lawm ni? Tun Opposition MLA ka nih chhung pawh hian mi 4, 5 vel chu fix pay teacher-in ka chhawr a, nikum kal ta khan thla khatah cheng 14, 000/- ka pe thin a ni. Chutih karah a sawrkar zawkin thla khatah cheng 10,000/- chauh zirtirtu hlawh han inpek kha chu ka ti deuh a ni. Chhungkaw tina SEDP nuai 3 sem tur sawi laiin zirtirtute tan thla khatah heti zah chauh kan pek chhan hi min sawifiah sak thei se tha ka ti. Engpawhnise, kan sawrkar hrang hrang hian education policy, quality education kan sawi uar em em a, mahse a taka implementation erawh chu kan harsat thin a ni.

Pu Dy. Speaker, quality education neih theih nana proposal pakhat ka siam duh chu, zirlait Class-viii an zagh hian ‘Talent Search Examination’ Scholarship ang deuh hian neih ni se naupangte zingah competition a awm dawn a ni. Chutiang zawng chuan scholarship leh lawmman te pe ila, nakin zelah school naupangte’n quality education an neih theih a a beiseiawmin ka hria. Ka bial chuan, MLA Local Election Manifesto-ah pawh ka dah dan a ni a Pu Deputy Speaker, kumin atangin Pathian zarah hetia kan kal chhoh zel chuan Talent Search Exam kan neih tir dawn a ni, Class-viii zir chhuak ho tan. Khatiang zawng khan scholarship pawh MLA fund atangin kan pe dawn a ni.

Chumai bakah hei, kan policy te tak te ni mahse tangkai tak a ni a, kan local area atanga zirlai Delhi-a IAS coaching kalte chawmna tur kum khatah nuaih 9 dah ka rawt a, nikumah vanduaithlak takin Covid vangin ka thawn thei lo a, khami fund kha Covid dona a tan kan divert a. Tichuan, kuminah hian chhunzawm leh ang kan ti a, mahse kumin pawh vanduaithlak takin *austerity measures* atan nuai 15 MLA fund atanga lak let a ni a. Engpawhnise, kan policy hi duh ang taka kan kalpui theih chuan khawngaihtakin next year ah chuan MLA fund hi min cut sak tawh lo sela a lawmawm hle ang.

Pu Deputy Speaker, khami fix pay teacher SEDP hnuaia lak pawh kha a procedure a dik em tih hi ka ngaiantuah a. Kan Education Minister zahawmtakin District Council CEM hnenah lehkha pein, chumi khami school atan hetiang zirtirtu hi lak tur a ni a, in lo ngaiantuah dawn nia tiin D.O. letter pek a ni a. Pu Deputy Speaker, 6<sup>th</sup> Schedule-in a tih angin Autonomous Council hnuaiah hian pawl riat thleng chauh thuneihna a nei a, pawl 9 leh a chunglam chu state subject a ni. Khatianga MLA rawn lovin CEM hnena direct-a lehkha pek kha a mawi em tih ka zawt a, Pu Deputy Speaker, ziak lovin behind the scene-in telephone-a biak a chi zawk lo em ni ka ti a ni. Chuvangin, hun lo kal zel turah pawh party induhsakna a awm chuan over telephone-in a ruka inbiak a theih tho a, mahse CEM hnena

ziaka “Hei hi rawt rawh u, chumi school atan zirtirtu zawng rawh u” tia ziah kha chu a mawi lo a ni, Pu Deputy Speaker.

Demand No. 28-ah ka lut ang a. Labour, Employment, Skill Development & Entrepreneurship chungchangah hman atangin Subject Committee-III ah pawh kan sawiho thin a, LESDE hnuaih hian thil diklohma awmin ka hria a. Entirnan, LESDE hnuaih hian ‘time to time periodical training’ skill development training hi neih tur a ni a. Bial dang chu ka hre lova, tun thlengin ka bialah chuan training vawikhat mah kan la nei lo a ni, Pu Deputy Speaker. Contract work atangin 1% hi labour cess-ah a kal a, LESDE hnuaih hian sum chu a tam a ni. Nakin zelah keima bial bikah chauh ni lo, bial tinah phase-wise in eizawnna atan training buatsaiah ni se. Labour charge 1% chungchangah standing order pawh ka nei vek a, Pu Deputy Speaker, cheng khatmah cut loh turin standing order a awm a, mahse DC atangin MLA LAD fund-ah Civil Works atangin 1% kan cut zel hi chu a chhan min sawifiah sak thei se ka lawm ngawt ang.

A tawp nan Demand No. 25 chauh hi sawi ang a. PHE ah hian, chhim lamah, a bikin ka bialah tun thlengin (Minute khat lek, Pu Deputy Speaker) PHE tui connection nei lo tam tak an la awm a, khang zingah khan Chakma leh Bru Mizo khua tlangrama an awm avangin tui a harsa em em a, Parva -II leh Parva - III te pawh tui an harsa hle a ni. Chuvangin, hei hi chu ka chhiar chhuak lo mai ang a hun a tlem si a, tun thlengin khaw sawmhnih (20) vel PHE tui connection neihlohma khua an la awm a ni, Pu Deputy Speaker. A bik takin Longpuighat hi Chawngte aiin sumdawnna hmunpui zawk a ni a, sumdawn nan a tha lutuk a, “a very growing town” a ni a, mahse tun thlengin tui connection hi an la nei miah lo. Chuvangin, PHE Minister hnenah ka ngen duh chu, a rang thei ang berin, credit an la thei lo anih pawhin nakinah keimahin ka la mai ang tih kha min lo hriatsak se, kumkhat chhunga department lam atanga hmalakna a awm loh chuan ring well emaw, drilled well emaw ka pe mai ang, khilai bialah khian MLA ding turin opposition lam tumahin an hneh lo ang. Chuvangin, Longpuighat hi ‘growing town’ anih avangin tui connection an mamawh khawp mai tih zawng kha ka sawi theih tawk ni se. Ka lawm e.

**DEPUTY SPEAKER** : Aw le, a lawmawm e. Tunah chuan member zahawm tak Pu H. Biakzaua ilo sawm ang.

**PU H. BIAKZAU** : Pu Deputy Speaker, ka lawm e. Member zahawm tak, ama intih dan takah ‘One man Admi’ kha hun i pek belh rei bawk a, a laklawh hle dawn mai a, dar khat rik hma chu min pek belh ve ka beisei a ni, Pu Deputy Speaker.

Demand No. 20, Education Department hi department pawimawh berte zinga mi, pawisa pawh hman tamna leh thawktu pawh tamna a ni a, a pawimawh khawp mai a, tun term kan kal chhung hian he department hnathawh hi a tha hlein ka hria. A hniam lam (Elementary) zirtirtu indaihlohma eng emaw zat lak a ni tawh a, Grade-IV te pawh eng emaw zat lak a ni tawh bawk a. Tin, Education Policy te pawh duana tih chhoh mek zel a ni a,

India ram pum hman turin National Education Policy a awm rup tawh a, training khan kan zuk kal ve a ni a keini pawh. Eng tikah nge kan hman theih dawn chu hriat a ni chiah lo a, mahse, Education chu department ngaihpawimawh berte zinga mi a ni lo thei lova.

Ka biala hmalaknaah lawmthu han sawi hmasa ta ila. Sangau Higher Secondary School lumpsum ni thin kha Samagra atangin enkawl a ni a, Lawngtlai-ah pawh Science stream kan nei tawh a, Higher Secondary School-ah. Tin, tunah hian class room extension te, DIET, Thingkah, Lawngtlai District a mi leh Govt. Region Higher Secondary School building extend te, chutiang chuan hnathawhna a lang chho zauh zauh ta a, a lawmawm hlein ka hria a, a changtu Minister hnenah a hmasain lawmthu ka sawi a ni.

Pu Deputy Speaker, a dawt leha ka sawi duh chu, chutianga tan an lak em em laiin High School-ah hian, a bik takin Headmaster indaih lohna a nasa lutuk a, hei hi ka bial chhungah lo hian hmundangah a awm ve em aw ka ti a. Ka bialah chuan Govt. Region Higher Secondary School, Lawngtlai-ah hian Headmaster pangai nei lovin charge lak a ni a, tin, Govt. Modern High School, Lungtian-ah pawh Headmaster pangai a awm lova, Govt. High School Ramthar Lungpher-ah te, Govt. Lai High School, Vawmbuk-ah te, Govt. Blue Mountain High School, Sangau-ah te Headmaster an nei lova, a then an bang a, a then an pension a, Headmaster tak nilovin charge an la a, hei hi Headmaster tak an awm loh chuan zirtirtu indaih lohna a nasa em em bawk a, a tul khawp mai a, min hriat sak se ka duh hle a ni.

Tin, mahni bial lam harsatna sawina hun deuh a ni bawkin ka hria a, Pu Deputy Speaker, Bualpui ‘NG’ Higher Secondary School pawh hi Lumpsum Grant-in-Aid atanga enkawl a ni a, hei hi Samagra-ah hlan kai ni se tiin Minister zahawm tak hnenah pawh ka dil thin a, vawiinah pawh hian min hriat nawn sak leh thei se ka duh khawp mai a. Samagra RMSA-a kan han hlan kai khan, building hi sak a nih loh chuan High School-ah an bet a, an leng lova, problem a awm tlat mai a. Chutiang chiah chuan tunah pawh hian Blue Mountain High School Sangau kha Samagra-ah Higher Secondary School kan dah leh tawh si avangin building an intawm a, building sak thuai anih loh phei chuan harsatna kan tawk mek a ni.

Tin, a bik takin IV Grade leh LDC, non-teaching staff indaihlohma a nasa khawp mai a, ka bial Sangau-ah pawh LDC kan nei lova, Lungtian leh High School dang dangah pawh IV Grade an awm lova, zirtirtu ten LDC leh IV Grade hna an thawk kawp a ni. Hengte hi kan Minister leh kan House Leader zahawm tak pawhin kan indaihlohma zualpuite han phuhruk hi a vaia tih theih chu a ni lo ang a, min hriatsak se ka duh khawp mai. Sawi tur tam tak a awm a Education-ah hian, mahse hunin min dair leh dawn lova, khati chin kha ni mai se.

Demand No. 28, Labour, Employment, Skill Development & Entrepreneurship hi Pu Deputy Speaker, ka sawi duh chu, hmanah pawh ka sawi tawh a, kan District Headquarters Lawngtlai-ah department office mumal tak a awmloh avangin LDC pakhatin

a buaipui ringawt a, Chawngte atangin Lawnglai hi awp a ni a, chuvang chuan kan thalai tam takte inziak lut duh leh hnathawk in register duhte pawh a mumal lo ta a. Tun hnai lock down-a tanpuina tur kan han tihte pawh kha mi tam tak dawng awm si, inziah luh loh avanga dawng lo kha an tam em em ta mai a, thalai hna zawng lai pawh inziak lut lo kha an tam a, hei hi office mumal loh vang a ni a. Chuvangin, District Headquarters-ah hi chuan LESDE Department hian office mumal tak officer awm theihna hi nei thei se a tul hlein ka hria a. He department hi min khaikangtu leh kan thalaite leh hnathawktute harsatna mi tam takin a zar an zo theihna tur department pawimawh tak niin ka hria a, chuvangin Lawnglai District Headquarter-ah hian Employment Officer min dah sak turin vawiinah hian ka ngen duh a ni.

A dawt lehah chuan Pu Deputy Speaker, Demand No. 25, Public Health Engineering hnuiah JJM kalpui a ni a, kan Deputy Chief Minister zahawm tak PHE enkawltu a tang hle a, theihtawpin tan a la a, ka bialah pawh ‘In tina tui connection pek tur’ tih policy atangin khaw thenkhatah chuan pek zawh tawh te pawh an awm a, a lawmawm hlein ka hria. Chutiang anih lai chuan tui connection pek theihloh, tui source nei tha lo engemaw zat an la awm mek a, chuvang chuan a hma lama hma min lak sak vawiinah hian ka han ngen duh a. Pangkhuu tan Deputy Chief Minister zahawm tak, PHE enkawltu ni bawk hian NABARD atanga tui lakna min pe a, a lawmawm ka ti khawp mai a, lawmthu pawh ka sawi a. Hna erawh chu an la tan chiah lova, hei pawh hi hna tan thuai theih ni se kan duh khawp mai tih te ka han sawi tel duh a.

Tin, a dawt lehah chuan Greater Lawnglai Water Supply Scheme hi tunhma pawhin ka sawi tawh a, helai House zahawm takah pawh ka thlen tawh a, mahse hma lak vat vat theih pawh a ni bik lova, sawrkar kan la kal rei lova. Urban-ah Lawnglai khua a awm tawh a, Greater Water Supply Scheme neih lai hian Rural a ni a, hna an thawh zawh hmain Urban-ah Lawnglai khua kha hlankai a lo ni a, a project kha 40 LPCD rural-a an hman thin ang a ni a, chawpchilha tih danglam theih mai a ni lova, urban-ah a lo awm a, a hna a kal a, a zo tawh a, rural anga a la kal reng khan tunah hian tui indaihlohma a nasa em em mai a. Chuvangin, urban-ah hlankai ve a nih tawhna angin Lawnglai Greater Water Supply Scheme hi augmentation tia 40 atanga 70 LPCD ah hlankai ve thuai a nihlo chuan Lawnglai-ah hian tui kan harsa tan khawp mai a, kan indaihlo tan a. Chuvangin Lawnglai tui lakna hi 40 LPCD atangin 70 LPCD-ah augment thuai turin concept paper pawh hmanah thehluh a ni tawh a, vawiinah hian min hriatsak leh se tih te ka rawn ngen leh duh bawk a.

Pu Deputy Speaker, a tawp berah chuan Lawnglai District chhung hi a inkar kik deuh hlek avangin Sangau RD Block huam chin zawng hi Saiha PHE Division E.E enkawlna hnuiah a awm a, harsatna tam tak kan tawk a ni. District khat ni si, district dang atanga enkawl anih avangin problem tam tak kan nei thin a. Chuvang chuan, Sangau RD Block huam chhung bik lam hi Lawnglai PHE Division hian enkawl thei mai tura ngaihna, ka lo rin ve dan chuan a awmin ka ring a. Kan Deputy Chief Minister zahawm tak leh kan House Leader zahawm takte pawhin helai siamrem, department restructuring ang chia tih tur nge

ni ang a, mahni district chhung enkawl lova district dangin an enkawl khan thil tam takah harsatna kan tawk thin a, chu pawh chu min hriatsak se ka duh a. Pu Deputy Speaker, ka lawm e.

**DEPUTY SPEAKER** : A lawmawm e. Minute thum leh tlem kan la nei a, tunge han sawi zo thei kan awm ang em le? Nge, kan chawl mai dawn em ni? Anih leh hun a ral a ni mai a, kan chawl rih ang a, chawhnu dar 2:00-ah kan tan leh dawn nia.

### *Recess (1:00 PM)*

**2:00 P.M.**

**DEPUTY SPEAKER** : Aw le, tunah chuan Pu C. Lalmuanpuia, MLA  
zahawm tak ka sawm ang a, ani hi chawhma lampang atanga book tawh kha a ni a.

**PU C. LALMUANPUIA** : Pu Dy. Speaker, ka lawm e. Hei vawiinah kan Minister zahawm tak tak te Demand sawi theia ka awm hi ka lawm hle a, Pathian hnенah lawmthu ka sawi a ni.

Demand No. 20, School Education hi han sawi hmasak ka duh a. Pu Dy. Speaker, School Education hi a pawimawh khawp mai a, kan ram tan phei chuan a pawimawh lehzualin ka hria a. Zirnain hma a sawn loh chuan kawng engkimah hmasawn a harsa a, tin, hmalakna kawng hrang hrang a kipui ber chu School Education-ah a intan lo thei lo a ni. Pu Dy. Speaker, hei kan Chief Minister Pu Zoramthanga kaihhruaina hnuiah sawrkar thar a lo ding a, Education Minister tha tak mai Pu Lalchhandama Ralte kan han neichho a, zirna lamah an tang hle a, kan tang hle a. Indaihlohna hrang hrang a lo tam a, school building te leh a thawktute pawh kawng hrang hranga thuam that ngai a ni a, chung kawngah chuan tun kum 2 kal ta mai chhung pawh khan hmuh tur a takin a lo lang a. Kan Zirna In te thuam that a ni a, tin zirtirtu indaih lo te pawh lak belh an ni a. Tunah hian zirtirtu pangai leh Hindi teacher mi sanghnih dawn mai lak belh an ni chho a, thuam that an ni te hi a lawmawm hlein ka hria a. Amaherawhchu, zirtirtute hi indaih tak tak a har dawnin ka hria a, a chhan chu nitinin ti ila, thla tin te pawh a tih theih awm e, pension-te an lo awm a. Tin, vanduaina, chhiat tawh avanga boralte an lo awm a, post kha a hnawhkhan leh maitheih si lo a. Engemawzat zirtirtute hi lak belh leh thuam that pawh nimahsela chutiang kawngah chuan hmalakna tur tam tak erawh chu ala awm a ni.

Tin, ka vei deuh pakhat chu tun kum 2 chhung maia tihhlawhtlina awm pakhat leh chu zirna chungchangah LESDE hnuaiah hian Mizoram Youth Commission te an tang em em mai a, kan NGO lian ber YMA te pawhin zirna uar kumah te an han puang a, chutah chuan Super IAS, 2020 tih chungchang hi a ni a ka han sawi duh chu. Kan ramin kan mamawh em em a, Central Service IAS, IPS te leh Central Service tam takte Mizo te, Mizoram atang hian kan tlem tial tial a, chumi a tan lakna thar a taka lo lang ni te kan han hmu a, mi 20 te chhawpchhuah an han ni a. Tunah hian ALS leh Chanakya, Delhi-ah te

10/10 a training/coaching an han kal te hi a ropui ka ti a, kan hmalam hunah hian beiseina thar education-ah leh kawng hrang hranga kan ramin a ke a pen chhohna turah hian min siam sak a, hei hi a chhuanawm ka ti a, a lawmawm ka ti khawp mai.

Pu Dy. Speaker, kan NGO lian ber YMA pawhin an vei a, kan ram kalchho zel turah hian engtin nge ke kan pen zel ang, hetianga kan ram a awm chhohna turah hian mi hmasate, kan IAS, IPS te leh Central Service dangte an pension chho a, tunah hian tlem te, direct phei chu tih tham pawh kan nei tawh lo a ni a. Chuta kara hetianga hmalakna ropui tak mai a lo awm hi a lawmawm ka tiin a chhuanawm ka ti khawp mai.

Tin, kawng hrang hrangin hmasawnna kan hmu a, ka bial pawh ka sawi lang lo thei lova. Ka bial chhung Edenthal-ah pawh High Sikul te kan han din thar a, Pu Dy. Speaker, vawiinah hian kan Minister zahawm tak Pu Lalchhandama Ralte hnenah pawh lawmthu ka sawi duh a, a chhan chu Edenthal-ah khuan BSUP kan nei a, kan hriat theuh angin lei tawlh avangin Durtlang-ah BSUP hmun te a chhia a Edenthal-ah kan inbeng thla teuh mai a. Zirna hla zawk kal thei lote tan khulaiah khuan High School tunhnai lawka din a ni te hi mi harsa zawk dawm chhuah nan leh khawtlang tana tangkai tako hman tura High School din a ni te hi a lawmawm ka tiin a chhuanawm ka ti khawp mai. Sawi tur tam tak a awm a ka sawi vek seng dawn lova, hun a tawi si a, demand dangah hian ka han kal leh mai ang a.

Demand No. 25, Public Health Engineering Department hi han tarlan leh zuai zuai ka duh a. Hei, PHE department-in tui thianghlim in tur mipuite min pekna kawngah nasa takin hma a la hi a lawmawm ka ti a, Pu Dy. Speaker. Jal Jeevan Mission hnuiah chhungkaw 40,479 hnenah functional house-tap connection pek a ni tawh te hi a chhuanawm hlein ka hria a. Tin, NABARD hnuiah Water Supply Scheme pariat zagh tawh a ni te, tin, hei Alternate Gravity Water Supply Scheme Aizawl-a thawh mek a ni te, heng bakah hian Water Supply Scheme 14 lai NABARD leh AMRUT hnuiah te pawh heng project kalpui a ni te pawh hi a lawmawm hlein ka hria a ni.

Tin, house water connection pawh kan lo pe hnem hle mai a, khawpuiah hian 1,04,050 leh thinglangah 24,775 pek a ni te hi a lawmawm khawp mai a. Tin, PHE department hian a lo thawkchhuak nasa khawp mai a, heng connection atanga a an chhiah lak tlingkhawm pawh cheng nuai 3,050 chuang zet mai a han lalut te hi a lawmawm ka ti a, an chhuanawm khawp mai. Sawi tur tam tak a awm a ka tih tawh kha Pu Dy. Speaker. Ka han sawi zawr zawr mai ang a, hun a tlem si a.

Demand No. 46, heta ka luh hmain Pu Dy. Speaker, sawi hmaih hauh loh tur pakhat ka neih chu, tui thianghlim in tur chungchangah khan pakhat ka zep leh zauh ang a. Ka bial chhung Edenthal-ah Chhawnzinga Tuikhuah kan nei a, hun rei tawh tak atang khan tui lak theih a ni lova, Edenthal te, Hunthar te leh Chanmari ‘W’ chuanhnuai ina kan rin khu a ni a. Kan Dy. Chief Minister zahawm tak hian hma min rawn lakpui a, tunah hian Chhawnzinga Tuikhuah pawh siamthat a ni leh tawh a, leiminin a hnawh chhe vek a hun

eng emaw ti chen hman theihloha a awm hnu hian thanthawh leh a ni a, kan lawm khawp mai a, tun financial hma hian hawn theih ngei kan beisei tlat a ni.

Tin, UD & PA hi Pu Dy. Speaker, an hmalakna hi a ropui ka ti a, heng parking chungchang te, PAHOSS chungchang te chu sawi loha lum a ni a, kan khawpui tawt tihziaawm nana PAHOSS kan han kalpui te hi a chhuanawm hle a. Tin, kan khawpui enkawltu AMC chungchang hi han sawilan ka duh a, Dan siamthat a ni te, kawng engkimah kan Dy. Chief Minister-in hma a la a, AMC pawh tun 1<sup>st</sup> March khan sawrkar thar lakluh a ni a, a fu ke kimin Executive Council awm tawh ngai lo pali a han awm te kha lawmawm ka ti khawp mai a. Hun a tawi dawn khawp mai, Pu Deputy Speaker. Bawlhhlawh pailh chungchang te, tin, Smart City hnuia hmalakna bung hrang hrang sawi tur a tam khawp mai a, vawiinah hian kan sawi seng lova.

A tawp berah chuan, kan khawpui enkawltu Aizawl Municipal Corporation te thuamthat a ni a, a fu ke kima a kal tur hi a lawmawm ka ti a, hmathlir thui tak neiin he kan Jerusalem Aizawl khawpui hian hma a sawn ngei ka beisei tlat a ni. Ka lawm e.

**DEPUTY SPEAKER :** Awle, tunah chuan Member zahawm tak Dr. Vanlalthlana ka sawm e.

**DR. VANLALTHLANA :** Pu Dy. Speaker, ka lawm e. Demand No. 18, Minister Pu Lalchhandama Ralte chan hi ka sawi hmasa ang a.

Pu Chhantea department chan hi a pawimawh hlawm ka ti khawp mai a. Mizoram hmalam hun kawltu a ni tih hi ka sawi fo thin a ni a. School Education a chang a, Labour, Employment, Skill Development & Entrepreneurship a chang bawk a, heng department pahnih atang hian thil tam tak atih theihin ka hria a. MNF rawn sawrkar tirh khan a budget kha a rawn pungchho nghal a, Education budget kha 23% in a pung a, a kum lehah 17% in a pung leh a, tunah chuan Covid vang te pawh a ni ang a, a minus zawngin a kal ta a. Amaherawhchu, a tam lo hlauh a, 1.5% vel chauhin a tla hlauh zawka a lawmawm letling ka ti a.

Education hi kan Sports Minister khan, ‘Sport hi education a ni a, skill development pawh sport vek a ni a’ a ti a. Chuvang chuan Sports & Youth Services Department neih pawh hi a ngai tawh em ni aw, Youth Services Department hi awm tawh mai sela Sports hi Education Department hian la tawh mai se tih te rilruah a awm rum rum a, particular-ah a lut vek tawh tho si a tih te rilruah a rawn lang a. Tin, SEDP ka han en a, SEDP hi sawrkarin inthlan dawnah, ‘hetiang hian kan ti dawn e’ a tihna a ni a. Budget pathumna a ni tawh bawk a, en a hun tawh viau mai a tiin ka han thlir kual a, thil tam tak sawi tur chu a awm. Mizoram Education Service te, thil hrang hrang Directorate of Manpower Development LESDE te, tin, Mizoram Institute of Skill Development Entrepreneurship te leh Mizoram Techno Park te kha budget-ah dahluh tan a hun tawh lawm ni, ngaihtuah a hun tawh ang a? Sawi leh sawi

hnu SEDP khawnpui vaibelchhe 400 kha kan hmu deuh lurh tawh zel mai a, chutiang chuan rilruah a rawn lang a. SEDP kan intiamna bu kha keu a hun tawh viau e ka rawn ti a ni.

Tin, zirtirtu salary hi nuai 1,635 laiin a tlahniam a, pension tur an tam ang a kan hnawhkhat hleithei lo dawn chu anih hmel a. Amaherawhchu, contract lampangah lakbelh tumna a awm a ni ang e, nuai 862-in a rawn pung ta a, wages ah khan; primary leh middle school lampah khan lakbelh tumna a awm an i ang e tihte rilruah a lang a. Capital expenditure atana engmah dah a nilo kha keipawh a hrehawm chu ka lo ti a. Zirtirtu ka ni ve a, education te kan ngaipawimawh a, ka sawi fo thin mi harsa te te private school-a fate kal tir ve theilo ten sawrkar school-ah an fate an kal tir a, mirethei kan ngaipawimawh a dawmkan kan duh a nih chuan, school kan ngaipawimawh tur a ni. School Education atang hian kan tan tur a ni; ram changkanna pawh education atanga intan a ni deuh zel a, chuvang chuan capital expenditure-ah hian theihtawp kan chhuah a ngaiin ka hria a.

Tin, kan Minister hian rawn react se ka duh chu, school ram khawtlangah peka, multipurpose hall ang chia hman tumna te thenkhatah chuan a awm a. Ka bialah pawh hmun hnih hmun thumah tih tum a ni a, Aizawl-ah pawh tih mek te, tih tum te a awm a ni a, hetah hian zirchianna lo nei tawhte hovin an zawngchhang em tih te kha hriat a chakawm khawp mai a. Tin, 15<sup>th</sup> Finance Commission-ah *performance grading index* hmangin education-ah pawisa inpek a ni ang tih a ni a, keini hi PGI ah hian kan hniam khawp mai a, a hniam panga zingah kan awm a, hetah pawh hian tan lak a ngai khawp mai. Sum an dah hnem bawk si a, MPSC kaltlangin Higher Secondary zirtirtu sawrkar hmasa khan a la a, chungte pawh chu a then chu department thenkhatah chuan MPSC kaltlanga dahngheh te an lo ni tawh a, chungte pawh chu hmalak tumna a awm em tih ka zawt tel duh a.

Tin, PMJVVK-ah, kha Sports-ah khan nuai tam fe mai, nuai sing chuang kan sawi a. Education pawh khan an dil a, amaherawhchu hmuh a ni ta lova, khatah khan private school te a lo tel nawk mai a, kha kha engtia tel nge anih, an tipalh nge, UDISE atang khan an check leh si a an niin, khangte kha tih leh hunah chuan fimkhur ava tul tawh em tih ka rilruah a awm a.

LESDE-ah ka han lut leh nghal ang a. Nichina ka sawi ang khan, Mizoram Youth Commission a awm a, SEDP lehkhabuah chuan, hei mai hi duhtawk loin ‘Directorate of Manpower Development kan siam dawn’ tih a ni a, kan nghakhlel khawp mai. Tin, kan labour ho hi an Rights, an dikna hi an hrelo lutuk a, ti tawp ang, awareness pek an ni silova, anni tan inzira han inchhiar hleihtheih pawh a ni lova. ‘Labour cess’ kan tih mai atang hian programme siam a thain ka hria a, Dan hre mi tam tak kan nei a, chungah chuan sawi tur hi a tam khawp mai. Anni ho dawmkan emaw, chawikan emaw, anmahni dikna humhim ve theihna tur atan hian pawisa te hman ve theih ni ta sela tih rilruah a awm a. Mizoram Youth Commission te Covid-19 kan tawrh laiin theihtawp an chhuah a, report te kan hmu a, Member zahawm tak Pu Tanpuia’n a rawn sem tir a a lawmawm khawp mai a.

Hei, Skill a awm a, skill an neih tawh hnu khan finance a la ngai leh a, market zawnpui emaw refresher course tihte a la ngai a. Sawrkar hian a koh luhpui hi a ngaiin ka hria a, Gujarat te pawh an develop viau tawh e kan ti a, ‘Vibrant Gujarat’ an ti a, sawrkarin hmalakna hrang hrang a ti a, chutiang deuh chuan hma kan lak a ngaiin ka hria a.

Printing & Stationery-ah ka lut ang a. Printing & Stationery hi sumdawng ang deuh a ni a. Sawrkar tirh khan hma a sawn zel a, chengkhatah naia 10 a hmu a, 2019-ah khan, 2020-ah chengkhat an hman ah naia 11 an hmu let a. Tun budget-ah hian chengkhat an hman zelah naia 14 hmulet tur angin, chu chu Revenue Receipt budget atangin hmuh a ni a, hma an sawn zel a. Amaherawhchu hei aia hmasawn dan hi a pawisa lalut zawng hian department pawh hi nawr nat deuh a ngai lo maw tih kha rilruah a lang a.

Tin, Minister zahawmtak Pu Tawnluia department ah han lut i la. PHE hi hlawahah a tlahniat ve leh a, hei te pawh hi an pension then dawn em ni tih te rilruah a awm a. Tin, Pu Tawnluia hi, kumin hi a vannei a, a budget hi nikum aiin a letin a pung a ni. Scheme hrang hrang nikum aiin central atangin kan dawn te a rawn pung vak mai a, hei, *cost of energy for pumping*, tui pump-naah hian diesel hman a ngai thin a. Kum hmasalamah vaibelchhe 30 dah anih laiin kumin hian vaibelchhe 25.50 dah a ni a, petrol leh diesel man te a to chho si a, hetah hian engtin nge ni dawn, solar lampang kan hmang dawn ta nge ni tih te rilruah chuan a awm a.

UD & PA lamah ka han kal ang a. Ramthar Veng, ka bialah sawn Hall tha deuh mai sak mek a ni a, amaherawhchu estimate tihdanglama a chhawngte pahih then a ni tih te kan lo hria a, kan lo beisei san viau laiin khatianga a awmtur kha uihawm ka ti viau mai a. Veng pakhatah erawh chuan, a hmaa nuai 200 sanction-ah khan nuai 200 pek belh an ni leh si tih te kan han hre leh a, khang kha kan pe kual leh ta mai em ni aw tih te rilruah awm a.

Hei, Housing for all,h hian nikum RE-ah nuai 352 dawn kan beisei laiin, vaibelchhe 93 vel dawn a ni a, hei hi mipuite pawhin an ngaihvenin ka ring a, housing, insak tur neilo ho chuan an ngaipawimawh viauin ka ring a, dil turté pawhin kan inhri tam te pawh angaiin ka ring.

Hei, SIPMIU project hi a tawp tan tawh a, engtikah nge state sawrkarin a kal chhunzawmpui dawn tih kha ka zawhna ni ta se la. Tin, Aizawl bawlhawh pahihna hmun khu a khat tawh a, a khawihtute pawhin tihgaihna an hre tawh lo a ni, SIPMIU bawlhawh pahihna khu. Motor an intlar a, vawiinah pawh an buai ru viau a ni tih te kan hria a. Khu khu AMC sawrkar tharte pawh a awm bawk a, hmalak dan ngaihtuah a ngai a, kan Minister hian engtin nge tih a tum tih kha min han hrilh hram sela ka duh khawp mai a.

Tin, DP&AR hnuiah hian Pu Dy. Speaker, tlem han sawi belh lawk ka duh a, *Certificate in Computer Course* kha thawk khat lai khan Mizoram State Technical Board-in a pawmpui loh chu a theih loh tih a ni a, phaia zirchhuak kha an lo hnareh teuh mai a,

notification chhuah fel tawh chu a ni naa. A hmaa hna lo dil ve ho harsatna tawk an awm teuh mai a, khang hote kha ngaihtuah chu an ngai khawpin ka hria a. Hemi chungchang hi notification a chhuak tawh naa, ngaihtuah chian deuh a tulin ka hria a, department lam hian an la hre chiang lo ni ten ka hria a.

A tawp berah chuan UD&PA-ah nikum hmasa khan kan CM zahawmtak hian, Delhi-a ka chamlai a ni a, “Chanmari leh Kulikawn inkarak hian elevated road kan siam dawn a, hei hi central UD & PA Minister pawh ka bia a, a phur lutuk a, project pawh kan thehluh hmain a enturte pawh a rawn tir dawn e” a ti a. Hei hi an rawn kal ta em? UD & PA hnuaiah hian hmalak tum a ni ta em, tikhka ka zawt tel duh a ni e. Ka lawm e.

**DEPUTY SPEAKER :** Awle, tunah chuan member zahawmtak Pu L.Thangmawia i lo sawm.

**PUL THANGMAWIA :** Pu Dy. Speaker, ka lawm e. Demand 46, UD & PA atangin han sawi tan i la, lawmthu sawia bul tan a ngai a. Kan beisei phak lohin hotute duhsaknain Ngopa chu ‘Town’ a puan a ni ta a, kan lawm viau a, House zahawmtak kaltlangin lawmthu ka sawi a. Tin, 2024 ah Mizoram pum huap KTP General Conference kan thleng dawn leh nghan a Ngopa-ah hian, hengte nen pawh hian a in -hmeh viau a ni tih kha ka sawi hmasa duh a ni.

Tin, MNF sawrkar hnuah hian khawpui chhunga hmalakna tam tak hmel thar kan han hmu te hi a lawmawm viau mai a. Chubakah hmalakna langsar lem lo, mahse ngaihthah hlawh fu thin si, hei AMC a hnathawkte a kuma kum eng emaw zat mai kan nghet dawn nge dawn lo tih ngaihtuaha rilru hah taka an lo awm thinna kha MNF a sawrkar a, kan Dy. Chief Minister-in chak taka hmalain AMC-ah post 98 an siam thar tawp mai a. Hei hi a thawksa tamtak an thawh dan mumal lote target-a tih a niin ka hria a. Ni 21.10.2020 khan, “The Mizoram Municipality Common Cadre Service Rules, 2019” leh “The Mizoram Municipality Subordinate Service Rules, 2019” a ti chhuak bawk a. He rules hmang hian kum 10 chhung zet mai AMC-a thawktu service condition tha lo tak chu siamthat a ni a. Tun hnai pawh khan Pu Dy. Speaker, mi 48 zet mai Group A ah 2, Group B ah 8, Group C ah 21 leh Group D ah 17 te chu an hnaah dah ngheh an ni a, kan veng, Mission Vengthlang atang pawhin a nghet an awm a, lawmthu min rawn hrilh vang vang a ni a, a titu ni si lo kha sawrkar lama a ka lo awm ve avangin, chungte chu he House zahawmtakah hian kan sawi duh a. Tin, hun lo kal zel turah pawh ‘town’ hi khaw 30 kan la awm tling loin ka hria a, hengah hian UD & PA hmalakna zar hi khaw tam takin a zo chho zel dawn a ni.

A dawt leh chuan Pu Dy. Speaker, Demand No. 25, PHE hi ka sawi leh ang a, hei pawh hi lawmthu bawka bul tan a ngai a. Kan sawrkar hnuah hian solar pump hi Khawkawn, Khawdungsei leh Chiahpui intawm tur hi nikum atang khan kan hmang thei ta a, Mimbung leh Hriangmun intawm tur pawh kha zawh tawh a ni a, an hmang tawh bawk a, a lawmawm khawp mai a. Tin, tunah hian Hliappui-ah hmalak mek a ni a, kuminah phei chuan tui pump

lut hman turah kan inngai a. Ka bial ringawta hmalakna, kan sawrkar hnuu mi pawh hi puitham tak a ni a, a lawmawm khawp mai. Tin, tunah hian Kawkulh, Ngopa, Teikhang, Kawlhem, Changzawl leh Chhawrtui leh Vanchengpui-ah te solar pump hmang turin project an rawn siamtha mek a JJM hnuuiah, hengte pawh hi Minister zahawm takin min lo hriatsak sela. A bik takin Ngopa hi KTP General Conference thleng tur kan ni a, kumin atanga tan loh chuan tui kan lo harsa hman mai ang tih a hlauhawm a, a vaia a pawimawh rualin ka han ngen bik ni se.

Tin, Mizoram hian gravity la tha si tui pipe kum 20, 30 chuang anih tawh tui pipe tuiek avanga tui pek that theih tawh loh tam tak a awm a, hengte gravity-a lak mai theih, pump kher ngai lova identify-a ka bialah pawh hriat sa ka nei a, mahse ka sawi rih lo ang a. Mizoram pumah pipe repair ngai identify tur ang chi kawng te hi a zawn theih ang em aw tih kha Pu Deputy Speaker ka sawi ni se.

Tin, Personnel & Administrative Reform Demand No. 13-ah kal ta ila. Kan sawrkar tih atanga ka vei chu, Chief Secretary hnenah pawh D.O. letter ka ziak tawh a, hemi hna lak hrim hrime computer certificate ngai kan tih hi exempt leh a ngai thin tho si a, a then phei kha chu an ban tawhin ka hria a. Entirnan, Driver leh Nurse lakah pawh vawi hniih an exempt tawhin ka hria a, chuvangin a hnain a mamawh kha chuan R.R. ah tel zawk mai sela, chuti nilova kan tih khan exempt leh tho ngai khan a awm leh thin a. Computer thiam erawh chu kan promote a ngai a, hei hi computer thiamlo lak ka sawimawina a ni lova, amaherawhchu a hnain a mamawh loh thleng kha a huam tel ve tlat mai a ni, Pu Deputy Speaker. Nurse leh Doctor lak dawn tein exempt a ngai zel tho a, chuvang chuan a R.R lam zawkah khan computer certificate a ngai ti mai sela a nei ho chuan an dil mai ang a.

Tin, Demand No. 28, LESDE-ah hian ka han kal leh zung zung ang a. Pu Deputy Speaker, hun a tlem a, ka sawi zung zung ang a. MYC hi a thawk tha khawpin ka hria a, vawiinah hian ka fak duh a. COVID karah SEDP policy-a kan lo thun tel, "Mizo thalai competitive exam duhte a thlawmin Delhi-ah kan kal tir ang" tih te pawh COVID buai karah hma takah an tihiawhtling thei a, chuvangin a enkawltu, a nodal department LESDE Minister leh sum lampang ngaihtuahtu kan Chief Minister, kan Finance Minister ni bawk chungah pawh lawmthu ka sawi duh a ni.

Tin, labour cess hi tun aia hman tangkai dan a awm ang em aw ka ti a, kan pe chho zel si a, tuna a rules kan neih pangai hi kan siamna a rei tawhin ka hria a, tun aia Mizo thalaite tan leh kuthnathawkte, kuthnathawktu fate tan emaw tal pawha tun aia awmze nei zawka kal theih dan a awmin ka hria a Pu Deputy Speaker, hei hi kan Minister zahawmtak pawhin min lo note sak sela, tun aia hman tangkai dan tur hi zawn a hunin ka hre deuh hlek a.

A dawt lehah chuan, Demand No. 20, School Education-ah hian ka kal ang a. Hei pawh hi lawmthu bawk sawi a ngai a. North-east Khawdungsei-ah Educational Guest House

tha tak mai kan sawrkar hnuah min sak sak a, furniture leh thil dang erawh chu kan la dah thei lova, hei pawh hi riah theih turin min tihsak hma thei turah ngai ta ila. SDEO concerned ten nuai thum vel chuan a complete theih ang an ti a, khum te a la awm lova, amaherawh chu min sak sak hrim hrim kha kan lawm em em a ni tih kha ka sawi duh a ni.

Tin, Ngopa-ah hian sawrkar hmasa tawp dawn lamah khan hmanhmawh deuh khan SDEO office hawn a ni a, tun thleng hian office hrarpa a la nei lova, a hmun tur ram te kha chu khawtlang hruaitute nen kan en tawh a, PWD-in an hman tangkai loh anmahnri rama kawng kal thlang kha, khilama department mite chuan an remti tawh a, kan PWD Minister zahawm tak pawhin min lo note sak se, remchang hmasaah SDEO office hi min sak sak se tih hi ka ngen bawk a ni.

Tin, lawmthu sawina tur hi tam tak a awm a. Zirtirtu lak ringawt pawh hman zanah ka chhut a, MR teacher pakhat ringawt hlawh pawh hi a lo tam khawp a, tunah hna lak harsat em em laia mamawhna hriaa min han tihsak hi, kan Chief Minister zahawm tak leh a mamawh zia hriaa theihtawp chhuahu kan Education Minsiter hnenah hian lawmthu ka sawi lo thei lova. Kawng lehlamah chuan sen thlawnnah hian kan ngai palh ang tih ka hlau a. Sawrkar hi chhungkaw inrelbawl dan nen pawh Pu Dy. Speaker, a inang viauin ka hria a, chhungkua pawh kan fate, pawisa lo lut awm miah lovin lehkha kan zirtir char char a, sen thlawnnah a ni lo a ni. Chu chu hriain kan sawrkar pawh hian hma a la niin ka hria a, a lawmawm khawp mai a. Chuti chung chuan kum tin mai hian an pension a, High School zirtirtu leh Middle zirtirtu senior ho phei chu an la in pension chhawk chuah chuah dawn a ni tunah hian. Chuvang chuan engtin nge kan kal zel ang tih ka ngaihtuah hian Pu Dy. Speaker, kan mipuite hnena ka ngen duh chu, sawrkar policy dinglai reng *amalgamation* a awm a, tunah hian English Medium a awm a, tah khan an inluh siak deuh tawh si a, naupang 10, 20 te lek lek awmin Govt. Primary School te tam tak a awm a ni. Hei hi sawrkarin a tihluih vang ni lovin, an mamawh hunah chuan sawrkarin a hawn belh leh mai ang, tun atan chuan a panna hnaivai deuh, inkarkik lutuk lo kha chu khawtlang zawk hian amalgamation rawn rawt se, kan sawrkar policy dinglai a ni bawk a, zirtirtu chhunfin khan an indaih thei mai dawn a ni, zirtirtu pawh. Anih loh chuan zirlai 20 tan zirtirtu 4 kan han dah a, a piah lawkah zirlai 15 vel tan kan dah leh a, kha kha zirtirtu kan indaihlohnah chhan a niin ka hria a. Hman atang tawhin he amalgamation policy hi kal tawh a ni a, he House zahawm tak kaltlang hian Pu Dy. Speaker, khaw hrang hrangte pawh ka ngen duh a. School tam hi khawpui nihna pawh a ni tawh lo, English Medium School kha Primary School pakhat, Middle School pakhat anga kan chhiar thiam ve a hun tawh a ni. Zirlai an tama an len loh erawh chuan sawrkarin a ngaihtuah thei zawk dawn a ni.

National New Education Policy pawh hi kan hmang tan dawn anih hmel a, hetah pawh hian kan hotute, a bik takin Cabinet Member te leh a hotupa ber kan Chief Minister pawh ka ngen lawk duh chu, sum senna tur tam tak a rawn awm chhoh hmel tlat mai a, expert group Chairman-ah kan Education Minister-in min rawn ruat ve tlat mai a, kan han

thutkhawm hian tam tak chu sum sen ngailo ni mahse, a then chu sum sen ngai te pawh a ni a, chuvangin hengte pawh hi ngaihtuahna min lo neihsak se.

Tin, nikum, kum tira High School zirtirtu 157 MPSC kaltlanga lak phal sa kha COVID avang khan Cabinet Meeting-in hna lak a rawn khar ta si a, khatah khan kan Education Minister-in chak taka hma lain *stop gap arrangement* atan (High School thenkhat chu zirtirtu an pension zo vek tawh a lo ni a, Pu Dy. Speaker) cheng nuai 157, thla khata ₹10,000/- hlawh tur local level-a lo lak mai tur ang chi, pawisa SEDP atanga kan Chief Minister-in kan Education Minister zahawm tak ngenna ngaipawimawha min han pe hi a lawmawm khawp mai a. Ka bialah phei chuan Govt. High School Saichal tih loh hi chu nikum hmasa atang khan MLA fund-in ka ruai vek tawh a ni. Kumin erawh chu hei hian min chhawk nasa mai a, a lawm zual ka nih ka ring a.

Tin, a tawp nan, Pu Deputy Speaker, ka sawi chak loh tak mahse sawi ngai a ni a. ngaihtuahna ka hman vena, hei hi ka sawi anga ka duh tawk ang. Zirtirtu pakhat a pension hian lak leh mai hi a lo har em em mai a, hotute duhsakna changa mipuite zara MLA ka nih ve hnu hian ka hre thiam ve chauh a. DP & AR-ah, chumi hnuah Finance-ah, chumi hnuah MPSC lak tur anih chuan MPSC-ah a lo ni leh a, a lo berah kum khat, sawrkar hian hma la ngar ngar mahse a ngai tlat mai a ni. Thenhlum High School zirtirtu emaw a lo pension a, a ai la tur khan a process a thui lutuk a ni. Amaherawhchu, MNF sawrkar hmasa-in policy a lo neih leh scheme, sawrkar thenkhatin ‘kihhnawk’ min tih sak tha em em mai hi a lo awm a, chu chu ‘Adhoc Aided’ hi a ni. Tunah pawh ka bial, Dulte High School-ah kumin kumtir khan vanduathlak takin science teacher pakhat a boral a, ka tawrhpu khawp mai a. Amaherawhchu, naktuk hian a aiawh kan la leh nghal mai dawn a ni; Khawzawl-ah interview kan nei ang a. Adhoc-a thawkte chu rilru chuan sawrkara an luh emaw chu ka duhsak lutuk, khalai kha ka sawi chhe lo Pu Deputy Speaker, amaherawhchu a ruah khan lak leh a har thin si a, Adhoc hi zirtirtu indaihloh a awm lo a, Chuvangin hetiang zawng deuha ngaihtuahna kan sen te hi a tha em tih kha ka rilruah a lian khawp mai a. Khatianga kan tih chuan sawrkar School-a indaihloha kan tih pawh hi, thla thum chhunga hnawh khah zel theihna scheme a awm chuan zirnain a tuar lo ang a, zirnain a tawrh chuan kan ramin a la tuar leh tho tho dawn a ni.

Vawiinah zirnaa kan mi hlawtling tam tak kan lak hian ram dang mithiam kan rawih tur tam tak hi kan *safe* dawn a, kan ramah production leh industry te thlengin a rawn ti tha chho dawn a ni tih kha. Min lo hre thiam a ka lawm e. Ka khatliam deuha ka han la rei deuh a ni, Pu Deputy Speaker. Ka lawm e.

**DEPUTY SPEAKER** : A lawmawm e. Tunah chuan Member zahawm tak Pu Zothantluanga ka sawm e.

**PU ZOTHANTLUANGA** : Pu Deputy Speaker, ka lawm e. Vawiin hian demand paruk lai mai sawi tur a awm a, tawng muang tan phei chuan sawi tam hman a har dawn

viauin ka hria a. Pakhatnaah chuan, Demand No. 20, School Education chungchang hi han sawi hmasa ila.

‘Education is all round development’ tih a ni a, education-a hma kan sawn loha kan san loh chuan hmasawnna dangah kal thin mah ila hmasawnna tluantling kan nei dawn lo a ni tih a chiang a.

Sawrkar thar, Pu Zoramthanga sawrkar thar awm tirh atang khan primary education-ah hi chuan hma kan sawn khawp mai a, Sikul naupang tlemte, zirtirtu engemaw zat dahna thinte-ah khan tunah chuan zirtirtu kan neih belh thin tak avangin school naupang an lo pung chho a. A bik takin Aizawl West-I bialah phei chuan private School aiin a tha zawk emaw ni chu aw tih tur school pathum lai kan nei a. Admission hunah School-a leng bak kan admit thei lova, naupang tam takin admission an hmuh lohnate pawh kan nei chho tawh a. Chuvangin, kan Education Minister Pu Lalchhandama Ralte hmalakna a ropui a. Hindi zirtirtute pawh kan han la chho a, mahse, qualified an tam loh a vangin post vacant pawh fill up hleih theih lohin tun thlengin kan awm a. Kan budget a tlem a, amaherawhchu, kan budget kha kan innghahna ber tur erawh a ni lo turah ngai ila, a chi anih dawn avangin pek belh ngai ber pawl a ni turah ka ngai a, lawmthu ka sawi rualin ka bialah chuan zirtirtu pali aia tlem awmna School 10 a la awm a ni. Chuvang chuan pek belh hi kan la ngai khawp mai a, naupang class la vek thei lo school kan la nei teuh tih kha min hriat sak ka duh a.

MZU kan hria a, Tanhril-ah a awm a, nimahsela a feeding college chu sawiloh Higher Secondary tak ngial pawh tunah hian kan la nei lo a. Amaherawhchu, hman deuh kan Chief Minister leh Minister pawimawh tak takte nen ‘Look West’ tih ang zawnga kan han kal khan Ch. Chhunga High Schoolah khuan Higher Secondary dah ve nise tih te kha min han sawipui a, a awm khawp mai a. Khulai bial pumpuiah khuan Higher Secondary School kan la nei lo a ni. University a awm a, a karah college a awm a, Higher Secondary kan lo nei a, college te kan neih chhoh chuan kan University chawmtu tur kan neih belh zel ang tih kha a rin theihin ka hria a. Tikhan Education chu duhtawk hrih mai ila.

LESDE, Demand No. 28-ah khan, labour cess hmangin kan thalaite mamawh leh mi rethei leh harsate phungbawmin an lo awm tawh thin a. ITI-te kan nei a, chumi hmang chuan thalai ten thiamna trade hrang hrangah an lo neih belh chho a ni a, hengah te pawh hian a aia changtlung zawk, tha zawka kan kal chhoh zel theih a pawimawhin ka hria a. Ka hma ami ten an sawi tawh ang khan MYC pawhin LESDE atangin nasa takin thalaite hmakhua ngaihtuahin an thawk mek a ni a, abik takin Covid-19 avanga kan buaina kum hlui atang tawhin ram ropui an ni emaw, ram lian an ni emaw, ram haus a emaw tumah a zuah lova. Chutih rualin keini ang state rethei leh harsa leh state te pawh min hlahthlem chuang lo a, kan zavaiin kan tawrh dan kha a inang vek a, vawiin thleng hian chu chuan min la chen chilh mek a ni a. Hetih lai kara kan sawrkar-in hma department hrang hranga a lak hi a ropui ka ti a, lawmthu ka han sawi duh a.

Demand No.25, PHE chung changah hian, Tanhril Industrial road thlang lampang atang khuan Tlawng hi SIPMIU-in a rawn pump leh dawn a ni. Chu pipeline chu tunah hian siam mek a ni a, an zaghun tur takah an la zo thei lova. Tunah hian hmalak mek a ni a, veng tin maiah hian tui harsatna kan la nei tih hi phat rual a ni lova. Amaherawhchu, SIPMIU-in an project hi a zaghunah chuan khulai Tlawng atang rawn hipin a hma a kan project awm tawh sa aia pipe lian zawk hmang hian Aizawl hi min rawn chawm dawn a ni. Project an zawa PHE Department-a an handover hunah chuan tui connection kan neih belh ang a, tui kan lakluh belh ang a, chu chuan Aizawl khawpui harsatna hi nasa takin a chhawk dawn a ni tih kan hria a.

Tin, Sairang hi tuilen apiang in harsatna kan tawk a, tuitla te an awm a, kan zawng a. Tui nu leh tulian kan tawrh lai reng hian Sairang bikin kan tui lakna khu tui nut lai chuan in tur kan lak pawh a nu tho mai a. Hmanniah Deputy CM zahawm tak leh kan hotute awm khawmna hmunah ka sawi a, min ngaihtuah sak an tumin ka hria a. A tui hawng chu a tha, mahse fur ruah a tlaka, tui a lena a nut khan, tui nu tho kha kan tui lak atang hian a lo chhuak a. Chuvang chuan a treatment emaw a filter siam emaw chauh kha kan mamawh a.hei hi min hriatsak se ka duh khawp mai a.

Tin, Sairang Dinthar-ah khuan tuihna tha tak mai km 6 km 7 inkar velah a awm a. Keimahni VC te leh MLA ang pawha tui tha an neih theihna tur kha kan lo ngaihtuah a. Kan sum leh pai neih ang ang in pipe te leia pawh ve tawp kha kan lo tum a. Tichuan, RD Minister pawhin kan inpek vena leh kan tumruhnna te hriain material components atang te pawhin sum min han ruahman sak a. Chumi khawtlang leh MLA tangrualin keimahni thua tui lo lak ve tawp kan tum kha hriain kan Deputy CM, kan sawrkarin hma a lak theihna turin ruahmanna siamin leh engineer te tirin hma min lak sak mek a, kan lawm em em a. Tui tha tak, thal lai pawha harsa lova kan awmtheihna tur kan nei a ni tih kha ka han sawi duh bawk a. A bak Sairang leh Sihhmui te erawh khu chu a treatment kha kan tihfuh erawh chuan kum sawm lokal thleng pawh hian tuihna kan nei dawn loin kan hria a. Tui a awm loh hi chuan a nuam lova, khua a nuam lova, khawtlangin harsatna kan tawk thin a ni a. Tui chungchanga kan Deputy CM leh PHE Minister ni bawkin hma min lakpui a tumnaah hian a lawmawm ka ti a. Vawiinah hian House Memberte pawhin in lo hriat ve ka duh a, ka han sawilang duh a.

Tin Demand No. 46, UD & PA hi han sawi leh ila. Keini Aizawl West hi Urban leh Rural inchawhpawlhi kan ni a, amaherawhchu Sairang-ah te pawh hmalak theih vek a ni. Tun kum kal taah khan UD & PA atang hian nuai 10, 15 leh 20 te khawtinin chu hmasawnna, internal road kan siamna te, step kan siamna te leh kan mamawh chi hrang hrang siam nan khawtinah hmasawnna min thlen sak a, kan lawm a. Tanhril khu Lal khua a ni a, khaw upa tawh tak a ni tih chu kan hre vek a. Amaherawhchu, hmanlaia khua kha, an lo leh huan te kha khua a lo ni thin. Vawiinah chuan thlanmual motor pawhin a la thlen theihloh nei pawh khaw tam tak kan la awm a ni. Pu Dy. Speaker, khawngaihin min sawi zaghun tir lawk la. Tichuan, PHE Minister leh UD & PA Minister, kan Dy. CM bawk hian tunah hian Tanhril-

ah thlanmual motor-a luh theihna tur kawng laiin pavement min siamsak a, a hman hun hunah tunah hian hawn theihin kan nei ta a. Chutiang chuan Sakawrtuichhun an ni emaw, Luangmual an ni emaw khawi veng pawh hi develop ngai kan la ni a. Aizawl khawpui chhunga central line velah hi chuan thawh tur vak kan nei tawh lo bawk a, chuvang chuan kan khaw chhung hmasawnna tur atana kan department pawimawh ber, tunhmaa step-te, kalkawng te leh kan veng hmasawnna min thawsaktu LAD kha kan nei ta lo a. Khami aiah khan UD & PA-in vawiinah hian khawpui min han enkawl a. Vengtinin kan mamawh, a main road PWD-in min khawhsak bakah hmasawnna min thlen theitu department chungah hian kan innghahna a nasa hle a.

Chuvang chuan, ‘look to the west’ tih kha kan ngai hle a ni. ‘Look to the east’ ti reng tawh loa kan khawthlang lam, airport panna kalkawng, ram dang atanga lo zinna kalkawng te an hawna, khang bakah khan Phunchawng, Rangvamual kan hre vek a, hmasawnna thawh tur tam tak kan la nei a ni tih kha min hriat saka hma min lakpui tur leh a tul anih chuan Finance Minister changtu kan CM pawhin heng kan mamawh bik tana sum dah belh a ngai anih pawha lo tanpui turin ka han ngenin ka sawm a ni e. Pu Dy. Speaker, ka lawm e.

**DEPUTY SPEAKER** : A lawmawm e. Kan insawm zel ang a, tunah chuan Member zahawm tak Pu KT Rokhaw i lo sawm ang.

**PU K.T. ROKHAW** : Pu Speaker, ka lawm e. Pu Dy. Speaker, ka hmaa thusawi tawhte Ruling MLA-te kha chuan lawmthu sawi tur kha an han ngah khawp mai a, keini Opposition MLA-te hi chuan lawmthu han sawi tur vak hi kan nei lo a, a pawi ka ti ang reng a.

Nichinah khan Member zahawm tak Pu Thangmawia phei kha chuan minute 15 a pel daih a ni a, keini hi kan tawng a muang khawp a mi ilo hrethiam ve dawn nia, Pu Dy. Speaker.

Pu Dy. Speaker, School Education, Demand No. 20-ah tan ila. Kan Minister zahawm tak hi MZP President te lo ni tawh a ni a, zirlaita kan kaihruai dun tawh thin a, kan inhrechiang em em a. MZP President anih lai pawh khan education hi a tui em em thin a ni. Vawiinah he Ministry-a School Education Minister a lo ni hi, anih tur diktak an nih tir niin ka hrilia a, lawmawm ka ti hle a. Mizoram tan pawh hian Education Minister tha tak kan nei a ni tih kha ka han sawi duh a ni.

A lehlamah chuan Covid-19 hri leng avang hian school naupangte a effect hneh em em a, hmalak a tum angin hma pawh a la hlei thei lo a. Mahse Covid a lo tha chho dawn a, hmalak a han tan dawn a, a chungah hian rinna kan nghat viau a ni tih kha a hmasain ka sawi duh a ni.

A bik takin Tuipang Centenary Hr. Secondary School hi ka bial Palak-ah chuan Higher Secondary School awm chhun a ni a, Tipa hi khaw lian ber a ni a, kan headquarter a ni bawk a. Tunah hian student 185 vel kan nei mek a. Tin, nikum leh kum hmasate khan an result a tha em em a, a changin 70% te, 80% te an pass thin a ni. Tunah hian Lecturer te hlawh hi job-card atang leh ka MLA fund atangin kan inpe thin a. Tichuan, 2018-ah khan lump sum Grant-in-Aid min pe a, kum khatah cheng nuai 3 pek kan ni thin a, hei hi mamawh zual phuhruk nan kan hmang a. Khawngaih takin Minister zahawm tak hian Adhoc Grant-in-Aid status-ah min hlankai sak se a lawmawm viau ang. Tin, Pu Dy. Speaker, Theiri RMSA School hi HSS-ah kan din a, school naupang an thahnem viau a, an result te pawh a tha em em mai a. Tichuan, an hlawh hi job-card atang leh ka MLA fund atang hian ka pe ve char char a, khawngaiha lump sum Grant-in-Aid min pe turin ka nghen bawk a ni.

Tin, a bik takin Palak bial hi kan hriat angin Burma border-a awm kan ni a. Ka bialah hian Govt. H/S hi 7 a awm a, chutah chuan school hotu kan neih hi a tam berah pahnih te an ni a, a thenah chuan pakhat te, chutiang chu H/S hotu kan neih dan a ni. Tin, Headmaster phei hi chu kan nei mang reng reng lova, Serkawr-ah phei chuan Craft teacher a awm a, chu chuan headmaster ai a awh a ngai a. Chuvang chuan, khawngaihin Headmaster awmlohnna school-ah te hian Headmaster min pe thei se la. Tunah hian teacher 150 vel lak tur a awm niin ka hria a, a bik takin ka bial hi min duhsak hram rawh se tiin ka ngen duh a.

Tin, Tuipang Govt. H/S hi ka sawi tawh angin, ka bial headquarter Tuipang-a awm a ni a. hetah hian Vocational Education min dah sak hram se tih ka ngen duh a. Tin, khawchhak lamah khian Govt. H/S Chakhei kan nei a, hei hi RMSA hnuiah hian HSS-ah min upgrade saka Samagra-a dah ni thei se kan lawm hle ang.

A tawpnaah chuan, Pu Dy. Speaker, ‘Samagra Shiksa Abhiyan’ kan tih a lo awm atang hian Mizoram-a district hrang hrangte chu kan lawm viau hlawm ka ring a. Keini District Council area-ah erawh chuan kan buai ta em em mai a, Samagra a lo awm hian. A hma chuan RMSA hnuiah H/S a awm mai a, SSA hnuiah Middle leh Primary a ni mai a, Samagra a lo awma chinah hian kan buai ta em em a ni. A chhan chu District Council hnuiah Elementary Education hi a awm avangin SSA hnuiaia hnathawk M/S teacher te hlawh, an salary, an appointment, an posting & transfer te hi District Council hnuiah awm vek thin a ni. A chhan chu District Council hnuiah Elementary Education dah anih avangin Middle leh Primary pawh District Council hnuiah a awm vek a ni. Mahse Samagra a awm takah chuan heng an salary etc. te hi DEO, Mizoram kutah a awm ta tlat mai a. Middle School Teacher hlawh te, posting & transfer te, appointment te DEO kutah a awm tak siah chuan District Council SSA hnuiaia middle school teacher ho kha Mizoram sawrkar atangin an hlawh lak leh posting & transfer te, tin, appointment te siam anih takah chuan District Council hotute kha engah mah an ngai tawh lo a, disipline mumal a awm tawh lova, kan District Council hotute an buai hle a ni. Kan Minister pawh an lo hmu tawhin ka hria a, an thu leh hla erawh ka hre lova, nakinah khawngaihin min la hrilhfiah se.

Pu Deputy Speaker, PHE pawh ka la sawi ri lo a ni a, khawngaih hun min pek belh hram dawn nia. Tichuan khawngaih takin, ka han sawi leh duh chu, elementary education hi District Council hnuia awm a ni a, Samagra alo nih hian District Council thuneihna kha Mizoram sawrkar hian kan chhuhsak ta a ni. Hei hi pe let leh ang u, SSA hnuia middle school teacher te hi posting & transfer emaw, an salary emaw, appointment emawa thuneihna hi District Council kutah pek leh ni rawh se tih ka han sawi duh a ni e.

Pu Deputy Speaker, PHE ka tan dawn chauh a, khawngaihin. MLA zahawm tak Pu Thangmawia pawhin minute 17 chhung a sawi a kha. Tichuan, Pu Deputy Speaker, Demand No. 25, PHE hi kan Deputy CM chan a ni a. Ka ngen duh em em chu, Tipa leh a chhehvel khua Zyhno te, Siatlai te tana tui kan laksak mekna Tuisih Lui hi furah a nu NASA hle thin a, hman tlak a ni thin lova. Tin, kawngbul anih avangin insukna hmun atan a remchang a, a bulah hian tui source tha lutuk Hrava Lui a awm bawk a. Hrengva Lui hi department pawhin an survey tawh a, nuai 62-a zagh theih niin a estimate pawh siam a ni a. Kan Minister zahawm tak hian he Hrengva Lui tui hi min laksak thei sela ka lawm hle ang.

Tin, Siaha District mai nilo India ram tan pawha ramri, border a awm kan ni a, chuvang chuan inkalpawhna te pawh hi a harsa khawp mai a, fur lai phei chuan. Chuvangin, khawngaihin tuna JJM kan tihi, Functional Household Tap Connection hi keini border area ah hian priority min pe thei hram se. Chu bakah hei, Burma a buai a, raltsan an rawn lut tan a, tui lah kan harsa hlawm si a, a bik takin border area Siaha District te, Lawnglai District te, Champhai District te hi chu priority min pe sela a lawmawm viau ang.

Tin, Pu Deputy Speaker, nimina ka zaghna, Augmentation of urban water supply scheme Siaha kha kan Minister in nuai 800 lai min pe a, chutah chuan nuai 720 release tawh a ni a, la release loh nuai 80 ala awm a, hei hi khawngaih taka a rang lama min release sak turin ka ngen a ni. Tin, Pu Deputy Speaker Saikao (Serkawr) khua hi kan missionary te hmun a ni a, Lakher Pioneer Mission that hmun a ni a, kan ngaih hlut em em a ni. Tunah an awmna saw a san deuh avangin gravity in tui lak tur a awm mang reng reng lo a, chumi avang chuan solar water pump min siam sak hram rawh se tih hi ka ngen duh a. Tin, Zero Point, Siaha thlen hma khua saw englai pawhin tui a harsa em em thin a, khawngaih takin solar water pumping min siamsak turin ka ngen duh bawk a ni.

Tin, a tawpna atan UD & PA-ah tlem kan sawi leh ang a. Hmanni session hmasaah pawh ka sawi tawh a, Tuipang playground hi artificial grass turf min phah sak ve hram turin ka ngen a. Session-a ka sawi pawh khan Dy. Chief Minister pawh khanin ‘hei hi chu kan lo ngaipawimawh dawn nia’ a ti kha a ni a, chuvang chuan min tih hlawhtlin sak hram turin ka ngen leh duh a. Tin, Zyhno saw ka bial laili bera awm a ni a, playground tha lutuk an nei a. Engpawh nise playground gallery tha tak min siam sak hram sela. Tin, khawthlang lamah khuan Phura a awm a, playground tha tak kan nei bawk a, playground gallery tha tak khawngaih a min siam sak turin ka lo ngen duh bawk a. Chhak lamah khian Chakhei khua

a awm a, playground tha lutuk kan nei ve bawk a, heng te hi playground tha tak min siam sak turin kalo ngen duh bawk a. Pu Dy. Speaker hun tha tak min pek avangin ka lawm e.

**DEPUTY SPEAKER :** I sawi zo turah ngai ang aw, a lawmawm e. Tunah chuan Member zahawm tak Pu Andrew H. Thangliana i lo sawm ang.

**PU ANDREW H. THANGLIANA:** Pu Dy. Speaker ka lawm e. Demand No. 25, PHE atangin ka han sawi ve ang a. Hei hi ka lo sawi tawh thin tho a ni a, bial thenkhatin renewable energy hmanga solar plant, ka bialah pasarih, panga tia lawmthu sawi a zing ta viau mai a. Solar project hi House-ah hian a thlen hmasa ber ka nih hial ka ring a, Session hmasa lam ah te. Bukpui Solar Project bawk hi han sawi leh ka duh a, inhrilh hriat, in remind te pawh a ngaiin a lang, lawmthu sawi ngaihna laiah pawh sawi zel mai hi ka duh a, kan Chief Minister zahawm takin PHE a chan lai, sawrkar tirh khan a hnenah ka va kal a, sawlai Bukpui-a an tui tlan, a thlalak te nen, tui sen rem rum, dar rim nam a awm thu te, a solution min ngaihtuahpui tura ka tih kha chawp leh chilhin hmanhmawh takin min thawh sak nghal a, filtration system kha an siam tir nghal bawrh bawrh a ni. Amaherawhchu, rei vaklo hnuah a filtration system lam pawh ni tawh lovin Engineer te min hrih dan chuan, a hnar, a source zawk atangin tunah tui lak tlak an nei ta lova, nimin thleng khan an tui rawng saw a la sen rum a, dar rim a la nam tih report te pawh ka hnen a lo thleng a ni.

Tichuan khami filtration behchhan khan tui source thar ngaihtuahna Kolasib lama kan Engineer ten proposal an lo siam tawh kha tuna kan Minister zahawm takin min han pawmpui a, helai Committee zahawm tak Assurance Committee-ah ngei pawh subject pakhatah min han telh sak ve tak hnuah khan, report te department lam atangin vawi tam kan dawng tawh a ni. First Implementation Report-ah khan PHE department-in Ni 26.2.2021, February thla dain tawh khan Bukpui Bangla Lui JJM atanga solar pump hmanga ruahmanna siam anih thu tarlan a ni a, tender pawh chhuah vek tawh niin contractor kan la hmu lo tiha kha Assurance Committee ah report an rawn pe a, tichuan min take up sak zel a, Assurance Committee-in min ngaihpawimawh sak a, Minister Assurance te a lo nih avangin, implementation report dang lehah pawh telh a ni.

Tin, report thar berah hian ka han kai law law ang a. Report thar berah chuan, department-in min chhanna-ah khan 2020-2021 inkar budget-ah helai solar project, Bukpui solar pump hi tih hman anih loh avangin 2021-22 atan a ni e, tiha kha kan report dawn thar ber a ni a. Hei hi chu a takin min tihsak ve ngei tawh ka ring a, lawmthu ka hrilh lawk nghe nghe a ni. Chu chu sawlaia ka bial chhunga kan mamawh em em leh hriselna te pawh nghawng thei thil a nih avangin ka tarlang duh a.

Tichuan, JJM hnuia ka member puite pawhin an han sawi tak, in tina water connection kan tih chu chak takin kalpui a ni a, connection pipe te chu tunah In tinah a lut fir fer tawh a, khulai Kawnpui khua te; tin, Kolasib te pawh han sawi sak ila, hmun hrang hrangah, a tui han herh hawna tur lamah hian harsatna kan tawk a. Ministry of Jal Shakti

atanga Kolasib leh Kawnpui te pawh, ‘Tlawng tui kan pump chhuak’ an tih kha tunah khianin bawhzuina a awm leh awm loh hi kan sawi hleithei lova, tui kan harsat zia chu kan hre tlangin ka ring a. Hei hi Tlawng tui pump chhuah dan, Ministry of Jal Shakti hnuai JJM kan tih leh National Rural Tap Programme kal kawpin atih chhuah ngei kha kan han beisei ve a ni a, chungte chu ka han tarlang duh a.

Pakhat lehah chuan hetilaia ka Member puite pawh hian an sawi theiin ka ring a, a bik takin Luangmual Reservoir, a hlui em em tawh a, a te em em a, mipui pung chho zelah tui indaihlohma leh awm lohna a lian chho em em mai a. Khulai Tanky khu tih len theih dan awm sela tih kha, hei, ka member pui, kan Deputy Chief Whip te, Pu Valtea te ngei ngei pawh khulam pang ringtu chuan kan hre chiangin ka ring a, khulaia khu hma min laksak turin department lam leh kan Minister kan ngen tel duh a.

Tichuan Demand No. 20, Education lamah kan lut chho ve leh zawk ang a. Khamrang-ah khuan middle school extend nan cheng nuai 15 bawr vel sanction niin kan lo hria a, khawtlang hruaitute pawhin heti zozai an middle school extend-na tur chu tiin ngaiantuahin an ngaih ven a. Amaherawhchu, tuna a dinhmun chu, school extend nan sethlam angin, a vang 12 ft leh a dung ft 18 bawr vel, a thing pawh thing hlui tak tak lawng thing tih vel hman niin kan hotute khulai khawtlang hruaitu ten an report a. Chu chu contractor ngeiin a sawi, an sawi dan ti mai ila Pu Deputy Speaker, i phalna in, ‘Hnamrun lam hna’ a ni a, Hnamrun lamin engmah lehkha pawimawh pawh min pe lova, lo thawk rawh min ti a, a theih ang angin heti hian ka thawk ve ringawt e a ti e, tih a kha ka hriat dan a ni a, A enga pawh chu lo ni sela, nuai 18 lai sen ral a ni a, heti laia kan Ministry, kan sawrkar lai party pisapui ina khutilai sawrkar hmuna school extend a khawih hi chu helaia kan pisapui te pawh hian enpui deuh sela, engnge a awmzia tihte min monitor sak turin ka ngen duh deuh a.

Thil pakhat leh kan sawi duh chu, Education Minister-in ngaipawimawh taka transfer & posting rule, 2016 a an lo pass tawh ennawn an ni a. Tuna zirtirtu Transfer and Postings Rules a thara siam hi a lawmawm ka ti em em a. Chutih rual chuan, hei hi a takin tunah hian kan hmang chiah tawh em? Tin, kan DEO leh SDEO te, khinglai district-a a hmunhma hrechiangtu, zirtirtu thawh indaihloh dan zawng zawng hrechiang tute hi full responsibility leh thuneihna, an power kan exercise tir chiah tawh em tih laia te zawh pahin tarlan ka duh a. Chungte chu transfer & postings rules a taka, hmanni lawkah a copy te pawh kan dawng ve a, gazette-ah tih chhuah a ni a. Hman ngei ti tawh sela, helai Assembly, rorelna In sang berin a pass tawh leh rules a lo siam tawh te hi chu keimahni ngei pawh hian a taka kan kalpui hi a ngaiin ka hria a, chulai te chu kan sawi tel duh a.

Tin, High School, kan Education Minister chuan a hre chiangin ka ring a. Bukpui High School, khawtlang ti ti takah chuan, “a building chhawng khat a bo” an tiha saw a awm a. Amaherawhchum tunah sawn chhawng hniih tha deuh mai complete ni tawhin function chuang lovin tala-in a la inkalh rup mai a. Hei chauh hi ka han sawi zo law law ang

a, Pu Dy. Speaker. saw saw, school staff te leh sawlaia headmaster leh a khawtlang sawn, ‘a inkalh reng bawk si a, enga tan nge maw hetia a awm reng chu le,’ an ti deuh a. Chulai te pawh chu min atan tawngkam hnih khat lekin ka han tarlang tel duh a ni. Sawi tur tam tak a awm a, hun a tawp tawh si a, ka duh tawk mai ang e. Ka lawm e.

**DEPUTY SPEAKER :** A lawmawm e. Tunah chuan Member zahawm tak Dr. F. Lalnunmawia i lo sawm ang.

**DR. F. LALNUNMAWIA :** Pu Deputy Speaker, ka lawm e. Vawiinah hian kan Minister zahawm takte demand kan han sawiah hian, a hmasain kan Minister of State zahawm tak Pu Lalchhandama Ralte demand atangin tawite, a indawtin han sawi ve kan tum ang a.

A hmasa berin Demand No. 18, Printing & Stationery Department chungchangah hian tawitea ka sawi duh chu, he department hi sawilan tam loh department niin ka hria a, chutih rualin department pawimawh tak mai a ni a, kan hriat vek loh, kan hriat phak bakah hian thil pawimawh tam tak a lo thawk a, sawrkar department leh document pawimawhte print tu leh mawihna taka rawn siam chhuaku a ni a, fak a phu hlein ka hria a, a department hi ngaihpawimawh chhoh a hlawhte pawh ka han beisei a ni.

Tin, Stationery items lei chungchang te kan sawi thin a, department, sawrkar pawh hian tangkai zawkin han chhawrin han dawr se chu, he department revenue te pawh a lo pung chho ang a, sawrkar tan pawh a tangkai lehzual ang tih ka ngaihtuahnaah a awm a. Chuvang chuan he department hi sawrkar leh department hrang hrangte pawhin tangkai lehzualin hmang se a tha ang tih ka tarlang duh a ni.

Demand No. 20, School Education hi kan sawi tam tawh thin a, department pawimawh tak a ni a. A budget ngau ngau kan en chuan duhthusama hnathawh theihna tur tam dah theihloh lai a ni a, kan hre tlangin ka hria. Chutichung chuan Pu Dy. Speaker, School Education Department hi nikum lam budget kan han en chuan Budget Estimate aiin Revised Estimate-ah khan *major works* leh *other charges*-ah nuai 1,000 zet ve vein a nghawng a ni. Chulaiah chuan Budget Estimate-a lang lo, kan Minister-in hma a lakna avanga hnathawhna tur sum lo awm leh ta te kan hmu a, a lawmawm hlein ka hria a, kan Minister chak tak hmalaknaah lawmthu ka sawi a, chumi hmang chuan school repair leh zirtirtu rawih belh engemaw zat kan nei thei hi a lawmawm ka ti a. A bik takin keini bialah pawh MR zirtirtu 24 bakah Hindi teacher 10 zet kan nei bawk a, Headmaster hun rei tak neih ngai tawh lohnaah kan ni bawk a, Headmaster hi 6 min dah sak thei a, kan lawm hle a ni. Tin, Mizoram pumah zirtirtu atangin Headmaster-ah eng emaw zat kaisang an awm bawk kha a lawmawm hlein ka hria. Chutih rual chuan Pu Dy. Speaker, zirtirtu an lak kha a thahnem ve viau khan a hriat a, pension a chhuak hi an tam leh ta hle mai a, tun kum hnih khat chhung pawh hian zirtirtu thahnem tak an pension a, kan indaih chho ve tan dawn emaw kan tih laiin indaih

lohna kan sawi kan sawi leh ta mai a. Hengte pawh hi a tul dan ang a kan Minister zahawm tak hian min en chhoh sakte pawh ka beisei a ni.

Tin, Pu Dy. Speaker, MLA zahawm tak leh HRD Vice-Chairman ni bawk, Pu L. Thangmawia sawi kha ka support bakah amalgamation chungchang kha han tuihnih ve hlek ka duh a. Kan bial Sumsuih-ah sawn kan Minister leh official-te pawh inbe rawnin School-I leh School-II saw kaihkawp turin hma kan la a, chumi atan chuan kan Minister zahawm takin school building sakna min pe a. School building thar kan sa mek a tah chuan, School-I leh School-II a zirlai 30 vel ve ve awm kha kan kaikawp ang a, school naupang 60-70 vel an lo ni ang a, zirtirtu 3 vel ve ve nei khan 6 an lo nei tawh ang a, English Medium School tha taka siam tumin hma kan la a ni. Chutiang chuan school, a bik takin khawpui hmun thenkhata naupang tlemte te awm, zirtirtu tan pawha zirtir buaina tham lutuk awm lo ang chi kha siamthata amalgamate zel theih ni se chu a va tha lehzual dawn em tih ka han tarlang leh duh bawk a ni.

Demand No. 28, Labour, Employment, Skill Development & Entrepreneurship-ah hian a bik takin kan sum dinhmun avangin sum dah pun vak theih a ni lo tih kan hria a. A bik takin he department hmalaknaah hian entrepreneurship leh skill development lampang hi uar a tul hlein ka hria a. Kum kaltaah Covid pandemic vanga state danga hnathawka awm an hna chan ta te chhawmdawlna nasa lehzuala kan kalpui a tul hlein ka hria. Hemi kawngah hian kan Minister zahawm tak leh MYC-te hmalakna ka fak duh a. Hna chan ta te innghahna department a ni a, anni tan hian nasa lehzualin tan a lak ka beisei a ni.

Labour cess chungchangah hian daily labourers hamthatna pawh he department hian a keng a. Heng ho tana chhawrnaawm lehzual tura awareness nasa lehzual pek te, registration tam zawkin an tih theihna tura hma an lak ka beisei a. He department hi Mizo tam tak, a bikin thalai hna neilote, eizawnna mumal neilote innghahna a ni a, nasa lehzualin a thawk ang tih ka beisei a ni.

Pu Dy. Speaker, kan Dy. Chief Minister zahawm tak Pu Tawnluia Demand No. 25, PHE department-ah hian ka han kai ang a. Kan hmuh ang hian kum kal ta aiin sum a pung deuh a, a lawmawm hlein ka hria a. He department hi department pawimawh tak mai a ni a, tui hnianghnar taka hmuh hi a tul em em a. Khawpui leh a chhehvelah mipui kan pung zel a, PHE department-in nasa takin hma a la a, connection an tihpun belh a, chutih rual chuan mipui kan pung chho ve leh zel si a indaih tak tak a awm thei lo a ni. Chutiang karah chuan kan Dy. Chief Minister zahawm takin nasa takin hma a la a. Abik takin keini bialah pawh JJM hnuiah In tina tui connection pek turin hma an la mek a, In eng emaw zat chu zawh tawh a ni nghe nghe a ni. Hengah hian kan lawm em em a ni.

Tin, kan bial kaltlangin project lian deuh pakhat, ‘Alternate Gravity Water Supply Scheme’ kan ti a, Tawi Tlang atangin gravity-a tui lak tum a ni a, hna a kal mek a, ka bial, Muallungthu tlangah sawn water tanky litre 1,50,000 dawng tur siam a ni a, chutah chuan

tui lo inkhawkhawmin Aizawl chhim lam eng emaw zat hi chu chawm thei tura ruahman a ni a. Hetiang project siamchhuah nachang hria kan Dy. Chief Minister zahawm tak leh kan official-te pawh hian fak an phu ka ti. Hemi a zawh hunah chuan nasa takin tui indaihlohn min phuhru turin ka ngai a, ka beisei a ni.

Tin, ka bial Sailam leh Chamring-ah hian solar water pump hmanga tui lakna buatsaih mek a ni a. Sailam-ah chuan an zo tawh a an hmang tangkai tan hle tawh a, Chamring-ah pawh ruahman mek a ni. Tin, PHE department hmalaknaah hian Plastic Waste Management kalpui tan a ni a, a lawmawm hlein ka hria. Aibawk-ah sawn pilot project atan Plastic Baling Unit siam a ni a, saw pawh saw tihpuitlin chhoh zel a tulin ka hria a ni.

A tawp nan Demand No. 46, UD & PA hi tawite ka han sawi leh ang a. Anni hi khawpui hmasawnna atana thawktu pawimawh em em an ni a. Budget kan en chuan, capital assets siam nan sum eng emaw zat dah a ni a, a lawmawm hlein ka hria a, beiseina nasa tak min siam a ni. Pu Dy. Speaker, kum 2 kal ta chhung hian kan Dy. Chief Minister hmalaknaain Aizawl khawpui leh khawpui dangten nasa takin hmel thar a hmu a, thil thar tam tak kan hmu a ni. Keini bialah te pawh thil tamtak kum kal ta chhungin, khawchhung cheina leh khawchhung inkalpawhna min siam sak a kan lawm hle a, a chungah lawmthu kan sawi duh a. Tin, Hlimen-ah Smart City project hnuiah khelmual phul lem phahna min han ruahman sak te hi kan lawm takzet a ni.

Keini bialah hian khaw 26 a awm a Pu Deputy Speaker, kam hniih khat lekin ka la hek lawk ang a, khua leh veng 26-ah veng 3 hi UD & PA leh AMC-in a huam chhung an ni a, kan hmang tangkai hle a. AMC hmalakna avangin thil thar tamtak kan nei a, AMC enkawltu anih ang bawkin AMC thar kan nei ta bawk a, a bik takin Aizawl khawpui hmelthar kan hmu chhoh zel te pawh kan beisei a. Heng Department hmanga hmasawnna tlentu leh ruahmanna siamtu kan Deputy CM zahawmtak chungah hian lawmthu ka sawi duh a ni. Chuvang chuan, heng budget, an demand te hi phur taka kan pass pui a thain ka hria a, ka han thlawp a ni e. Ka lawm e.

**DEPUTY SPEAKER :** Awle, tunah Member zahawmtak Pu Lawmawma Tochhawng i lo sawm ang.

**PU LAWMAWMA TOCHHAWNG:** Pu Deputy Speaker, ka lawm e. Tun tum kan budget demand sawihona chu mi chi hniih kan awm niin a lang a, lawm chunga hnathawk leh lawmlo chunga hnathawkte niin a intiliar theih a. Chutilaiah chuan kan inan tlanna erawh chu, mamawh kan nei theuh hi a ni awm e. Pu Deputy Speaker, a hmasain Demand No. 20 leh 28 hi tawi tein han sawi hmasak ka duh a.

School Education hi tulna, loh theihlohnna avang pawh a ni ang a, tun tum an budget hi tlemin a phai deuh a, ngaihtuahpui ngaiin an lang a. A chhan chu, he department hi veng tin, khaw tin dap chhuak department a ni a. Kan ngaihthlak tak ang khan kawng hrang hrang,

a ram leh hnam tana mi chhawr tlak tur chherchhuahna hmun, ‘Mizoram Kung’ a ni ringawt mai a. Chuvangin, he department hi kan ram leh hnam inngahahna pawimawh berte zinga pakhat a ni a, ram pum tana an contribution pawh hi a ropui narawh e! “chhangchhiat pawh hi a chhangchhe hraw deuh hruih a ni lawm ni” tih tur a ni a. Chuvangin department pawimawh tak a ni.

Lawmthu sawina tur tam tak kan nei a, ram pum huap leh District leh bial ang pawhin, bial chhung leh District-ah school building engemaw zat he department hnuai atangin kan Minister kaihruaina hnuaih sak sak kan ni tawh a, kan lawm em em a. Girls toilet te, choka te, tui in tur thianghlim te leh thil dangte min pe tawh hlawm bawk a, district leh bial ang pawhin kan lawm em em bawk a ni. School mamawh eng emaw zat hi min phuhruk sak tawh bawk a kan lawm em em a, mamawh zawng zawng min pe tawh tihna erawh chu a ni chuang lo a, nakinah remchangah kan la sawi ang a.

Tichuan, kan ngaihthlak tak ang khan, tawpin tai awmlo, kal reng anih avangin keini Zobawk-ah pawhawn Zobawk Higher Secondary School kan nei a, saw pawh saw min chawikan saka min upgrade sak kan mamawh khawp mai a. Saw mi Higher School saw a tlantu, a chawmtu khaw 10 vel atangin an kal khawm a ni a, saw zirna-in saw tih changtlun kan mamawh khawp mai a, Ramthar High School te pawh chutiang ang bawkin kan mamawhna a sang hle a ni.

Hmun dang an sawi tak ang bawk khan zirtirtu indaihlohma a pung a, lut chhuak an ni zuk mai a, chuvang chuan kan bial chhung, kan school dinhmun thenkhat hi ka han sawi ve hrim hrim ang a, kan minister zahawm takin min lo hriatsak sela.

Lungte PS-ah sawn zirtirtu 3 awmin zirlai 40 an awm a, Dawn PS-ah sawn zirtirtu 3 awmin zirlai 25 an awm a, Zobawk Primary School-II ah sawn zirtirtu 4 awmin zirlai 27 an awm a, Leite-ah hian zirtirtu 3 awmin zirlai 40 an awm bawk a, Govt. Zobawk High School-ah sawn zirtirtu 4 awmin zirlai 54 an awm a ni, tuna kan han record dan chuan. Hei hi Minister zahawm takin min lo hriatsak ta sela. Leite Primary School zirtirtu 3 leh zirlai 40 awmnaah sawn 4<sup>th</sup> Grade an neilo a, tun school han tan phatah pawh hian an buai hle a ni. Tin, mi rethei leh harsa zawk fate luhna Govt. Higher Secondary, Lunglei-ah sawn Economics subject zirtirtu kan neihlohma a rei ta hle mai a, mamawhna a sang si a, khawnggaih takin kan mamawhna min phuhruk sak sela kan duh hle a ni.

Tin, Pu Deputy Speaker, LESDE hnuaih kan hotute, kan Minister-te leh MYC chairman te hnathawh, Central Service-ah Mizo kan thathnem zawk theihna tur atana ruahmanna an neih hi a lawmawm thlawt a, nakin lawkah chuan rah tha tak a chhuah ngei beisei a ni. Tin, Labour & Employment hnuaih hian dan kan neih mek a ni awm a, Labour Law leh Work Permit te pawh hi mumal takin hman theiha duanchhuah ni thei sela,

Mizoram hnathawk engemawzat lo lut atang hian sawrkar revenue-ah pawh hlawkna a awm theih ka ring.

Pu Deputy Speaker, sawi tur tam tak karah Demand No. 25, PHE hi ka han tarlang ve leh zawk duh a. Zawhna leh Chhanna hun kan hmanah khan kan mamawh zual tam takah lawmthu sawina tur kan nei a ni. Greater Lunglei Water Supply Scheme kan sawi kha min ngaihpawimawh sak a, state priority list ah te pawh min dahsak a, a thlamuan tlak kan ti khawp mai. Tin, Public Hydrant, kangmei chhuaha humhimna turte pawh min dah pawimawh sak a, Tlawng Pialtleng, Lunglei ina kan rin ber, a panna kawng saw a chhe kumhlun a ni a, “kan hria a nia” min ti tawh a kan minister-in, a thlamuan tlak hle a ni. “Thawktute quarters pawh kan hre reng e!” min lo tihsak tawh bawk a. Tui pipeline kum 30 deuh thaw, lo ni tawh te pawh a lo hlui lutuk tawh a tlak a ngai tawh kan tih te pawh kha min hriatsak a, chungah te pawh chuan Deputy Chief Minister, PHE chungah lawmthu ka sawi a, beiseina sang tak nen he hun harsa tak karah pawh a theih chin chin min phuhruk sak ang tih kan beisei tlat a ni.

Tin, ka bial Lunglei East chhunga Ralvawng Solar Water Pump Scheme kan Deputy CM, PHE Minister ni bawk ina min tihsak, tunah chuan 70% kan zo ta a, tun March thla emaw thla leh emawah hian kan hawng thei ang em aw ka ti a. A kumhluna tui harsa thin khua ten tui hnianghnar an neihna tur saw an nghakhleh tawh takzet mai a. Chutihrual chuan PHE Minister chungah thinlung takin lawmthu ka sawi a ni.

Chutih lai chuan kan sawi tawh ang khan mamawhah tawpin tai a awm lo a ni. Zobawk Water Supply Scheme, 2005-a hawn tawh saw tunah chuan alo upa ta a, a lo tuiokin leak a tam tawh bawk si a, nichina kan sawi tak ang khan furah tui sen rem rum, in tlak mang loh saw a chhuak a chhuak ta mai a, Zobawk khawpui lo ni ve si ah sawn a tlantu mihring pung zelah tui mamawhna a sang zel a, department lam hian zonal tank siamna turin concept paper te an thehlut tawh a, chungte chu pipe hlui tawh tlakna tur leh thildang atan a ni a, min lo hriatsak se kan duh khawp mai a, a loa kan awm theihloh tui min ngaihpawimawh sak kan beisei tlat a ni. Tin, Lungpuizawl leh Zote-ah hian tui lakna tur concept paper thehluh a ni tawh a, hengte pawh hi tihhlawhtlin theih ni se la, vawi leh khatah kan ti hup chuang lo a, a theih chen chenah chuan bul min han tan sak se la kan duh ve hle a ni.

Pu Deputy Speaker, Demand No. 46, UD & PA hnuaria Lunglei leh Mizoram chhim lam hmasawnna eng emaw zat awm saw a lawmawm kan ti bawk. Kan Minister-in min ngaihsak zia a lo lang thin a, a department-te chungah pawh lawmthu kan sawi a ni. UD & PA hnuaria Lena Stadium kan nei a, bawlhhlawh sawngbawlna tunah sawn kalpui mek a ni a, kan mamawhna a sang ta hle mai. Mihring angin han tekhin ta ila, ei teuh teuh paichhuah lehna, ek lehna awm si lo ang vel kan ni a, a hrehawm duh khawp mai a, kan inpuhmawh a, veng leh vengte pawh kan innghirngho lek lek thin a ni. Khawngaihtakin saw saw chinfel vat theih ni se kan duh hle mai.

Kan lawmna em em mai pakhat chu, kan Chief Minister ruahmanna hnuiaia PAHOSS Lunglei-in kan hmang ve thei tur saw a ni a, tunah hian a committee pahnih, District Committee leh Executive Committee -te indinin hma kan la a, tah chuan ruahmanna a kal mek a, Lunglei mipuite tan PAHOSS hi tangkai tak tur, thil nghahhlehlawm tak a ni a. Tun hnaiah thuthar kan han hriat leh chu, Lunglei Municipality hmang thei tur zawngin ngaihtuahna a kal a ni tih kan hria a, a lawmawm kan ti a. Inpuahchah nan erawh hun chu kan duh ngei ang, awareness campaign te pawh kan mamawhin kan hria. Engpawhnise, MNF sawrkar hian Chhim lam Lunglei min hre reng tih hi kan hria a, a lawmawm ka ti tak zet a ni. Chubakah, kawngpuia ke a kal te tan pedestrian pavement eng emaw zat kan nei ta a, sawrkar tan tirh atanga kan nei thei hi a lawmawm em em mai a, mipui tam tak kan him phah a, Lunglei khawpuiah motor a lo pung ve si a, traffic a jam a, chubakah tlan vak vak pawl te kan la awm bawk nen, chuti chungin pedestrian pavement avangte sawn kan him phah niin kan hria a, min ngaihtuahsaktu kan Minister leh UD & PA department chungah lawmthu ka sawi a ni.

Hmabak pawimawh zual thenkhat point hniih khat lek ka sawi leh duh a awm a, Pu Deputy Speaker, PAHOSS hnuiaia hmalakna kal mek hi tih hlawhtlin a, a taka hman a kalpui anih theih nan leh traffic jam te tipreh anih nan a fund hi khawngaihtaka release hma theih ni ta se la, a lawmawm khawp ang. Chu chu kan beisei a ni a, a ruahmanna lam chu kan lo inpeih viau tawh a ni. Tin, khawpui thang mek te kan nih avangin kea kalte kan him theih nan pedestrian pavement kan la mamawh tam hle mai a, chu chu min lo hriatsak hram hram se la kan duh a ni. Municipal kalpui tura ruahhman anih mek lai hian mumal taka khawpui thang zel a awm theihna turin Lunglei master plan buatsaiah theih tura ruahmanna min neihsak ni se kan duh hle mai a, chu chu beiseina sang tak pawh kan nei a ni. Plan mumal awm loa khawpui than a hrehawmzia te, a buaithlak zia te kan hria a, chumi pumpelh nan chuan Lunglei master plan a thar buatsaiah theih ni se kan mamawh hle mai.

A tawp berah chuan Pu Deputy Speaker, khawpui thang mek kan nih avangin motor lut leh chhuak saw a insul zut mai a, mipui kan pung a, in leh lo a lo pung ve zel bawk si a, ‘nitin kumtin an pung zel’ tih ang kha kan ni ve ta a. Chuvang chuan Lunglei khawpui chhuah lamah sawn Lunglei Eastern Side Bypass Economic Road khawpui extension ni pah bawk si, khawpui tihzauh nan a tangkai em em dawn bawk si, a kawng pakhat chauh kan neih saw kan Chief Minister zahawm tak hmalakna avangin khawthlang lam bypass road saw kan la mamawh ngawih ngawih a ni. Kan Deputy Chief Minister zahawm tak hian min ngaihpawimawh sak se la, hemi kawngah hian a remchan dan ang angin hma pawh kan han la chhin mek a ni. Nakinah chipchiar zawk te pawhin kan la rawn thlen turah kan ngai a, chung hunah chuan min lo hriatsak se la kan duh khawp mai.

Chutichuan, Pu Deputy Speaker, heng demand-te hi lawm taka pass turin thlawpawm tak a ni lawm ni ka ti a, ka thlawp thu ka rawn sawi e. Ka lawm e.

**DEPUTY SPEAKER :** Tunah chuan Member zahawm tak Pu Nihar Kanti Chakma ka sawm ang a, a sawi zawahah hian Member zahawm tak Pu Lalrintluanga Sailo a lo inring dawn nia.

**PU NIHAR KANTI CHAKMA:** Pu Deputy Speaker, ka lawm e. Vawiinah Minister zahawm tak te pahnih demand kan sawiho mek a, a hmasain Pu Lalchhandama Ralte demand hi sawi hmasa ta ila.

Demand No. 20, School Education Department hi a pawimawh em em a, all round development nan. Pu Deputy Speaker, hei hi ka sawi hmain, kuminah Tlabung hi Kum 150 a tlin lawmna kan nei dawn a ni a, Mizoram-ah Tlabung hi khaw upa ber a ni a, Aizawl aiin a ding hmasa a ni. Mahse, khaw upa ber ni chungin education-ah Tlabung area-ah hian tun sawrkhar hian nasa takin tan a lak a ngai a ni.

Pu Deputy Speaker, Minister zahawm tak kaihhruaina hnuiah Hindi Teacher lak a ni a, teacher lak belh a ni bawk a, a lawmawm khawp mai a. Education hi a pawimawh a, a tel lo chuan ram hian hma a sawn thei lo a ni. Pu Deputy Speaker, ka sawi duh chu, ka bial chhungah Govt. High School pahnih chiah kan nei a, Aided pakhat nen a vaiin pathum, a dang panga hi RMSA hnuia awm a ni. Baptist Mission-in private-in a run chho mek a, mahse tun thlengin Higher Secondary hi kan la nei lova, a paw ka ti khawp mai. chuvangin tun sawrkhar chak tak hian min ngaihtuah a ngai a ni. Ka bial hi backward a ni bawk a, min ngaihsak loh chuan engtin nge ramin hma a sawn ang, problem hrang hrang kan nei a ni. Tunah hian Govt. High School kan nei a, RMSA kan nei bawk a, Private School kan nei bawk a, a vain school 8 kan nei a, mahse matric exam tur pakhat chiah kan nei a ni. Session apiangin kan sawi thin a, hotute ngaihdan erawh chu kan hriatpui lova, engnge a harsatna ni ang aw ka ti a ni. School 8 atangin a tlem berah 50 te pawh hi exam ila, a tlem berah mi 100 hi an kai daih a, hmun khata zirlai 100 exam buaipui erawh a enkawltute tan a huphurhawm a ni. Chuvang chuan, Pu Deputy Speaker, nangmah kaltlangin, ram hi a tak taka hmasawn kan duh chuan equal treatment hi min pek a ngai a ni.

Nichina Pu Rinsanga rawn sawi ang khan, ramri-ah kan awm a, ram ti hmasawn tur chuan a hmasa berah border area tih hmasawn a ngai a ni, education-ah. Problem hrang hrang kan nei a, zirtirtute indaihlohma a bikin Primary-ah kan nei nasa a ni. Mizoram pumpuiah hian ka bial hi single teacher Govt. School tamna ber a ni a, ehi hi Minister zahawm takin min chhinchhiah sak se. Govt. Primary School Bandiasora-ah zirtirtu pakhat chiah, zirlai 62 zirtirtu tur a awm a ni, engtin nge zirlai hetiang zat zirtirtu pakhatin a enkawl theih ang? Engtinng keini hi education-ah kan develop theih ang tih kha ngaihtuah chian a ngai a ni.

Pu Deputy Speaker, keipawh Pathian khawngaihna zarah term 5-na tunah ka chelh mek a, amaherawhchu Mizo language-ah chutiang lutukin command ka nei lo a, ka ngaihtuahna tak tak pawh ka express zawh theihlohma chhan pawh hei hi a ni a. Ka bialah

pawh primary atangin mizo language zir kan duh a, zirtirtu min pek theihloh chuan engtin nge keimahniin ka zir theih ang, sawrkarin min ngaihtuah sak a ngai a ni. Mizo hi State language a ni naa, Mizoram-ah pawh Hindi kan uar ve a ngaiin ka hria a, Hindi hi kan thiam ve a ngai a, kan tum phawt chuan a language hi kan command thei a ni, chuti lo chuan ram hi kan develop thei dawn lo a ni.

News-ah te kan chhiar a, Pu Deputy Speaker, India ram OBC pumpuiah Meena hnam hi IAS nei tam ber an ni a, IAS an neih tam vangin an area pawh an develop nasa a, keini Tlabung chuan tun thlengin MCS kan la nei lo a ni a. chuvangin Pu Deputy Speaker, ka bial tihamasawn tur chuan priority min pek a ngaiin ka hria a ni.

Thil pakhat Pu Deputy Speaker, ka sawi leh duh chu, economic survey-ah a lang chiang a, teacher:pupil ratio hi economic survey-a a lan danah chuan 1:17 Primary School-ah, Middle-ah 1:10, High School-ah 1:9, Higher-ah 1:3 te a ni. Pu Deputy Speaker, Tlabung hi kuminah kum 150 a tling dawn a ni a, kum 150 lawmna atan tal Higher Secondary hi min present thei se la ka duh khawp mai. Hetiang kum upa kan nih chung pawha Higher Secondary kan la nei lo hi a pawi hle mai, Pu Deputy Speaker.

Tin, ka bialah KGBP hi an awm ve a, a lawmawm lutuk a, MNF sawrkar hmasaa din kha a ni a, khang hun lai pawh khan lawmthu te pawh kan sawi tawh a, mahse inauguration-a min sawm miah lo kha a pawi ka ti a, chu chu House-ah pawh hian ka han sawichhuak a ni a. Vawiin atang hian school an lut tan dawn a ni a, (*Dy. SPEAKER : I hun a tawp e.*) Pu Dy. Speaker, tlem min pek belh la, tawng lamah kan harsat a, Mizo tawng zirna chance hi kan nei miah lo a, MLA ka nih hnuah chauh Mizo tawng ka zir tan a ni a, chuvangin hun min pek belh hram la.

Vawiinah sikul an tan dawn a ni a, hei hi child education promotion atana ding a ni a, zirlai nu leh pate harsa tak tak vek anni a. School an luh hma khan RT-PCR an mahni pawisa chawiin test a ngai a, hei hi sawrkarin free-a a tih te ka ngen nghal duh a ni. Sawi tur a la tam hle mahse, Pu Dy. Speaker, ka hun a tawp a, kha kha ka sawi theih ni mai se. Ka lawm e.

**DEPUTY SPEAKER :** Tunah Member zahawm tak Pu Lalrintluanga Sailo ka sawm ang a, a sawi zawh hian Pu Lalrindika Ralte kha lo inring se a tha ang e.

**PU LALRINTLUANGA SAILO:** Pu Dy. Speaker, ka lawm e. Vawiin hian kan Minister zahawm tak pahnih te Demand kan han sawi ho a ni a. Ka ngaihtuahnaah thil pakhat a awm a, i ding leh veilama mite sawi dan hi a inang tlangpui a, chuvang chuan kei pawhin ‘tawngtai leh dilin lawmthu hril tel zelin’ tih ang deuh khan sawi ka han ti ve dawn a ni.

A hmasa berah chuan Demand No. 46, UD & PA hi ka sawi hmasa duh a. A chhan chu he department hi ka bial lamah kan hmelhriat ve ngai loh tawp mai a ni. Kumin kum

kal mekah hian a changtu Minister zahawm tak hian min duhsak hle a, West Phaileng chu *notified town-ah* min han puan sak ve ta a. Heng UD & PA sum te pawh ka bialah kan hmang ve thei dawn a ni tih kan hriatin kan lawm hle a ni tih kha ka han sawi duh a.

Tin, ka bial khu kan hmuh leh hriat angin kan changkang lo a, aspirational district kan nihna ang tako helaiah hian UD & PA enkawltu Minister-in min duhsak ta sa sa ngaihtuahna tharte pawh min hmanpui turin ka han sawi lang tel duh a. Chutih rual chuan hall tha zawk te pawh kan la nei lova, mamawh tam tak kan nei a, chung kan mamawh te pawh chu notified town-ah min puang a ni tih kan hriat rual khan ziakin department lamah pawh kan thlen a ni tih kha min lo hriatpui se la, Pu Dy. Speaker.

A dawt lehah chuan Demand No. 20, School Education chungchangah hian sawi tur tam tak a awm a. Kan vannei hlein ka hria a, he Ministry hi. Education Department hi Mizoram-ah department lian ber, thawktu tam ber, tin, organisation pawh tam ber niin ka hria a. Helaiah hian Minister chak tak leh fit tak maiin a han enkawl a a lawmawm hlein ka hria a. Keini bial hnufum tan phei chuan zirtirtu eng emaw zat min han pek belh tawhnaah te kan lawm hle a ni tih ka sawi duh a. Chutih rual chuan building thar te pawh min pe a, min sak sak a, a repair tur te pawh tam tak beiseinain kan la thlir zel a ni tih ka sawi duh a.

Tin, Samagra chungchang hi member thenkhat khan an han sawisel deuh hlek nachungin keini lamah chuan kan fak duh tlat a. Higher Secondary School la neihlohma hmun te kan ni a, a bik takin Phuldungsei leh Silsuri-ah kan Minister zahawm takin Samagra hmangin sikul te min han din sakin leh building awm lo te pawh Silsuri-ah te pawh min han tih sak a, a chungah hian kan lawm takzet a ni tih ka han tarlang duh a. Chutih rual chuan, ‘tawngtai leh dilin’ tih laia kha tarlan tel Pu Dy. Speaker, ka han duh tel a. Kan bialah hian sawarkar hmasa atang tawhin zirtirtu hi an rawn post tha thin a ni a, amaherawhchu hmun kilkhawr leh hrehawm te anih avangin hremna ang zawng a kal thin te a ni a. Chulaiah chuan zirtirtu tam tak hi Pu Zoramthanga Ministry a lo pian hian insawn chhuah dil kan nei lo thei lova, chungah chuan indaihlo chungin kan insawn chhuak nawk nawk a, vawiinah hian a indaih lo bial kan ni lo thei lo a ni tih te ka sawi duh a. Chutih rual chuan zirtirtu kan lak dawn khan, nikum lama Budget Session-a ka sawi tawh ang khan, kan official lam ten data an collect-naah thil felhlel deuh te a awm a. Zirtirtu, entiran Marpara North Middle School-ah te chuan zirtirtu 4 la awmin an sawi a, amaherawhchu pakhatmah an lo awm tawh lova, an pension fai tawh a, physical teacher pakhat chauh awm te kha an lo ni a, chutiang chuan en bik ngai kan ni tih kha vawiinah ka sawi duh a ni. Chutih rual chuan he School Education budget hi nikum lam aiin a tla hniam hle a ni tih kan hria a, chu chu kan House Leader zahawm tak pawhin min lo hriatpui ta se, RE lamah a department pawimawh ang hian min duhsak deuh se tih ka ngen duh a, chutiang chuan hma min laksak se tih ka ngaihtuahnaah a lian hle a ni.

Tin, Education Department hi a pawimawh em em mai a, midang sawiloh lai ngaihpawimawh deuh mai ka neih a awm a. SCERT hi elementary zirlaibu siamtute an ni a,

hetah hian kan hnam mil deuh hleka zirlaibute pawh hi kan siam a hun tawh lawm ni tih te ka ngaihtuah a. Tin, kan hnamin movement ropui tak kan nei a, chu movement te pawh chu thangthar ten an hriat chhunzawm zel theihna turin information tha tak, dik tak collect chunga naupangte zirlaibua te pawh hian kan reflect hi a hun tawh lawm ni aw tih ka ngaihtuah a, chu chu kan Minister zahawm tak khan min lo chhinchhiah sak se ka duh a ni.

Chutihrual chuan, zirtirtu kan han la neuh neuh a, hetah hian training lo chu lak theihloh te a lo ni tawh a, helamah hian SCERT pawhin tan a lak a ngai hlein ka hria a. Vawiinah hian teacher training chhuak hi kan ngah tawk lo deuhin ka hria a. A bik takin kan bial lam khu kan hnufum em em mai a, educational qualification inang rau rauah khan teacher training an han dil a, exam leh screening test an han paltlang dawn khan duh angin, tuna ka hmaa Member zahawm tak Pu Nihar-a sawi ang khan tawng te an lo thiam tawk lo a, chungah chuan department hrang hrangah pawh education qualification-ah qualified mahsela he lam written emaw, interview emaw ah khan an tla thin a ni. Hei hi Pu Deputy Speaker, uar takin ka sawi duh a, kan House Leader pawhin helaiah hian ngaihhnathiamna thui tak min neihpui thei se tih thlengin ka dil duh a ni. Nurse training a ni emaw, health worker training a ni emaw, teacher training a ni emaw heng lamah hian kan tling ve thei tlat lo a ni tih te kha ka sawi duh a ni. Chuvang chuan hengah hian hriatthiamna thui tak nei chunga keini bial hnufual bik hi min en kan duh tel a. Chutihrualin, ka bialah hian SDEO Office a awm a, hmanni Question Hour-ah ka zawh tawh ang khan, hemi SDEO Office atanga a control hi tlangdung thlanglam khu a ni mai a, a chhak helai Kangmun tlangdung, Reiek tlangdung khaw 14 te hi a tel lova, helai district administration-ah thui tak harsatna kan nei a. District Administrator hova meeting kan neih tein anni ho kan han ko thin a Aizawl West SDO control an nih avangin an lo tel thla ngai lova, chuvang chuan *aspirational district* anga hma han lakna turin DC hoa han tih dawn pawhin harsatna kan tawk thin a ni. Hei hi abik takin siamrem dan awm sela ka duh khawp mai tih ka han tarlang tel duh a ni.

He bial chhungah hian ministry hmasaah Member zahawm tak Dr. Thangtea hovin private-in Higher Secondary School, Phaileng-ah kum 2004-ah din a ni a, kum 16 lai a lo liam tawh a, Pu Zoramthanga ministry hmasa huntawp lamah khan anni hi lumpsum grant-ah kan han dah chho a, kha kha vawiin thlengin kha status-ah khan an la thu a ni. An dinhmun a pui tha hlein ka hria. West Phaileng-a Higher kan han din ve te khu kum 16 chhunga an pass percentage hi 100% te, 96% te a ni a, a pumpuia khaikhawmnaah kum 16 chhungah hian 100% te, 90.14% a ni a. Chuvang chuan hengte hi abik takin kan sawrkar hian min upgrade thei tawh lawm ni tih te vawiinah hian ka sawi duh a ni.

Tin, chutiang bawkin khawchhak tlangdungah hian khaw 14 kan awm a, chungah pawh chuan Higher kan neihloh avangin tun ministry din veleh a hminga MLA kan nih khan private-in Reiek-ah kan han din ve nawk nawk a, nikum maiah khan. Chungah chuan mithiam leh engemaw bik thlan tur kan nei lova pawl sawmpakhat fail, pawl sawm third a pass ang chi te pawh kha pawl sawmpahnhiah an han admit nawk nawk a, chuti chung chung

chuan cent percent an pass thei a ni. Chutiang chuanin ka bial chhungah abik takin Bawngthah-ah pawh High School private kum 14 lai lo ding tawh a awm a, heng hi kan sawrkar hian min upgrade thei em tih te min ngaiantuahpui se ka duh khawp mai.

Pu Dy. Speaker, min lo hriathiam deuhhlek ka duh a. Hei demand tam tak sawi tur ala awm a, ka hmaa mite pawh kha hun i pe deuhin ka hria a. Demand No. 25-ah han kal deuh dawrh ka duh a. Lawmthu sawi mawlh mawlh tur kan neiin ka hria a, abik takin kan Dy. Chief Minister zahawm takin hma min laksak na azarah Reiek khawpuiah hian NABARD sum hmangin tui, Tlawng Lui tui ngei mai Aizawl Pa in thin ang kha kan dawng ve thei dawn niin a lang a, kan lawm hle a ni tih ka sawi duh a. Tunah hian hma lak mawlh mawlh a ni a, amaherawhchu, nakinah wind-up naah min lo chhinchhiah sak ta se, engtikah nge hei hi zawh theih anih ang Reiek tui pump hi tihte hi min lo chhinchhiah sak se ka duh a. Pu Dy. Speaker khawngaihin, kan Minister kaihhruaina hnuaih JJM lam hian min cover tha khawp mai a, tunhnaiah Lallen, Saithah, Pukzing Vengthlang leh Zopui te, chutiang zelin Silsuri-a new location hmunah te tui kan dawng tha tan ta hlein kan hria a, kan lawm hle a. Chumi piah lamah khaw lian deuh tlang sanga awm Phuldungsei, Pukzing te pawh solar pumping min tihsak dawn a ni tih kan han hria a, kan lawm hle a. Chutihrual chuan Swachh Bharat atanga sanitation an manage chungchang thuah hian khaw panga, abik takin Kanghmun, Bawlte, South Sabual, Darlung leh Bawngthah te, he scheme hi alo tawp tawh avangin harsatna kan tawk a, hei hi a changtu Minister-in khawngaihin min lo ennawn sak se ka duh khawp mai a. Bawlhhlawh pahna kan nei ve lova, khaw dang 20 chuangin kan nei tawh a, helai hi min cover pha lo a ni tih kha min lo hriat sak se ka duh a ni.

Tin, Tuahzawl tui pump hi sawrkar hmasa lamah tha takin an lo ti a, amaherawhchu enkawltu MR tak ngial pawh kan nei lova, a khawl khu chhe palh ta se man to tham a ni a, helai te hi a khawchhunga mi man tlawm zawka muster roll min rawih sak thei lawm ni tih te ka ngaiantuahnaah a awm a ni tih ka tarlang duh a.

Demand No. 28, LESDE chungchangah sawrkar hmasa khan ka bial W. Phaileng-ah khuan building tam tak sak a ni a, a hmanna tur mumal awm lovin tunah hian kum li ngawt mai japan-hlo leh tlangsam hmunah alo chang tawh a, khungte khu hman tangkai dan kan Minister chak tak hian min ngaiantuahpui sela tihte ka tarlang duh a.

Tin, Member zahawm takin a sawi tawh Demand No. 18, Printing & Stationery hi question-ah pawh ka telh tawh a, abik takin printing staff laia hi ka ngaipawimawh hle a ni tih kha kan tarlang duh a. He department hi sawrkar document pawimawh leh session kan neih chungchangah te pawh anmahni kutchhuak vek hi a ni a, chutihrual chuan, staff thenkhat pension tein an han chhuak a, MR emaw pawh pekbelh anni silova, senior officer-te nen kan inkawmnaah phei chuan, “hun a rei tulh tulh a, pension an tam tulh tulh a, kan tlem tulh tulh a, kan hah tulh tulh a ni” an ti a ni. Pu Dy. Speaker, chuvang chuan anni hi nichina Member zahawm takte’n an sawi ang khan *revenue earning* department an nihna ang hian ngaihpawimawh a tha khawp mai tih ka tarlang tel duh a.

Ka sawi pawlh nuai lo thei lova, Pu Dy. Speaker, Demand No. 25-ah khan ka han let leh zuai ang a. Hmanniah Question & Answer-ah khan chiang deuhin kan Deputy Chief Minister zahawmtak khan a sawi a, underground water pumping chungchangah crore 60-in tunah hian khawl ngaihtuah mek a ni tih a sawi a, keini bialin hei hi kan nghakhlel hle a ni. A chhan chu solar pumping te kan la tih hmain kan awmna tlang te khu a sang hlawm a, underground tui kan pump chhuah theihna turin khatiang kha kan mamawh zual a ni tih kha min lo hriat sak se ka duh khawp mai.

A tawp berah chuan, vawiin demand, kan ram tana pawimawh tak tak mai, abik takin Minister-te pahnih demand kan sawiho hi ka thlawp a, chutihrual chuanin kan harsatna kan han sawite pawh min hriatsak reng chunga member ten thahnemngai taka sawia pass ngei turin kan thlawp ani e. Ka lawm e.

**DEPUTY SPEAKER :** Awle, hei kan inbuatsaihna a tha a, Member zahawm tak takte kan ngaihtuahna kan han sawichhuah te, kan han zirchian te kha a hlu em em a ni. Chuvang chuan kan han hrethiam deuh a ni.

Engpawnise, kan hun a tawp a, tunah hian Opposition Group Leader te pawhin an la sawi lova. Engtin nge, kan chawl dawn nge, ala rei hmel si a, House ngaihdan i la teh ang. Darkar chanve kan chawl ang a, kan lut leh mai dawn emaw ni le? Anih leh 4:45-ah rorel kan tan leh dawn nia; i chawl phawt ang u le.

#### **4:45 P.M.**

**SPEAKER :** Member zahawm tak Pu Lalrindika Ralte sawi turin ka sawm nghal e.

**PU LALRINDIKA RALTE :** Pu Speaker, ka lawm e. Vawiina kan demand sawiho tur hi kan bial mamawh leh tul chu office lamah ti ila a thain ka hria a, hetah hi chuan ka sawi vak lovang a. Hei, kan sawiho turah hian Education hi kan sawi vek a, keipawh Education atang hian rawn sawi tan ka tum a, Demand No. 20-na ah hian.

Ka sawi hmasak duh chu, ram hravuitute keini ho hi kan pawimawh hle a ni tih sawi hmasak ka duh a. Mihring ti mihringtu hi ‘ngaihtuahna’ a ni a, chu mihringa ngaihtuahna dik va thun luh chu a pawimawh em em a, chu chu ‘education’ hi a ni a. Pathianin a anpuin min siam a mihring te hi, Pathian min siamdan ang nun chhuahpui hi a pawimawh a, chu chu education thain a rawn ken a ni bawkin ka hria a. Tin, mihringte hian kan hriat tur dik tak kan hriat a pawimawh a, kan hriat tur dik tak kan hriat tawk loh chuan mihring hi awmze nei lovin thui tak a kaltheih a ni tih hi kan hriat tlan vek a ni a. ‘Zirna’ kan han tih pawh hian, lehkhabu/zirlaibu kan tih hi a pawimawh em emin ka hria a. Chuvang chuan, education kan sawi hian kan zirlaibu hi ennawn te a ngai em tih te ka rilruah a awm a. Tin, zirlaibu tha a pawimawh a, zirlaibu tha tak chu a nihdan tur ang taka naupangteah thun fuh anih loh

chuan awmzia a nei lo bawk a. Chuvang chuan zirlaibu tha kan mamawh piah lamah zirtirtu tha, zirlaibu a that anga naupangte hnena ve pek kha a pawimawh a. Chuvang chuan zirtirtu tha hi kan mamawh hle bawkin ka hria a ni.

Tin, zirtirtu tha nei tur chuan enge pawimawh ang kan tih chuan, zirtirtu lak dan phung siamthat hi a pawimawhin ka hria a, kei chuan. Zirtirtu kan lak hian a chang chuan kan constable lak deuh mai mai em tih te rilruah a awm ve thin a. Chuvang chuan zirna hi a pawimawh a, mihring a nihdan tur anga a nih theihna tur chu kan zirlai hi a nih avangin zirtirtute hi an pawimawh em em a. Hengah hi chuan party politics tih te hi tel lo se a thain ka hria a. Ramin a chhiat phahna tur khawp hi chuan party politics khelh loh hi a himin ka hre bawk a ni. Chu chu Pu Speaker, Demand No.20-na a ka sawi duh a ni a.

Tin, Demand No.13, Personnel & Administrative Reforms hi a pawimawhin ka hria a. Sawrkar hi tha tak leh fel tako mipuite tana kal tur chuan sawrkar hnathawk te hi an pawimawh a ni tih kan hria a, sawrkar hnathawkte hian tha tak leh phur tako hna an thawh theihna turin sawrkar mipui aiawha awm te, a tawi zawngin sawi ila Ruling Party kan tih te emaw keini ho hian inlaichinna tha sawrkar nen kan neihlochuan sawrkar tha hi siam a har dawnin ka hria a.

Tin, chumi kawnga ka ngaihpawimawh em em chu, Transfer & Posting chungchang hi a ni a. Heng, ‘Ani hi kan lam a ni a, a ni hi kan lam a ni lova’ tih ang ngaihdan mai maia Transfer & Posting kan kalpui te hi a tha lovin ka hria a, chung ang chi chu kan kalsan pawh a thain ka hria a. Mihringte hi Mizoin kan sawi dan in ‘no khat ei theuh theuh’ hi a lo inanloh theih khawp mai a, a lo inthlauh theih khawp mai. Chuvang chuan mihring hi a thiamnaah te, a theihnaah te kan teh tur ni awm tak a ni a, kan ram leh hnam tana an tangkai theih dan turte pawh kan ngaihtuah tur a ni a. Heng ‘Ani hi kan pawl lam a ni a, a ni hi kan pawl lam a ni lova’ tih mai maia Transfer & Posting kan kalpui thin hi kan ramin a tuar vein ka hria a. Heng hi tih tawh loh a thain ka hria a. Sawrkar tha kan siam dawn anih chuan sawrkar hnathawkte nen phur tako kan thawh tlan hi a pawimawh a, chutiang atan chuan inlaichinna tha kan neih a pawimawh a, kan sawrkar mipui aiawha thlante pawh hian. Chu inlaichinna tha chu neia kan ram leh mipuite tana rawng kan bawl hi a pawimawh a, chu chu kan ngaih pawimawh ber tur pawh a niin ka hria a ni. Chung pahnih chu ka sawi duh a ni e. Ka lawm e, Pu Speaker.

**SPEAKER** : Tunge sawi leh ang? Member zahawm tak Er. Lalzirliana i lo sawm ang.

**ER. H. LALZIRLIANA** : Pu Speaker, ka lawm e. Nimin khan i phalnain ka bialchhung Khawnai khuaa chhiatna tawk in 7 ngawt mai, bungrua engmah chuh hman loa kangral ta te buaipuiin ka kal a. General Discussion-ah ka inbuatsaih ve tehlul nen ka tel ve thei ta lova, a pawi ka ti khawp mai a.

Vawiinah hian Minister zahawm takte pahnih demand sawinaah hian a zawng a za chu ka sawi lovang a, ka ngaih pawimawh zualte han sawi ve ka duh a.

Pakhatnaah chuan UD&PA chungchang hi han sawi ve lawk ka duh a. Waste Management hi a pawimawh khawp mai a, ram changkang leh changkang lo tehna chu waste an manage danah a ni. Ram changkang apiang an khuate pawh a fai niin kan hria a. Chutiangah chuan sawrkarin nasa takin hma a la a, hmasawnna turte pawh tam tak kan la neiin ka hria a. Tin, AMC-in initiative an han la a, kan bawlhhlawh thliar dan leh pahid dan chungchang te mipuiah awareness, zirtirna min han pe a. Hei hi a harsatna leh a buaithlakna deuh te chu a awm mai thei, amaherawhchu inzir tur kan nih ang in a awlsam apiang hi a tha ber em tih hi kan ngaihtuah a ngai a ni. Mipuite hian tlema harsa deuh alo nih pawha kan inzirna tur leh thil ruahman a felna tur zawka hetianga kan sawrkarin ruahmanna a han siam hi a lawmawm ka ti khawp mai a. AMC-a hnathawk zawng zawngte pawhin hetiang lamah hian nasa leh zualin hma la sela ka duh a ni.

Tin, UD & PA hnuiah hian ka bial chhungah khaw pahnih a awm ve a, Lengpui leh Mamit, chungah te pawh nikum chhungin hmalakna mumal tak kan nei a, a lawmawm ka ti hle a, UD & PA changt Minister hnenah pawh lawmthu ka sawi a ni.

Tin, Education hi sawi loh theih loh a ni a. Ka bial chhungah hian Elementary School lam hi chu a awm deuh vek a, kan zia khawp mai a. Government High School hi pathum chiah a awm a, chutah pawh chuan Headmaster hi kan nei mumal lo a ni. A bik takin Mamit High School-a Headmaster kan neih lohna hi kum sawm chuang a ni tawh a, Headmaster-in-Charge hnuiah kan khawsa a.

Chutiangin Lengpui-ah hian Headmaster a pension a, kan han bei nasa khawp mai a, VC leh NGO hrang hrangte nen kan han bei a, kan Deputy Speaker bial ami hi kan han la chhuak dawn a, kan Minister chuan min han tih sak mai a. Amaherawhchu, chhuah a har tang tang hle mai a, Deputy Speaker hian min hriatpuiin ka ring a. Tunah hian khami kan lakchhuah kha naktip maiah hian a pension dawn a, engtin nge kan tih ang tiin tunah hian kan ngaihtuah leh nasa tawh a, a harsat zia kha kan hre bawk si a. Chungte chu kan Minister hian min lo hriatsak se la, ka lo sawi lawk anih chu.

Lawmthu han sawina turte pawh ka nei a. DEO Office sak zawh a ni tawh a, hawn theih maiin a awm tawh a. Tin, SDO Office pawh kan nei ve ta a, lawmawm kan ti hle mai a. La hawn loh a ni a remchangah kan Minister hian min hawn sak turah ka ngai a. Amaherawhchu, kan DEO Office khu amah pawhin a en tawh a, duhthu a sam lo angreng khawp mai a. Hengte pawh hi mawi hnai zawk leh District Capital-a Education, department lian ber office tan chuan a sit awm deuh mai thei a. Ani pawhin a hmu tawh a, a remchan leh khu aia changtlung deuh zawka tih theih dan min han zawn pui se la tih kha ka sawi duh a.

Tin, Lengte leh Tuipuibari-ah khuan Private High School khawtlang thawhlawma an din, Tuipuibari-ah phei chuan 2002 atang khan, kum 20 dawn a ni tawh a, chu chu khawtlangin an buaipui a hlawh pawh an pe vek a ni. Khulai khu han sawi chian deuh hlek a ngai a. Tuipuibari-I leh Tuipuibari-II khu a awm a, Tuipuibari-II kan tih thin hi tunah chuan Rajivnagar a ni tawh a. Kan bialah khuan hmingthlak a tam angreng a, Teirei Forest kan tih kha ‘Hruaitluang’ tiha thlak a ni bawk a, sawrkar hmasaah khan. Kan inlam pawlh nuk mai a. Tuipuibari-I khu a origin kha a ni a, Tuipuibari-II khu han en chuan, ‘a awm reng tawh alawm’ in ti mai thei, mahse kha kha Rajivnagar a ni a. Tuipuibari-I khu khaw rei tak, Bru khawpui a ni a, mihring pawh an tam a ni. Khutah khuan Private High School kum sawmhnih dawn *run* tawh, vawiin thlenga la regularize loh, lump sum Aided-ah tak ngial pawh la hlankai loh a ni. Chuvangin a bik takin Lengte leh Tuipuibari Private High School hi kan Minister-in min lo chhinchhiah sakin hma min lak sak sela kan ti khawp mai.

Tin, DIET kan nei ve a, a function ve tawh a. Officer te, Principal te an awm a, zirlai pawh eng emaw zat an awm a ni. Grade-IV an neih lohna khu a rei tawh khawp mai a, an buai hle a, ka hnenah pawh an sawi thin a. Khu khu temporary deuh pawha arrangement min siam sak theih chuan kan lawm hle ang.

Education hi a pawimawh kan ti a, kan sawi vek a. Nelson Mandela chuan, Education hi kan society leh khawvel change tura ‘the most powerful weapon’ a tih a ni. Chutiang chuan khawpuite, thingtlangte kan inkhairual a pawimawh khawp mai a. APJ Abdul Kalam, former President khan, “ramchhunga mihring rilru bright ber pawh hi classroom tlar hnung ber atang pawhin a rawn chhuak thei a ni” a ti a ni. Chuvang chuan thingtlang leh khaw chengker zawk, ‘bial aspirational’ kan nih kha min hriatpui reng ula a thain ka hria a. Aspirational District kha bialtu pathumin a zawnin kan sawi a ni. Aspirational kan nihna chhan parameter pawimawh berte zing ami chu, *education* leh *healthcare* a ni. Chutah chuan kan hniam em avanga ‘spirational’ ni pawh kan ni a. Chuvangin kan hotute’n kan zirna lam hin min ngaiantuahlo kan ti hauh lova, hei aia nasa zawkin leh tin, Dampa Bialtu zahawm tak khan a rawn sawi lang tawh a, kan han interview ve thin a, qualification B. Ed., B. Lit. neite pawh, amaherawhchu kan bial khu kan chekhawk a, tawng lamah te harsatna kan nei a, interview leh tin, a thiamna lam hriam hrimah te pawh a ni ang, zirna tha zawka zir chhuak leh helaia zir chhuak kha chu a lo inthlauh loh theihloh a, khangah te khan kan *disadvantage* em em a ni. Heti lai hi ka rawn sawinawn leh hram duh a. Khu laia ziritirtu, Rajivnagar zirtirtu ni tur chuan Aizawl-a mi *bright* ber ber kha an rawn dah a, an rawn kal tha leh duh mang si lova, a hnuah transfer an ti a, kan buaipui hle a. Transfer theih tur ang chu kan transfer zo tawh emaw kan tih lain, a la ni chuang lova, an han sawi a, a lo *genuine case* em em zel bawk si a, ‘I bialah ka rawn awm duh e,’ tia rawn thing chat chat hi an awm si lova, kan in transfer nual mai a, kan hotute’n a replace-na turte min lo ngaiantuah ve zel bawk a, min ngaiantuah chhunzawm zel turah ka ngai a ni.

Ka sawi duh leh chu PHE chungchang hi a ni a. Kum 2005 khan tuna PHE Minister zahawmtak hian an sawrkar hmasak lai khan Mamit Water Supply khu min hawn sak tawh

a. Kum 10 chuang engmah hmalakna thar awm lovin khu ringawt khu kan ring chho a. Kum 2005, 2006 vela mihring awm kha a let fein kan pung tawh a ni. Tunah hmathar han lak leh a niin, amah ngei hian min hawnsak leh turah kan ngai a, kan lawm hle a. Hman niah a rawn sawifiah tawh a, kan lawm hle a ni. Nasa zawk leh chak zawkin hma min laksak leh se la tih hi ka request-na a ni. Khati kha ka sawi theih ni mai sela, ka lawm e.

**SPEAKER** : Member zahawm tak Dr. Z.R. Thiamsanga ka sawm leh e.

**DR. ZR. THIAMSANGA** : Pu Speaker, ka lawm e. Demand sawi hmain vawiin chu kan incheina te pawh hi a inang leh viau mai a, thil mawi te pawh hi i hria ka ti, Pui Speaker. A tha khawpin ka hria a, hun te pawh hi mi pek belh ka beisei deuh a. Kan Minister zahawmtak te pahnih Demand kan han sawiho a ni a. Covid-19 avangin boruak thalo tak mai kan han dawng a, demand sawithein keini Legislator-te Pathianin min han ruahman a, hriselna tha min pe hi a lawmawm hle a ni.

Ka hma a Member zahawmtak takte khan an sawi a, khawthlang lamah aspirational district te an ti a, a dik khawp mai a, border area kan ni a te an ti a, Assam border te kan ti a. Keini khawchhak lam khi border area, state border area mai ni lo, international border a ni a, thui tak a ni a khi khi chu, Zo khua, hnamdang sumdawng pawh awm theih lohna a ni a. Khilai khi kan thuam that leh zual a ngai a, Rajiv Nagar te kha chu a la ziaawm, darkar 3 vel lek kal a ni a, Selam te chu Alu te pawh kan inlei tawnna hmun, Champhai atanga darkar 4 vel kal a ni. Chutiang chu anih avangin, khilam, ‘Look East’ hi kan uar deuh tan ngaiin ka hria, Look West, Look South aiin tih kha a hmasain ka sawi ve duh a ni e, Pu Speaker.

Tichuan, Education Department demand hi han sawi hmassa i la. Kan Minister zahawm tak Demand No. 20-na hi, a lawmawm khawpin ka hria a, ka bial ringawtah pawh hian hmasawnna ropui tak kan dawng mek a. GM Higher Secondary High School, kan mi pawimawh tak tak, tuna kan House Leader, kan CM ngei pawh a zirchhuahna hmunah building thar min han sak sak a, a lawmawm khawp mai a. Chu mai bakah Member tam takten kan sawi tawh a, zirtirtu indaih lohna tam tak min han phuhruka, tunah pawh M.R. High School Teacher 7 leh Hindi Teacher 20 zet min han pe bawk a, kawl a eng a ni khawchhakah pawh khian ka han ti ang e. Pu Speaker, a lawmawm khawpin ka hria a ni.

Zirtirtute kha kan constable lak mai mai ang te khan kan tiin ka hria a, Member zahawm tak te khan. Zirtirtute kha uluk takin Selection Committee-in a ti a ni tih kha engati nge kan hriat loh le, ka han ti ang e, Pu Speaker. Tin, ‘Constable lak mai mai’ tih te pawh hi’ kan constable te hi fit taka lak an ni tih te pawh hi engatinge maw kan hriat loh le, kha kha i hre tlang ang u. Covid-19 donaah te pawh hah taka min vengtute chu kan constable te hi an ni lawm ni ka ti a ni. Chuvangin kan constable lak dante pawh hi fit taka lak an ni tih hi kan hriat a ngai awm e.

Sawitur a tam si a, Pu Speaker, hun hi a tlem si a. Education hi a pawimawh a, department-ah chuan ‘department lian ber’ kan ti thei ang a. Sawrkar hnathawk pawh 30% chuang awmna anih avangin, nakin zela kan ram hruk pawimawh, thangtharte leh kan ram dinhmun zel kalna turah pawh pawimawh berte zing ami a ni a. Chuvang chuan New Education Policy committee-in a siam a, peng hrang hrangte pawhin an siam a, amaherawhchu Covid-19 avanagin duh angin hma kan la chak thei lo a. Hengte pawh hi rang zawkin hma an han la chho ang a, kan hotute’n.

Tichuanin, mahni bial tlem han sawi leh ta i la. Champhai-ah khian Govt. Higher Secondary School pakhat chiah a awm a. chutihlaiin Champhai High School khi a senior tawh a, zirlai pawh 700 chuang an awm a, zirtirtu an indaiah lo khawp mai a. Chuvang chuan he school hi Govt. Higher Secondary School-ah min hlan kai sak ngei se tiin kan Minister zahawmtak ka ngen a ni. Chutianga min hlan kai mai theihloh pawhin tuna kan Higher Secondary School khi vertical extension tal khian min tihsak se, kha kha ka han ngen duh bawk a ni.

Tichuan, Hnahlan khi border area kan ti a, Indo-Myanmar border-a awm a ni a, Hr. Sec. School-te kan han din ve a, thingtlang atangin High School an han pass a, khawpuiah an kal thei lo a, Selam-te Vaikhawtlang-te chu a la hla leh zual a ni. Chung ho zawng zawng rawn fuankhawmna a ni a. Khi khi lump-sum chauh a la nih avangin Grant-in-Aid status-ah min han hlankai sak se tih te pawh ka han ngen a. Vaikhawtlang High School tak pawh khi Grant-in-Aid ah min hlan kai sak se kan ti a, a lump-sum khian a awm rei ve tawh a, theihtawp an chhuah a, MLA fund leh SRDC ang te pawhin kan han ti nawk nawk a. Chuvang chuan khingte pawh khi min rawn ngaihtuah ngei turin ka rawn chhawpchhuak a ni.

Tichuan, Printing & Stationery Department hi a pawimawh dan kan hria a, sawrkar-in kan hmang tangkai a, department hrang hrang pawhin tunah an hmang tangkai em em a. Hengte pawh hi nasa leh zuala kan hman chhoh te pawh a ngaiin ka hria.

Tin, Labour & Employment chungchangah hian, kan hre tawh a, Super IAS 20 program-ah mi 20 lai mai kan han thlang chhuak te, tunah Delhi, Chanakya IAS Academy-ah coaching an ti mek a. Tun atanga kum hnih khatah hi chuan IAS-te pawh hi kan inchherchhuak ve thei mai ang tih te pawh hi beiseina nen kan thlir a, hengte hi a ropui hle a. Tin, IAS Coaching Centre Aizawl, Lunglei, Serchhip, Kolasib-ah te kan han nei a, a lawmawm khawp mai a. Amaherawhchu, district hla zawk Champhai-ah te pawh khian min rawn pe ve thei se chu, kan Minister zahawm tak leh kan Youth Commission Chairman-te pawh he laiah an awm a, khang khan min lo hriatsak se ka duh a.

Tin, Youth Centre kan tih pawh Aizawl, Lunglei, Serchhip-ah a awm a, a lawmawm a. Keini khi a hla deuh kan nih avang khian hengte pawh hi min rawn hre turah chuan ka han ngai a ni.

Thil pakhat ka sawi leh lawk tur chu, Labour & Employment-ah hian nikum budget session-ah khan Champhai Employment Officer puitling min rawn dah sak tur khan ka rawn ngen lawm lawm a, vawiinah a taka kan lo hmuh tak avangin lawmthu House-ah hian ka rawn sawi a ni. Kan lawm khawp a ni, Champhai.

Tin, kan Dy. Chief Minister zahawm tak demand hi sawi tur a tam khawp mai a. Nizan hmasa lawk khan Champhai leh a chhehvel mipui tam berte chawmtu Tuipui-a kan pump khawl a chhe rawp mai a, chuvang chuan Champhai khawpui khi tui ngheiin kan awm mai dawn a. Chak takin kan Minister-in hma a han la a. Tichuan Champhai North bialtu, Minister ni bawk nen kan Dy. Chief Minister kan han hmu a, department hotute rang taka ko khawmin, a khawl part Mizoram-ah a awm lova, Kolkota-ah a lo awm hlauh a. Chu chu tunah hian an rawn phur chho mek a, kan lawm hle a ni tih kha ka sawi duh a ni.

Tichuan, Champhai South leh North khianin development tam tak PHE-ah te pawh kan hmu a. Kan bial chhung khaw te reuh te teah pawh tuizem tha pui pui tunah khian min han siamsak a. Hnahlan-ah pawh solar pumping energy hmangin hmanni lawkah *trial run* te an han ti a, tui a haw hum hum ta mai a, kan lawm khawp mai a. Amaherawhchu, tunah khian, a bik takin Champhai khawpui-ah khian tuna kan Greater Water Supply Phase-I khi kan khawp kham tawh lo a... (Pu Speaker, a rei tawh lo ang.) .. Phase-II pawh tunah ruahman mek a ni a, khingte pawh khi chak zawka hma min laksak turin ka rawn ngen a ni.

Tunah hian Champhai Keilung Li-ah khian Impounding Dam and Development of Recreation Centre 2018-a sawrkar hmasa ina a lo ruahman tawh kha tunah khian cheng vaibelchhe 9.8 vel a ni a, estimate kha, tunah khian vaibelchhe 7 zet hman a ni tawh a, 35% zo tawh anga sawi a ni a. Amaherawhchu, hmanniah khan a hmun ngeiah kan zuk kal a, chu chu a la pha lo hlein kan hria a. Khi khi Champhai mipuite khian kan beisei tawh a, tourist attract nan leh han chawm nan pawh a pawimawh dawn avangin khi khi min tihpuitlin sak thuai turin ka rawn ngen bawk a ni.

Pu Speaker, sawi tur chu a la tam hle a, amaherawhchu tun tum chu thuawih takin hun ka han hmang dik ang e. Pu Speaker, ka lawm e.

**SPEAKER** : Thuawih takin minute 2-in a pel a ni e. Tunge sawi leh ang? Awle, Member zahawm tak Dr. Vanlaltanpuia ka sawm e.

**DR. VANLALTANPUIA** : Pu Speaker, ka lawm e. Vawiinah hian Minister zahawm tak 2, kan Dy. Chief Minister Pu Tawnluia leh Pu Lalchhandama Ralte ten an Demand an pharh thei te leh sawiho a ni hi a lawmawm ka ti hle a. Pu Speaker, a hmasa bera tan chuan Education, Demand No. 20 hi han sawi ka duh a. Ka thusawi dan hi tlemin hun a tlem avangin hmanhmawh deuh hlekin kawng hnihil, pakhatna, lawmthu sawina leh a pahnihna, ‘problems and challenges’ ti mai i la, harsatnate leh chona awm thei hrang hrangho te angin sawi ka duh a.

Pakhatnaah chuan Education-ah hian Member tam takin an sawi tawh ang khan kei pawhin lawmthu sawi ka duh a. MR teacher eng emaw zat min laksak a, 34 lai ka bialah lak an ni a. Hindi teacher min laksak bawk a, SEDP teacher tunah min pe leh bawk a. A vai hian 50 chuang ka bialah zirtirtu thar min han dahsak ta hi ka lawm em em a ni tih ka sawi duh a.

Tin, NABARD sum atangin school 5 lai mai min pe a; bial hrang hrang zingah pek tam ber zingah ka awmin ka hria a. School heng Zotlang Hr. Sec. School, Baptist Hr. Sec. School, Thiltlang High School, Pangzawl M/S School, Haulawng School leh Zokhawsang School te min sak sak a, ka lawm hle a ni tih kha ka sawi duh bawk a.

Pathumnaah chuan teacher transfer hrang hrang hote, chhungkua harsatna nei ten kan hnenah an rawn sawi ve a. Chung ho zawng zawngte chu kan Minister hnenah kan thlen a, a niin transfer leh posting te min lo tih sak thin a, ka lawm hle a ni tih ka sawi duh a. Heng bakah hian furniture hrang hrang school-in an mamawhte min pe a, computer sets te min pe bawk a kan lawm em em a ni tih ka sawi duh bawk a ni.

Problems & Challenges-ah hian ka sawi duh, Minister pawhin nakinah min react se ka duh a awm a, National Education Policy introduce a ni a. Tuna kan thusawi lai pawh hi tam tak hian an ngaihven viauin ka hria a. Zirtirtu pawl hrang hrang te, entirnan- Board exam tih bo tur a ni han tih te, tin, comprehensive-a kal tur a ni han tih ang chi te, tin, thil hrang hrang kan la kal ngaih loh dan phung anga *drastic change* ti mai ila, thil inthlak danglam puk puk tur ang hi he NEP-ah hian a tam hle mai a. Chungah chuan engtin nge kalpui an tum, a phase-wise emaw, a dangte implement dan tur, entirnan- Phase-I ah engtin nge kal an tum, Phase-II naah eng tin nge kal an tum, tin, a bik takin Board exam te hi tih tawp a ni dawn em tun hnaiah hian han tih ang chi te hi min chhang thei se ka duh khawp mai. National Education Policy kan implement dan turte hi min react se ka duh hle a ni.

Pahnihna-ah chuan, ka bialah School building chhia a tam hle mai a, school thenkhatte phei chu tun thli lo thawk turte hi kan huphurh lawk em em mai a, a chhem darh ngei dawn a ni tih ang te hi, tawng thu chhe lovah a awm tam em em tawh mai a. Heng te hi min han sak sak thei se tih te hi ka ngenna a ni a, kan mamawh em em a ni.

Tin, a pathumna-ah chuan, kan hriat angin All India Service-ah Mizo kan tling thei lo ta em em mai a, a chhan eng nge ni tih hi kan zawng kan zawng hlawm a, a chhanna dik thlap te phei chu kan hre thei lo a. Amaherawhchu, chiang taka langa chu, ‘kan education system hi a hausa tawk ta lo’ tih te hi a ni a, quality education enhancement hi kan nei chau ta viau a ni tih a lang a. Chuvang chuan, he mi hook-up tur hian Civil Service Exam-a kan tlin theihna tur ang chi hian syllabi te, curriculum thlak te hi a ngai viau lo maw tih te hi ka sawi duh a. Chung atan chuan subject thenkhat tangkai tur ang chite hi introduce a theih em, tun hnaiah hian. Entirnan - Reasoning lamah te hman niah pawh ka sawi tawh a, ‘Logic Subject’ kan tih te hi mi State-ah chuan an nei deuh vek a. ‘Test of Reasoning,’ a hma kan

sawn theihna tur subject introduce a ngai hle a ni. Chuvang chuan, heng subject thar IAS leh Civil Service Exam-ah te kan hook-up theihna tura pawimawh ang chi ho-ah te introduce a theih em tih te hi ngaihtuah na min hman sak se tih ka duh a ni.

A dawt leh-ah chuan LESDE, Demand No. 28 hi ka sawi leh lawk ang a. Ka ngaihpawimawh em em thin pakhat chu, un-organized Labour System Mizoram-ah kan la hmang reng hi a vei awm hlein ka hria a. A chhan chu mistiri tu emaw, amaha kha mistiri nia insawite kan lo chhawr ta a, chu chuan a hnuiah labour te a lo nei a, eng emaw an thawh leu leu hnu chuan veng leh lamah chuan mistiri a lo inti ve leh mai a, tichuan a rate pawh kha a lo inchhiar leh mai a. Khatiang kha a ni a, un-organized Labour System hian kan kal rei ta lutuk a, unge certified a, engzat nge an rate pawh chu tu nge siam sak tih te hi kan ram hian kan buaipui lo em em mai a. Chuvang chuan kan mastery te hi entirnan – in to pui pui te kan sa ta a, mahse kan duh dan anga mi rama in an sak dan nalh ang chi te kha kan labour tam tak ten min sak sak thei lo. Mimal ka zuk sawiselna ni lovin, mastery hi kan nei chau em em a ni. Chuvang chuan, hengah te hian Nation Skill Quality Framework (NSQF) kan han tih ang chi te pawh hi introduce ve hi a hun tawh lo maw, kan labour system-ah hian tih te hi ka sawi duh a. Chutiang kawng atan chuan mumal deuhin trainingna hmunte pawh siamin, Mizoram Youth Commission pawh kan nei a, hengte pawh apprenticeship training-na tur hmun atan hian a siam theih lo maw tih te ka sawi duh a. Tin, kan ITI te, Polytechnic te pawh hi chutiang anga thuamthat ni ta se, changkang deuh zawkin, Nation Skill Quality Framework mil zawng deuh te hian a kalpui theih lo maw tih te hi ka han sawi duh a.

Tin, a tawp berah chuan, he Mizoram Building & Others Construction Worker Welfare ang chi-ah te hian benefit a tam em em mai a. Hengho tan te hian nasa zawka an inziah luh theihna tura drive neih hi a tha lo maw tih hi ka sawi duh bawk a ni.

Tin, Pu Speaker, Demand No. 25, PHE-ah hian han kai ta ila. Lawmthu-ah khan, JJM scheme cover area nei tam ka ni a, thingtlang-in Jal Jeevan Mission atangin Mualthuam North-ah te, Chhipphir-ah te, kan Deputy Chief Minister zahawm tak Minister-na hnuiah hian tui kan pump ta a, tunah hian kan pump dur dur tawh mai a, chhungtin tan tunah public distribution system te pawh min pe leh ta bawk a, kan thawk chho mek a, kan lawm em em a ni tih ka sawi duh a, hei hi NABARD sum atangin a ni. JJM Scheme atang bawkin ka biala khua tui pump la neilo zawng zawng entirnan: Bualpui ‘V’, kan Home Minister zahawm tak lo chhuahna khua-ah te, Phaileng South ah te, Hmuntlang-ah te, Haulawng-ah te, Ramlaitui-ah te, Kanghmun ‘S’-ah te, Zote ‘S’-ah te, Chengpui-ah te hian solar pumping system DPR department ten an rawn peih tawh a, hengte hi khawngaih takin kan Minister changtu zahawm tak hianin min tih hlawhtlinsak sela, kumin Financial Year 2021-2022 chhung ngei hian hengte hi min pump sak se tih ka ngen bawk a ni. Tin, NABARD sum atanga tum turin cheng tam deuh hlek, composite scheme Pangzawl, Thiltlang leh Rawpui ten an intawm turin pump DPR sum tam tham deuh man te buatsaih a ni tawh bawk a, hengte hi khawngaih takin a rang thei ang bera min umzui sak turin ka ngen nawn leh duh bawk a ni.

Tin, a tawp berah chuan, UD & PA hi Pu Speaker, han sawi leh lawk ka duh a. Kei hianin khaw pali vel urban area cover hi ka nei a, (Pu Speaker, khawngaihtakin hei hi min zawhtir hram la,) hengte hi min thlak danglam sak em em tawh mai a, ka lawm hle a tih kha ka sawi duh a. Thil sawi ngei ngei ngai vawiin Demand-ah hian sawi ka duh chu, Serkawn hmuna kan bazaar shed hi he House-ah hian ka sawi zing ta viau a, a chhe takzet tawh a, Lunglei North lama bazaar kan neih hmun tha ber a ni a, a chhuat te ho a pawp vek tawh a, tin, rod te a lang NASA em em tawh a, hei hi chhiat rupna a thleng ang tih ka hlau tak zet zet a. Chuvang chuan, bialtu ka nihna ang pawhin hei hi ka au leh duh a, khawngaih takin kan Minister zahawm tak hian a rang thei ang berin urban infrastructure atan hian he bazaar shed hi min ngaih pawimawh sak se tih te hi ka ngen leh duh bawk a ni e.

Sawi tur tam tak a awm a, amaherawhchu heng ho hi ka sawi theih ni mai sela, a tawp ber tak takah chuan, Pu Speaker, Pu Laldenga, 'Mizo Hnampa' khaw chhuahnate kan lo ni ve bawk a, Aizawl-ah pawh Laldenga Hall lian tha tak pawh din, UD & PA ten an tum a, khawngaih takin Pu Laldenga hming chawi te hian, a pianna khua Pukpui area velah te hian infrastructure lian tha te hi a memorial atan emaw min dahsak ve thei dawn lawm ni tih te hi vawiinah hian kan ngen nghal duh bawk a.

Heng hi ka sawi theih ni se, heng demand-te hi khawngaih takin he House hian pass pui ngei ang u, tiin ka rawn thlawp a ni e. Ka lawm e.

**SPEAKER :** Tunge sawi leh ang? Awle, Member zahawm tak Pu Lalchhuanthanga ilo sawm ang.

**PU LALCHHUANTHANGA:** Pu Speaker, ka lawm e, Demand No. 20 atang hian han tan ila. School Education hi a pawimawh a, kan education kalphung fel loh zia leh tawp zia te kan sawi thin a. Tun hma atang tawha hei hi thil fel lo a ni a, UT hun lai atang tawhin zirtirtute kan lak dan kha a fello a, zirtirtu tha kan neilo thin a. Amaherawhchu hei tunah hian kan Education Minister hi a tang hlein ka hria a, beih tak takin a bei a, kan dinhmun hi a tha chho zel turah ngai ta ila.

Chutihrual chuan, Education Department hian duhsak a hlawh lo riau hian kan hria a. Hlawh chungchangah nikuma pawisa hman aiin tuna pawisa hi cheng nuai 1,634 in a tlem a, GIL salary ah hian cheng nuai 2,477-in a tlem bawk a. Tin medical treatment-ah hian cheng nuai 94-in nikum kan phalo a ni. Human Resource Development Board kha Supplementary Demand-ah cheng 20 a lang kha a ni a, mahse kumin ah dah a la ni lova. Tin, midday meal koh let nana SMS (State matching share)-ah khan nikumah cheng nuai 578 hman a ni a, amaherawhchu kuminah hian kha kha dah a nilo bawk a. Tin, he Department tan hian Capital Expenditure te, Major Works te leh Education tih hmasawnna ang chi ah khan sum dah a awm miah lo bawk a ni. Tin, HBA kan tih ang chi ah tepawh khan sum dah a ni lova, chuvang chuan he department hi, additional fund te a awm thei anih

chuan duhsak atan a tha khawp mai a, Education a pawimawh kan tih kan tih laiin pawisa lamah hian kan inren leh viau te pawh a ni awm mang e aw, ka ti deuh a.

Tin, LESDE, Demand No. 21 ah hian, OE bikah hian nikuma pawisa hman nuai 54 atangin tunah hian nuai 27-ah a tlahniam a, tin, ITI bikah hian, Salary-a employment data ngai reng siah hian cheng nuai 26 laiin a hniam leh a. A pawi em em laia chu, Youth Empowerment leh Skill Development atana sum awmlo hi a ngaihpawimawh awm khawpin ka hria. Kan thalaite tana skill development leh youth empowerment atana sum pakhat mah kan dah lo hi chu a lungchhiatthlak viauin ka hria.

Heta a lan danah hian, department hrang hranga sum kan han zir chianna ah, Revenue Expenditure atana pawisa dah tama hi kan hlau viau niin ka hria a. Hetiang anih chuan, kan hmanna ngei ngei tur, kan mamawh belhna tur ang chi ah kan dah sang chuang lova, kan Supplementary Demand ah hi chuan kan dah tam a tha viau awm mang e aw tih kha ka rilru ah a awm a.

Tin, Demand No. 25, PHE-ah hian, tunlai hian Aizawl-ah tui a harsa khawp mai a, kan vengah pawh kan harsa a, tui kan nghei ti tih tawh a, a special deuha tui han dil kha kei nuam ka tihloh zawng a ni a, tunah hian kan nghei chho tan mek a. Lei tur kan han zawng a, kar khat chhung vel atan an lo in book fel vek tawh mai a, buaithlak tak a ni. Ka tawng lo haw lo se, kan PHE Minister hi State kan nih atanga PHE Minister ni rei ber niin ka hria a, a tan deuh hlek hi chu tul awm mang e aw ka ti a, tui kan harsa tawlh tawlh mai. A department te pawhin lo hriatpui sela, tui hi kan harsa tak tak a ni, Aizawl-ah hian harsa tak kan ni. Helaia thukhawmte hi chu kan harsa lo a ni mai thei a, amaherawhchu, a mipui nawlpui ah hi chuan tui harstana a nasa khawp mai.

Tin, hetah pawh hian PHE-ah hian JMM hnuaih kan pawisa hmuhi tur cheng nuai 23,282-ah hian a do letna turin state matching share pawisa dah a ni lo a. Swachh Bharat Mission CSS hnuaih cheng nuai 1,516 do letna turin SMS hi dah a ni lo bawk a ni. JMM hnuaih khaw engzat nge hna thawh zawn anih tawh tih te kan hre duh a. Tin, Functional Household Tap Connection (FHTC)-ah engzat nge zawn anih tawh tih kha kan Minister zahawm tak khan min rawn chhan theih chuan ka lawm hle ang. Chu chu ka duh tawk mai ang e, Pu Speaker, ka lawm e.

**SPEAKER** : Member zahawm tak Pu C. Ngunlianchunga i lo sawm ang.

**PU C. NGUNLIANCHUNGA:** Pu Speaker, ka lawm e. Demand-ah lut nghal mawlh mawlh mai ila. Demand No.18, Printing & Stationery Department hi sawrkara kan awm ve laia kan lo enkawl ve kha a ni a. He department hi Mizoram sawrkar tan hian a pawimawh em em a, a pawimawh ang hian kan hmang tangkai lo thin a. Kan enkawl ve lai pawh khan theih tawpin tan kan la a, duh angin a kal chak lo khawp mai a. Kan House leader atanga

thuai ngai niin ka hria a, budget general discussion kan nei zo tawh a, kan sum leh pai dinhmun te, keimahni thawhchhuah ve tur te a tam hle a ni tih te kan sawiho a.

Chuvang chuan, hemi atan hian Printing & Sationery hian role pawimawh tak a nei a ni. Department zawng zawngin dawr ila, Calender chhut te pawh hi vai ram nen a lo inang lo deuh anih pawhin mahni ram siam ngei leh kha pawisa kha sawrkara lut leh anih avangin he sawrkar hian ngai pawimawh sela hmang tangkai sela. Chu chu sum leh pai thawh chhuahna kawngah NASA takin tangkaina a nei ang tih ka ring a. Chu chu House leader ka han ngen duh a ni.

Pahnihna-ah, School Education department-ah kal nghal mai ila. Starred Question No. 45-ah khan ka zawl a, House-ah hian ka zawl hman ta lo a, mahse, a chhanna a lo kal hman a. Chuta ka zawhnaah chuan, Samagra hian eng school chin nge a huam tih a ni a. Chuta a chhannaah chuan Samagra Shiksha hian Primary School atanga Higher Secondary School thleng a huam tih a ni a. Ka zawhna b)-ah, Autonomous Council hnuiaia Elementary School bikah hian ADC nge hian hma la a Mizoram Sawrkar-in tih ka zawhna a ni a. An chhanaah chuan, ADC-te hnuiaia Elementary School bikah hian ADC-in hma a la a, an mamawh angin Samagra Shiksha atangan an dawn tur ang chu pek zel an ni tiin min chhang a.

Pu Speaker, helaiah hian kan Minister zahawm tak leh sawrkar ka ngen duh em em chu, Elementary School hi *6<sup>th</sup> Schedule to the Constitution*, para 6-na, No 1 & 2-ah chiang takin kan hmu a, District Council te thu neihna a ni a, tun hma pawhin SSA a lo kal tawh a, central atangin scheme thar a lo chhuak a. Chutah chuan, District Council area-ah chuan District Council kutah, hei hi MNF sawrkar hmasa hunlaia lo chhuak a ni a, an pe mai a. Tichuan, SSA chu tawpin Samagra Shiksha-in thlak a rawn ni a. Tunah hian District Council kutah an duh leh mamawh ang pek ringawt ni lo khan, India khua leh tui kan ni a, dan hnuiaia awm kan nih angin Autonomous te thu neihna hi kan zahsak a tha a, Samagra Shiksha chungchanga hian Tipa bialtu lo sawi tawh ang khan. Tunah hian DPC hi DEO hnuiaih Mizoram sawrkar awpna hnuai atangin enkawl a ni a. Tichuan, DPC hi District Council hnuai atangin Officer pakhat dah ve a ni. India Constitution hnuiaia 6<sup>th</sup> Schedule, para 6-na-a thuneihna a pek angin, Autonomous District Council-te hian thu neihna an nei a. Chu chu 1993 khan Mizoram sawrkar Council of Minister meeting chuan 6<sup>th</sup> Schedule to the Constitution, para 6-na, No. 1 & 2 zul zuiin kum 1986-a Mizoram sawrkarin thuneihna ADC-te hnena a lo pek tawh ti danglamin, subject department 20 a pek belh a. Hei hi 6<sup>th</sup> Schedule to the Constitution, India dan pui amend anih avangin tun hma department ai khan department 20 a pek belh a ni.

Chuta a pek belhah chuan annexure list siam a ni a, No.16-naah chiang takin Education Department a inziak a, Primary School, Adult Education leh Middle School te a tel a ni. Chu chu kum 1993 Council of Minister meeting thu chhuak angin Mizoram Governor pawhin Ni 1.8.1993 khan lehkha No.B20013/94-Education hmangin fel fai takin

an dinhmun tur thuneihna a pe tawh bawk a. A chunga provision hmang chiah khian ADC-te hian Establishment & Management Elementary School Education Regulation-te insiamin Mizoram sawrkar leh Governor pawhin a pawmpui thlap a ni.

Khitiang Dan an neih ang hian Samagra a rawn awm khan ADC hotuten Mizoram sawrkar Education Department hnenah Elementary chin hi an kuta thu neihna pe turin an lo dil nghe nghe tawh a. Nimahsela, Mizoram sawrkarin an dil anga peka hnekin harsatna an siam sak takah chuan, India sawrkar Ministry of Education hnenah Constitution chauh nilo, Mizoram sawrkarin Education thuneihna a lo pek tawhte pal zuta chhuh sak annih zia thu te an zuk thlen ve nghe nghe a ni. Chu chu Education Ministry chuan ngai pawimawhin Ni 10.9.2020 khan Mizoram Education Secretary hnenah lehkha rawn thawnin, a hma thei ang bera he thilah hian an ngaihdan sawi turin a rawn ti a. Mahse, an chhan mai loh avangin Mizoram sawrkar Education Department-te hnenah chuan reminder Ni 2.11.2020 khan an rawn thawn leh a, khangte kha chhan a ni tawh em aw? Chhan a nih chuan khawngaih takin a chhanna copy kha min pe ve thei hram se ka duh khawp mai a, hei hi kan Minister khan min react sak se ka duh a. Mizoram Sawrkar Education Department ten an lo chhang anih chuan khalai kha hriat ve pawh ka duh khawp mai a.

Tin, kha mai kha ni lovin, 6<sup>th</sup> Schedule, para 11-nain a phalsakin ADC-ah phei chuan Mizoram Sawrkar Governor pawmpui thlapin Allocation of Business Rules, 2013 siamin Scheduled 20-naah Primary Education leh Middle School te appointment te, posting & transfer te leh administration thil zawng zawng pek a ni bawk a ni. Pu Speaker, hengte avang hian District Council hotute'n 'direct finance' an tih, power lian zawk an dil an dilna chhan te pawh hi, India Dan chhunga thuneihna an neih ve hi helai atang hian kan pawngsualsak thin em ni le tih tur a ni a. Nikum maiah pawh khan eng emaw zat pawh a awm tho ang a. Vaseikai, hei hi ka bial a ni a, chuta thawk chu MDC a inpek dawn avang khan a bang a, chuta tang chuan Lalchhantluanga Sailo, a ni hi Kalvari Comprehensive School, TNT, Muanna Veng, Aizawl-ah dah daih a ni a. Tin, chu mai chu ni lovin, Henry M.S. Dawngliana, hei hi a thi a, ani pawh hi Health & Physical zirtirtu, Rose Bud Council Veng, MLA zahawm tak Pu Biakzaua bial a ni a, chu post-ah pawh chuan K. Vanlalruati an la a, MICC School, Tuikual 'B' ah an dah leh daih mai a. Chumai chu ni lovin, T.H. Roherliana, hei hi a bang a, Pandawnglui School ka bial chhunga mi bawk a ni. Lalawmpuia an la a, North Tinghmun Middle School-ah dah leh daih a ni a, hetianga sawlaia zirtirtu indaih loh tehlul nen District Council-in sum an indaih lo em em a. Lunglei North bialtu zahawm tak khan, tun sawrkar maiah khan M.R. leh fixed pay zirtirtu 50 chuang MLA bial khatah pawh a luh theih lain sawlaia an neih chhunte chhuhsakin helama an post chawpa kan chhuhsak kha chu India constitution hi kan pawngsual niin a lang tlat a ni. Chuvang chuan Pu Speaker, khawngaih takin kan Minister zahawm tak khan min hriatsak sela, Council thuneihna anih ang takin tunah phei chuan MNF sawrkar a ni tawh lehnghal a. A tua te pawh ni se, sawlaia ram leilung faten chang ve hram thei sela tih kha Pu Speaker, ka sawi ve duh a ni.

Demand No. 28, LESDE-ah hian Lawngtlai East bialtu khan a sawi tawh a. Lawngtlai khi District Capital a ni a, kha, Pu Thiama te chuan Employment Officer an hmu bik a, Session hmasa lamah pawh kan sawi tawh a, keini chu UDC pakhat leh IV-Grade pakhat, chu pawh chu Chawngte ami, Sub-Division atanga district min rawn awp kha a ni a, engpawh nisela khawngaih takin Officer kha min rawn dahsak ve hram sela kan va han mamawh em. Tin, Chu mai chu ni lovin, tun sawrkarin thil tha tak atih IAS coaching centre te kha Lawngtlaiah hian dah ve theih ni sela, a chhan chu, Lawngtlai hi un-divided Chhimtuipui-a khawpui laili ber, han pan khawm pawh remchang a ni a tih kha ka sawi duh a ni.

Tin, Education-ah bawk khan, Higher & Secondary School Diltlang South, ka bial ami hi lump sum grant-a dah ve a ni a, hei hi hlan chhoh ve nise a duhawm khawp mai a. Chubakah Bungtlang South hi ka bial chhung khaw mala lian ber a ni a, chutah chuan Higher Secondary School hi private-in an din a, kei pawhin kum tin ka MLA fund atangin cheng nuai hnih ka thawh ve a ni, an hlawh atan. Kan Minister khan nakum lamah kan ti dawn nia a ti a, mahse kuminah a tel ta lova, khawngaih takin min hriatsak se.

Tichuan, Demand No. 25, Public Health-ah hian sawi tur a tam khawp mai a. A bikin JMM kha a nghahhlelh awm ka ti a, amaherawhchu, 2023-a zo tura tih kha kan bial ringawt pawh hi hma la se an zagh hman ka ring lo a ni. Ka bial Lawngtlai khawpui-ah te pawh sawrkar hmasa khan tui min han pump sak a, Lawngtlai East bialtuin a sawi ang khan kan khamkhawp tawh lo hle a. Chumi piahlamah chuan town chhunga awm ve tho si tlema khaw per Mampui leh Thingkah, Thingkah phei chu a pawimawh lehzualna chu IR Battalion kha March thlaa building pawh zagh mai tur a ni a. Department lam atangin proposal Mampui-ah leh Thingkah-ah hian siam a ni tawh a, khangte kha a hmasain min tihhlawhtlinsak se ka duh khawp mai a.

Tin, Diltlang hi, a party ang zawngin sawi ila a mawi lo em ka hre lova, MLA ka inpe tawh a, chak lo tak zel hi ka ni mai a, an tui lak hi an kham lovin a chhe khawp mai a, a *intake* a thlalak ka nei a, kan Minister hnenah hian ka pe ang a min lo hriat fiah zual theih nan. Han en ila mangan thlak tak mai hi a ni a, kum 20 kalta vela tui lak tawh kha a ni a, an kham lova, theih phei se chuan thal chhung chauh tal han chawisak thei se chuan a duhawm khawp mai a. Chutiangin kan bialah khuan khaw hrang hrangah kan sawrkar ve lai khan BADP atang tein Solarpump ruahmann te kan nei a, additional fund atangin. Tunah hian Hmawngbu te, Sabuaitlang te Tuisentlang te, kan lo ruahman vena kha a lo chhuak a, lawmawm pawh ka ti a. Chumi piahlamah chuan ka bial bik Lawngtlai West saw rethei bawk si, la hnufual bawk si, la chhangchhe bawk si tui leh in tur harsa tak mai kan ni a, JMM atangin khawngaih takin hma min laksak kan duh khawp mai a. Tin, Lawngtlai khawpui tui pump a ni a, kan lawm khawp mai a, chutih rual chuan, kan kham khawp ta lova. A khaw per kan tih town chhunga awm ho kha min hriatsak ka duh a, ka han sawi nawn leh kher kher duh a.

Tin, Pu Speaker, Lawnglai hi town kan ni ve a, MLA kan thian ten UD & PA atanga malsawmna an dawn nasat zia han hmuh chuan keini chu dawhkan hnuai luha ngawi renga lo ngaihthlak tur chi em ni, engmah hmuh kan nei ve si lova. Lawnglai khawpui te saw khawpui, urban area kan ni ve a, nikum session-ah pawh khan ka sawi tawh a, khawngaih takin atih theih ang chin chinah Lawnglai khawpui pawh saw chei kan ngai ve a, duhsak hi kan ngai hle a ni tih kha. Pu Speaker, tih leh hun chuan darkar chanve theuh thusawina hun i nei ang u, kan khamlo a ni.

**SPEAKER :** Awle, Member zahawm tak Pu Zodintluanga Ralte ka sawm e.

**PU ZODINTLUANGA RALTE:** Pu Speaker, ka lawm e. Vawiin-ah kan Minister zahawm takte pahnih, Pu Lalchhandama Ralte leh Pu Tawnluia te demand kan sawi dawn a ni a. Chawhma leh chawhnu lamah te i dinglam pang leh ruling MLA ten an bial chhunga an mamawh hrang hrangte an sawi a. Hei term 2-na a ni tawh an han sawi ngaihthlak kha chuan Pu Speaker, kan sawrkara hian an lungawilo hle a ni. Kan sawrkara Minister te leh kan MLA te thawhhona a thalo hle a ni tih kha a chiang em em mai a. Keini opposition zawk ho hi chuan kan bialchhunga kan mamawhte hi Minister-ah kan sawi a, a theih ang angin min tihsak a, heng House-ah hian mipui hriatah leh bial mipui hriatah kan sawi vak lova. Vawiinah pawh hian pakhat chiah kan bial chhung ami, minister bula ka sawi tawh, mahse a hlawhtlin leh hlawhtlin loh zawhna mai tur ka rawn sawi dawn chauh a ni a. Kan MLA te kha an bial mipui ten an lo ngaithla ve ang a, kan sawrkar hian an va duhsak lo e aw an lo ti ang tih ka hlaupui khawp mai a. Chuvang chuan kan sawrkar leh kan MLA te thawhhona kha a tha vaklo niin ka hria a, kha kha ka rawn sawi hmasa duh a.

Pu Speaker, Demand No. 13-na hi rawn sawi hmasak ka duh a. Sawrkar thar a lo pian hian sawrkar hmasa khan sawrkar hnua lut turin mitha tak tak lak theihna tur atan MPSC chak takin kan siam a, chumi hnuaiah chuan sawrkar hnathawk turin a thiam, a tha an lut thin a ni. Sawrkar a lo pian veleh chu chu duhkhawp lovin Mizoram Subordinate Service Selection Board (MSSSB) an han din a. Tun Session chhung hian zawhna ka pe a, he MSSSB hian hna pakhat mah a la lalo a ni. Chutih lai chuan chu an Board dina pawh chu ring lovin Education leh department hrang hrangah sawrkar hnathawk lak tam zia kha vawiinah pawh kan hria a ni. Chuvang chuan, kan sawrkar hi a fair lovin mi tha an la lo a ni tih kha a chiang em em mai a ni.

Pu Speaker, i phalnain MPSC thuchhuak hi ka han chhiar chhuak ang a, "Mizoram Public Service Commission-in Land Resource, Soil & Water Conservation Department hnuaia ASCE exam Dt. 5.9.2020 to 2021-a a buatsaih takah khan Dt. 8.2.2021 chawhma exam, Civil & Agriculture Engineering bikah khan, exam-na hmunah zawhna chhan dan tura inkaihruaina inhrilhfiah sual leh felfai tawklo a awm avangin technical paper-I bik hi exam cancelled a ni tih ka rawn hriattir che a ni. Exam that leh hun tur chu a hranpaa inhriattir leh a ni ang. I rintlak, V. Lalhmingchhuangi, Deputy Controller of Examination,

Mizoram Public Service Commission, Aizawl” tih a ni. Pu Speaker, officer hna lakna turah pawh kan sawrkar hi khatiang mai mai khan a kal tawh a ni. Khami nia exam, exam hmaa nasa taka in prepared te an rilru leh an thinlung zawng zawnga an lo in puahchah tawhna zawng zawng te kha, khang kan sawrkar-in a lak serious tawk loh vang leh fimkhur tawk loh vanga khatianga exam cancelled leh ngai te kha an khawngaih thlak em em mai a. Chuvang chuan, kan thalai lehkathiam ten hman nia ka sawi tawh ang khan, he sawrkarah hian rinna an nghat tawhlo nasa a ni. Chuvang chuan, kan inenleta, sawrkar hna kan lak pawha dik taka mitha/mithiam kan lak theihna tura tan an lak loh chuan Zoram mipui hian an hnawl mek a ni tih hi ka rawn sawi tel duh a ni.

Tin, Demand No. 13-na thoah hian Pu Speaker, kum 2016-ah khan, sawrkar hnathawkte an lak dawna computer an thiam chin, an certificate pe theitu tur chu, ‘Mizoram State Council of Technical Education ami chauh a ni’ tih kha, helaiah khan kha kan sawrkar khan a siam a. Amaherawhchu, Member zahawm tak Pu Lalruatkima, vawiina kan Minister zahawm tak hian he thil hi kan thalaite tan a thatloh zia nasa takin a sawi a, Delhi leh hmun hrang hrangah-ah computer an zir ve a, chuvang chuan Mizoram bik ringawt kan tih hian a dik lo a ni a rawn ti a. A sawi zawh rual la lain kha tih laia Chief Minister zahawm tak Pu Lalthanhawla’n “hei hi chu a diklo a ni, kan siamtha leh nghal ang’ a ti a. Chutah chuan siamthat leh nghal a ni a, sawrkar Gazette-ah pawh a rawn chhuak a, sawrkar gazette-ah chuan, “Mizoram State Council leh Technical Education bakah Govt. of India ina a approved te” tiin a rawn awm ta a, chutiang chuan hman reng a ni a. Amaherawh chu sawrkar thar alo piang a, January Ni 10, 2019-a a lo pian hlim khan OM order an rawn chhuah a, sawrkar gazette a chhuak tawh pawh kha kan sawrkarah hi chuan OM-in a rawn cancelled tawp mai a ni. Chung a rawn tiyah chuan, Pu Speaker, “The Government decided to accept only the certificate issued by Mizoram State Council of Technical Education w.e.f. 01.11.2013 as proof of having fulfilled the qualification” a rawn ti leh ta a ni. Pu Speaker, hei hi kan sawrkar hmasak pawha kan Minister zahawm tak Opposition MLA anih laia a ngaihpawimawh em em State sawrkarin a lo thlak tawh hi khawngaiha ti danglam leh turin kan Minister hi ka ngen a ni. Anih loh chuan, sawrkar hna exam an han ti dawn ang a, Mizoram ami chauh kan pawm anih chuan lehkathiam tam tak Delhi, Kolkata etc.-a kan zirlaite khan hna an rawn dil ve theihna tur atana siam leh turin ka rawn ngen a ni.

Tin, Demand No. 18, Printing & Stationery hi, vawiinah kan House Leader a awm a, kan sawrkar lai pawha ka ngaihdan tho a ni a, vawiin hian sawi leh ka duh a, a Minister chang mek te, a lo chang leh turte an tang em em a. Pu Speaker, sawrkar department hi ka ngaihdan chuan sumdawng tur kan ni lo a ni. Printing and Stationery-te hi sawrkar-in a print tur bik confidential-ah chuan tangkaina tam tak a nei a, mahse market atanga stationery lakhawma sumdawn nana department dang zawng zawnga hrakh chhuak leh tur chuan sawrkar hian kan tlin lo tlat a ni. Tin, sawrkar department hi facilitator nih maia, sum tuak tur department kan ni loin ka hria a, hei hi kan House Leader pawhin nakinah min lo ngaihtuah pui se la. A tih tur bik, confidential tak tak, sawrkar thil chhut turte, gazette-te, election process-te a awm a ni. Mahse, tunah chuan a changtu Minister apiangin a thawhpui

Minister-te hnenah ‘I department-in Printing & Stationery min dawr lo, chumi department chuan a dawr lo’ tih a ni reng mai a. Chuvang chuan, he deparment hi sumdawnga sum tuak tur kan ni lo, sum tuak tur chu Taxation Department mumal takin an awm a, chuvang chuan, Printing & Stationery Department hi tihdanglam a tul hlein ka hria a, ka rawn sawi duh a ni.

Demand No. 46-ah hian, niminah Finance Minister zahawm tak ka zawt tawh a, nikum budget session-a, ‘tuna Budget Session kan neih lai mekah pawh hian UD & PA-ah \$ million 248 pawh kan hmu a’ a tih kha niminah ka zawt a, amaherawchu a changtu anih loh avangin a hre chiang lo a ni mai thei a. Pu Speaker, kan Minister zahawm tak hian nikum Budget Session kan neih laia \$ million 248 kan sawrkar-in hmu tawh anga kan sawi kha, cheng engzat chiah nge kan hmuh tawha, engzat nge kan hman tawh tih he House kaltlang hian min hrilh thei se.

Tin, sawrkar thar a lo pian khan kan Dy. Chief Minister, UD & PA changtu zahawm tak hi damlohma avangin a awm lo a. Amaherawchu, khatihlai khan a department kha chu thil hrang hrangah khan kan inpawt ho nasa a. Khami tuma he House-ah ngei pawh an sawi chhuah, kan MLA tam takte pawhin lawmthu an sawi, Aizawl khawpui chhunga khelmual chhawng sarih UD & PA atanga siam tur an tih kha siam tawh a ni em, siam tumna a la awm reng em, khelmual chhawng siam tur khan pawisa engzat nge kan dah tih min hrilh thei se la. Tin, nichinah Member zahawm tak tak ten an sawi tawh a, sorkar hmasa atanga Aizawl khawpuiin darkar 24 tui herh haw theihna tur atana project Tlawng panna, tuna an thawh mek hi kan kaltluangin a hunah kan zo thei ang em tih min hrilh turin ka rawn ngen bawk a ni.

Demand No. 25-naah hian point khat lek rawn sawi ka duh a. Nichina ka sawi ang khan Member-te hian thu kan sawi dawn hian tam tak chu a background hi kan hrechiang lo em maw ni chu aw ka ti a. Lawmthu sawinaa an rawn sawi, tun sawrkar chak takin a tihchhuah anga an rawn sawite hi a background tlem han enchiang se la chuan sawrkar hmasa atanga an lo thawhchhuah vek tawh, tun kum 2 chhunga DPR siama hnathawh zawhna hun a awm lo tih hi Zoram mipuite hian kan hria a. Amaherawchu, khatiang hre lova, kum 2 chhunga project lian tak tak rawn chhuak thei anga an rawn sawi te kha, Pu Speaker ka rawn sawi ve duh a. A bik takin Tawihtlang atanga tui pump tur kha kum tam tak, rei tak DPR siama sawrkar hmasain a lo lak tawh kha 4<sup>th</sup> Dec, 2018 khan vaibelchhe 119 kha an sanction daih tawh a ni. Khangte kha member la hre lote ka rawn react tel duh a.

Tin, Education chungchang hi nichina ka sawi ang khan, kan bial chungchang hi kan Minister-te an fel a, an dawhkanah min tihfel sak nghal zel mai a. Helai hi a bulah pawh ka sawi tawh thin a, nichina Lunglei North bialtuina a biala zirtirtu tam tak lutte kha an ni ve ang em ka hre lo va, Thorang biala zirtirtute hi chu sawn chhuah vek an tum emaw ni tih mai tur hi a ni a. A khaw hming chu amah pawhin a hre tawh a, nimin piah lawkah pawh khaw pakhat atangin transfer a ni leh tawh a. A khaw hming chu sawi loin nakinah amahin

khang zirtirtu kan neih lohna khuahte khan min dahsak thei dawn em, nge ni Thorang Bialte chu opposition bial a ni a, lehkha thiam lo se la, zirtirtu pawh nei lo se la kan ti dawn nge tih kha ka han zawt duh a.

Tin, zirtirtu lak turte pawh a la awm a, khawngaih takin MPSC-in a la thei loh anih pawhin heng kan zirtirtu lak leh turte hi MSSSB kaltlang tala lak theih ni se la. Chutiang anih chuan mipuite pawh kan lawm ang a, Minister dawhkan atanga a tling tur leh tlinglo tur select-tu nih mai aia board-in tha taka a lak kha Pu Speaker, kan ram, kan hnam tan a tha dawn a ni. Pu Speaker, ka hun a tawp tawh si a khang kha ka sawi theih chu ni se la. Kan Education Minister zahawm takin ka bial chhunga zirtirtu indaihlohma kha khawngaih takin a wind-up laiin min rawn hrihfiah turin ka rawn ngen nawn leh a ni e. Ka lawm e.

**SPEAKER** : A tha khawp mai. Tunge sawi leh dawn? Member zahawm tak Pu Vanlalhlana sawm leh ang.

**PU VANLALHLANA** : Pu Speaker, ka lawm e. Vawiinah Minister zahawm tak pahnih Pu Lalchhandama Ralte leh Pu Tawnluia, Dy. Chief Minister Demand-te kan sawi a ni a. Minister zahawm tak Pu Tawnluia hi tun tumah hian kan zingah hian a upa ber niin ka hria a, department pathum hneh takin a la enkawl thei a, hriselna tha tak neiin, a lawmawm khawpin ka hria.

Ka sawi tur point tam tak hi, vawiinah nileng deuhthawin kan ngaithla a han sawi ve kher kha repetition a tam dawn riau mai a, chuvangin ka sawi vek lo mai ang a. An sawi loh leh an sawi dan ni lo deuh point thenkhat tlem a zawng ka han tarlang ve ang a.

A hmasa berah chuan Demand No. 46, PAHOSS chungchang hi. PAHOSS hi mihring ni ta se a khawngaihthlak awm ka ti a. A awmzia hi ‘Parking House Support Scheme’ a ni a, Aizawl-ah traffic jam-in min tibuai nasa em em a, kan hotute tawngkam takin, “traffic jam awmlohma State Capital awmchhun ni turin Aizawl kan siam dawn a ni” tia mawhphur tura PAHOSS hi lak chhuah a ni ta a ni. Tichuan kan ngaihthlak angin pawisa pawh kum tir atangin dah a ni a, tunah hian mi engemaw zat he Support Scheme PAHOSS tihlawhtling tur hian thlan an ni a, pawisa hi engzat chiah nge sem anih kan hre lo a. Tin, PAHOSS atana beneficiaries thlan hi a list, question chhanna kha session hmasa lamah khan kan hmu a, a vaiin kan la zir lo naa kan theih ang chin chin kan han zir a, kan zir tawh chinah chuan a hlawhtling lo mai ang tih hi ka hlau viau a ni. A chhan chu, he PAHOSS tihlawhtling tura thlan beneficiaries thenkhat hi a veng mite pawhin an hriat loh leh an hmuh zawh loh a awm nual a ni.

Tin, an mi thlan hming thenkhat lo lang hi khatianga Parking House sakna tur remchang neilo an awm nual bawk a ni. Thenkhat chu insak tawh engti kawng maha motor luh remchan lohma kha a awm bawk a ni. Tin, beneficiaries thenkhat, parking House motor park tur 10 ka nei, 15 ka nei, 20 ka nei tih kha han survey hian khatianga an chhan zat kha a

accommodate theih loh a ni. Chutiang anih nawk avangin he Parking House Support Scheme thatak anga lang hi a hlawhtling lo ang tih hi ka hlau a.

Tunah 1<sup>st</sup> batch te pawisa pek an ni tawh a, 2<sup>nd</sup> batch te la pek loh an ni maithei, engzat nge dawng tawh, la dawng lo ka hre lo. Engpawnise, he Parking House Support Scheme hi scheme tha tak a ni a, a tum pawh a tha, traffic jam-in min tihbui nasat zia kan hria, hotute pawhina an han ngaihtuah chhuah pawh hi a tha. Amaherawhchu, a tihhawhtlinna tur, a implementation taka hi a beneficiaries atang hian fimkhur a thain ka hria a, chu chu kan sawi hmasa duh a ni.

Tin, a dawt leh atan chuan Demand No.46, SIPMIU chungchang ka sawi duh a. SIPMIU-in bawlhhawh chungchangah mawhphurhna an la a, enge an thlen tawh chiah ka hre lo, Tuirial lamah khuan an inbuatsaih nasa hle tih chu ka hria a. Tunah hian UD & PA, SIPMIU chuan chu mawhphurhna chu pek hnaih an tum niin ka hria a, AMC sawrkar chuan tunah chuan Mayor leh Deputy Mayor-te leh Counselor hovin a hmunah an han en a, lak hi an huphurh viau a ni. SIPMIU ina bawlhhawh sawngbawlna hlan an tum hi a lakchhawn an huphurh viau a ni, enge ni a chhan ka hre lo. Chuvangin SIPMIU-ina he bawlhhawh sawngbawlna buatsaih chungchangah hian thil diklo a awm nge anih dan turin thil a nilo nge nia mawhphur tur leh a enkawltu tur ten lak an huphurh viau ringawt mai kha, a chhan a awm ngei ngeiin ka ring a, chu chu kan tarlang duh a.

Tin, vawiinah Member pakhat pawhin a tarlang tawh a, Municipal Council chungchang, “Municipal Authority, Mizoram khaw lian deuhah chuan Municipal Council din a ni ang” tih kha sawi rik thin a ni a. Tunah hian kum 2 an sawrkar dawn tawh a, term chanve kan lo thleng dawn tawh a, Aizawl Municipal Council, Account Municipal Corporation-ah pawh hlan a ni a, a lawmawm a, khawpui dang khawite hi nge ni Municipal Council ni dawn tih te hi tihfel a hun tawh khawpin ka hria a. Tin, chute ruala ka tarlan duha chu, 73th Amendment-ah Panchayiti Raj kan hmu a, chutah chuan *3 tiers system* hi a sawi a ni. Tunah hian 2 tiers system deuh chauhin kan la kal a, Unit level, Block level leh District level-a awm tur a ni a, Unit level-ah chuan kan nei mai a Local Council te pawh, Block level-ah pawh Development Authority te kan nei deuh ti tih a, BDO hovin, District level-ah hian kan nei ve ta lo a. Anmahni level theuhah khan pawisate pawh dawng niin a lang si a. Chuvangin hei hi a talh kim nan 3 tiers system-a kan kal ve law law hi a tha lawm ni ka ti a. Tin, Village Council, an thuneihna leh Law te, an Dan inkaihhruaina te pawh ennawn a hunin, an hlawhte pawh hi ennawn that a tul tawh hlein ka hria a ni.

Tin, Demand No. 25, tui chungchang kha tawitein kan sawi ve ang a. Kan ngaithla zo chiah a, Tawitlang atanga Aizawl-a tui lak tumna kha a rei ta viau a, Aizawl-ah tui kan khawp kham silo a, Phase-I kan hmu a, Phase-II kan hmu a, kan la khawp kham chuang lova. Tui zawrh hi sumdawnna hlawk tak a la ni reng a. Chuvangin Tawitlang atanga tui lo thlen thlak hi a nghahhlehawm hle a, SIPMIU-in Aizawl North chawm turin a buaipui mek a, a la peih lo deuh a, kan nghakhleh em em a ni keini Durtlang leh Bawngkawn lam te

chuan. Tin, lo thleng ta se kan indaih tak tak ang em tih te pawh hi a rinhlehawm deuh a ni. A lo thlen chuan a tha a, amaherawhchu nitin mamawhna a sang zel a, Durtlang-ah kan hriat angin Hospital lian a awm zel a, College 4 Zirtiri College a awm dawn bawk a, Women Polytechnic a awm a, Hindi College leh ICFAI a awm bawk a. BSF te an awm a, SIRD office lian tak tak khatiang kha an awm a ni, a mihring cheng te bakah hian. Chuvangin, tui kan mamawhna hi a sang dawn em em a, Durtlang atanga chhuah lampang maiah khan hnaiteah Tuipawl, tui tha tak a awm a, chutah chuan Durtlang chawm tur hi tui a pump chho theih a, Sihphir leh Bawngkawn thlengin a chawm thei a ni.

Chuvangin, he SIPMIU ina tui a pump chhuah Tlawng ami hi lo thleng pawh nise sawrkar hianin hmun danga a tih ang hian khilai Tuipawl atang khian Durtlang-ah tui hi min lak chhoh sak se hnianghnar takin kan awm theiin ka ring a. Tin, mihringin kan mamawh chauh kha a tawk lo a, Durtlang chu khaw taima kan ni a, ran vulhte, huan tlhai neihte kan ching a, Aizawl khawpui hi kan tlhai leh bawngnutein kan chawm kan in ti ve a ni. Chungah chuan kan eizawnna kawngte hlawk zawka kan neih theihna turin tui hi min pump chhuah sak se tih kha kan Minister zahawmtak hi ka han ngen duh a ni.

Tichuan Demand No. 20-ah ka han kal leh lawk ang a. School hi chi 3 vel kan nei a, Govt. School, Deficit School leh Autocad School kan nei a, tin, private school kan tih ang chi te a awm leh a. Tuna kan sawi duh taka hi chu, Mizoram Govt. Autocad Teacher Association ho hian an dinhmun an han inen hian hreawm an ti a ni. Keipawhin an dinhmun hi ka hriat thiampui khawp mai a, school an din a, chutah chuan an han in nhat ve a, hlawh tlem te sawrkarin a puihna ringin an awm a. Tichuan mi tamtak hi kha School-ah khan chu kum 30 te an thawk tawh a ni. Eizawnna dang, hna dangah an zuang lo, kha school-ah khan an inpumpek a ni. Tamtak chu reilotea pension mai tur an ni a, pension benefit pawh nei miah loin ti khan *an mai par thlawn* tawp dawn emaw te a ni a. Chuvangin, heng harsatna hi MNF sawrkar hi a hrethiam thin an ni a, tunhma pawhin *mass-provincialization* an siam a ni. A leh lamah chuan sawrkar sum chu NASA takin a hek, mahse mipui an hlim tlat a ni. Khatiang khan tun dinhmun su su-ah ni lo mahse, harsa taka school lo din han duhsaka sawrkara han hlan kai ve kha an phu em emin ka hria a, chu chu sawrkar hian min hriatsak se tih kha ka chah duh a ni.

Tin, i ding lama mite leh i veilama mi ten kan sawi inang lo deuh mai chu, zinga a sawi hmasa ber atang khan ka lo chik a, i dinglama mite hi chuan anmahni bial chhung school an sawi khan, ‘zirtirtu chuti zat chu kan hmu a’ tih appointment kha a awm deuh vek a ni. Heti lama mite hi chuan School chhiat zia te, zirtirtu indaih loh zia te kha kan sawi NASA thung a, kan bial chhungah eng ang appointment nge lo awm tih kha kan hre ve miah lo; a chhan chu recommend kan va nei ve lo niin ka hria, chu chu kan inanlohna pawh a ni e.

Demand No.18, Printing & Stationery chungchangah hian ka han sawi ve duh chu, “stationery mamawh zawng zawng hi chuan Printing & Stationery Department atang hian kan mamawhte kan lam khawm tur a ni” tih kha sawrkar thu a niin ka hria a, session

apiangin, ‘lamkhawm lo an awm em’ kan inti thin a, an tlem sawt hle a. Sawrkarin stationery lakhawm tur leh department hrang hrangte mamawh kawl tura atih chu heta tang hian department-te hian lam se ti hi a tha rengin ka hria a. Tin, Printing & Stationery hian tunah phei chuan khawl tha tak tak a nei tawh a, calendar te pawh mawi tak takin a print thei tawh a. Department hian calendar neih hi kan intihmuh tawh a, department hrang hrang hian calendar hi mawi tak kan nei vek a ni. Heng hi Printing & Stationery kut chhuak a ni em ka hre lo va, kan Minister hian khawi department nge calendar a print sak tih te pawh hi min han hriattir se tih te pawh kha ka ngen duh nghe nghe a ni.

A tawp berah chuan, *skill development* hi a pawimawh em em a, tunlaiah skill tel lo chuan eizawnna a hmuh theih tawhloh tluk a ni a. Mizoram-ah ITI pathum kan nei ve a, ahmunah te han kal ila a changtlung lo em em a, chuvangin hengte hi tih changtlun a tul a ni. District tinah awm se, tunah phei chuan district tharte kan lo nei leh ta a, hengah te pawh hian ITI tha tak, eizawnna kawng kawhhmuh tur thiamna (skill) an neih an zirna tur a ni a, chu chu ngaipawimawh a tulin ka hria a. Tunah phei chuan National Skill Qualification Framework pawh a awm leh zel a, chu chu class 1 - 10 thleng a awm a, an thiamna, an skill san dan indawt zelin chutiang chu kan apply ve a hun a. Foreign-ah te, India ram state dangah te pawh an kal ang a, eng skill nge an neih tih kha tehna a ni fo dawn a ni. Chuvangin, National Skill Qualification Framework hi kan hman tangkai chhoh ve zel a thani ka ring a. Mizoram Youth Commission kan nei a, an tangkai khawpin ka hria a, *stranded labourers*, Covid avanga tangkhang te eizawnna tur skill an neih theihna turin training te an pe a, chungte chu thil tha tak niin ka hria a, an chhunzawm zel pawh ka duh a ni. Chu chu ka sawi theih tawk ni mai teh se. Pu speaker, ka lawm e.

**SPEAKER** : Sawi tur kan awm tawh lo em ni? Aw le, sawitur kan awm tawh loh chuan Minister kan sawm tawh ang a. Tunah, Pu Lalchandama Ralte, Minister zahawm takin a department chante sawihona kha rawn wind up se la, sawifiah ngai atih te rawn sawi fiah bawk se la, tin, House-a pass rawn dil nghal bawk se.

**PU LALCHHANDAMA RALTE, MINISTER:** Pu Speaker, ka lawm e. Member-te kan sawihona boruak ngaihthlak a nuam a, a Minister, mawhpurtu han nih pawhin, member-te rawtna te, an thusawi te uluk takin kan lo ziak a, kan lo chhinchhiah a. Vawiinah hian a zavaia an duh te han react hi, kan chhinchhiah tho a, an duh chuan ka react thei ang a. Amaherawhchu, ka react chuan a rei viau dawn a, in sawi ang ang kha chu ka *note* a, a hlawm deuhin ka rawn ti ang a. A pawimawh lai deuhah chuan inzawh a tul anih leh inzawt ta mai ila, chuti anih loh chuan kan hun hi a rei deuh avangin; chu chu Pu Speaker, ka han sawi hmasa duh a.

Demand No.18, Printing & Stationery Department-ah hian a lawmawm hlea ka hriat chu, member zahawm tak tak 10 zetin min han sawipui a, department rim taka hna thawk, mi hriat lem loha hah takin, a bik takin kan session lai phei hi chuan zan dar 10 thleng deuh ngar ngar mai an thawk a, an activity kan hmuhpui tawk loh thin leh sawi hlawh lo deuh

thin kha tun tumah kan member 10 chungchang kan han sawi hi lawmawm ka ti a, a hmasa in lawmthu ka sawi a ni. An activity tlangpui kan hria a, lehkha chhut hna hrang hrang, sawrkar thil pawimawh chhutu, siamtu an ni tih kan hria a, kan VIP speech te, Govt. Gazette te, confidential work zawng zawng khawihtu te hi an ni a, an mawhphurhna vawiin thlengin staff indaih lo tak chungin a thawktuten an hlen thei thin hi a lawmawm hle a ni.

Kum 2020 leh 2021 ah hian kan revenue target hi ₹180.53 lakh a ni a, tun dinhmunah hian ₹33,35,140 kan hmu tawh a. Kan hriat angin nikumah Covid-19 avangin harsatna a awm a, Govt. activities te, pawn lam mite pawh inkhar khip avangin activity engmah kan nei hlei thei lo chungin heti zat target hnai tak kan han thleng thei pawh hi a lawmawm khawpin ka hria a. Kan hnathawh theih hun chhung hi a tlem ang aiin March hi han tawp se la, kan target hi kan achieve thei mai ang em aw tih theiha a han awm hi a ropui ka ti a, chu chu ka sawi duh hrim hrim a.

Tin, kumin kum kal lai chhung hian Govt. Gazette hi issue chi hnih regular issue 59 kan chhu a, extra 854 issue kan siam bawk a, sawrkar thupuangtu, thil pawimawh zawng zawng siamtu kan nih avangin kan hnathawh hi a chhinchiah tlak viau a ni. Member-te thusawi inkawlkalh lai deuh pawh a awm a, Printing & Stationery Department hi kan hmalakna leh stationery chang kan nih ang hian tunah hi chuan *business mode*-in kan kal a, kan depot atang tein kan hrall chhuak thin a, chumi lamah chuan member thenkhat ten thahnem ngaitakin department zawng zawng te hian dawhthei takin department zawng zawngte hian han dawr kim thei ila. Tun dinhmunah kan dawr tha em tih te in han hre duh a, chutih laiin member-te zingah tlema ngaihdan dang, ‘sawrkar department hi sumdawng tur chi kan ni em le, keini hi chu heti lo zawnga kal tur hi kan ni zawk lo maw’ han ti te pawh kan awm a. Engpawnise, tun dinhmunah chuan Printing & Stationery Department hian kan stationery depot neih atang te hian a *bulk* in thil tam tak, paper leh a kaihnawihite kan pe chhuak a, dawrtu pawh kan nei tha chho viau a. Tin, sorkar department dawr lo hi tlemte tun hunah chuan kan nei a, helaiyah hi chuan an hming han puang lo mai ila, keimahniin kan tih thin dan pangngai angin Session zawh lamah department-te hnena thahnem ngai tur leh kumthar lo kal chho turah min dawr chhunzawm tura hriattirna leh ngenna pawh kan siam chhunzawm turah ngai mai ila a thain ka hria.

Tin, Covid-19 kan tawrhna ve deuh mai pakhat chu ‘Certificate in Printing Operation’ tih 6 months course hi, printing operation lama kan thalai tui mite tanah hian kalpui ve kan ni a, batch hninhna kan zo hman a, a batch thumna han kal chho tur hi he kan Covid boruaka class kal hleihtheih loh leh thildang avang khan kan sukuk a, chu chu vawiinah kan dinhmun a ni a. Printing & Stationery bik hrim hrim hi chu, kan establishment hi Aizawl-ah leh Lunglei-ah te, tin, Siaha lamah sawn depot kan nei tel bawk a, Aizawl leh Lunglei-ah hian printing work te hi kan thawk ve thei thin a, chung chu kan dinhmun tlangpui a ni a. Sorkar department hrang hrangte pawhin thil chhut tur, print tur an han neithe pawh min chhut tir viau rualin department thenkhat hi chuan min tlanchhiat san dan tur hi an zawng ve nasa khawp mai a, chi tam takin, heng kawngah hian sawrkar ina printing

institute te, printing atana hmunpui pawimawh khawl lian pui pui kan neihte hi hman tangkai tum tlang ila tiin, Demand No. 18 bik hi chu khati chin kha ka sawi ni sela.

A dawt lehah chuan Demand No. 28, Labour, Employment, Skill Development & Entrepreneurship (LESDE) kan tih hi vawiinah hian sawitu member 16 kan awm a. He department hi MLA ten min hrechiang chho tan mek a, department lian tak, scope nei tha tak mai, kan ram kan hnam kal zel tur atanah pawh thalaite chherna kawngah te, kut hnathawktute hamthatna tur kalkawng tam takah hian he department mawhphurhna pawh hi kan hmu chho tial tial niin ka hria a. Keini hian thil chi 2 lian taka kal pui kan nei a, pakhat chu 'Labour Wing' tih a ni a, pakhat chu 'Skill Development' a ni. Labour Wing bikah hian, India ramah hian Labour Law 44 kan nei a, chung zinga 18 te hi Mizoram-ah hian kan enforced ve mek a ni. Labour Law kan enforce zingah leh kan hman tangkai zingah chuan Building and other Construction Workers Welfare Act, 2006 hnuiah khan Mizoram Building and other Construction Workers Welfare Board din a ni a, hei hi kan hmang tangkai viau a, member in register tawh hrim hrim phei hi chu 87,158 an ni a, amaherawhchu kum tin tihnun thar ngai anih avangin an membership tinung lote an tam avang hian tun hunah hian member hi sing ruk vel chauh kan nei mek a. Chung Workers Welfare Board Member-te chu an fate zirna tur *children education assistance*-te, nau neihah *maternity benefit* te, damdawi in an awm nikhua-ah *medical benefit* te, kum upa an nih pawhin *old age pension* te kan pe a, nupui pasal an neih te pawhin *marriage assistance* te, mitthi an nih pawhin a vuina thlenga tanpuina pawh hi kan nei a ni.

Scheme kan ngah khawp mai a, kut hnathawktute hamthatna tur hi sum leh pai kan pek leh kan neihte pawh hi a tam khawp mai. Kan hriat tlan angin, keini hi *labour cess*, construction a miin hna an thawh reng renga 1% an chhun khawm hmangtute kan ni a, central guidelines hnuiaia kal kan ni. Covid-19 hri a lo len khan labour cess kan lakkhawm, welfare fund kan neih atang khan Mizoram mipui kan member harsate tanpuina tur atanah te, kan ram mipui ei bar zawnna kawnga che theilo te tanpuina tur atan hian kan luang chhuak tam khawp mai a. Hei hi Mizoram mipui *cess* thawkhawmtute avangin hetah hian kan luang chhuak ve nasa a. Member zawng zawnge hnena ka sawi chian duh deuh mai chu, he Covid-19 chhunga anmahni tanpuina tur *assistance* atan hian member pakhatah ₹3,000/- theuh kan pe a, chumiah chuan ₹15,82,41,000 (cheng vaibelchhe sawm panga, nuai sawmriat pahnih, singli leh sang khat) kan sem chhuak a ni. Chu chu direct benefit, bank transfer veka pek an ni a. Tin, chumi lo lehah chuan, mipuiin ei bar kan zawnge thei lova, a tak takah phei chuan kan member chang ni lo, thingtlangah phei chuan a khua a khua in *free ration* kan pe a, Food, Civil Supplies & Consumer Affairs Department hnuiah thla khat quota kha labour cess atangin kan khul sak tawp mai a, chumiah chuan ₹64,06,7,820 (nuai zaruk leh sawmli, sing ruk, sang sarah zariat leh sawmhnhih) hi Food, Civil Supplies & Consumer Affairs te hnenah pawisa kan pe a, thla khat free ration, Mizoram mipui rethei zawk ten an lak theihna turin he Department hian Covid-19 chhung khan kan lo che ve a ni tih pawh kha ka han sawi tel duh a ni.

Kan sawi tak ang khan, hna thawktute chhawmdawl na tur atana tuna ka sawi chi 2, Covid-19 chhunga kan pawisa hman zawng zawng kha ₹22,23,02,820 (vaibelchhe sawmhnih pahnih, nuai sawmhnih pathum, sangriat zariat leh sawmhnih) zet mai Covid-19 challenge nan Mizo khua leh tuite hmanral atan kan semchhuak a ni. Member thenkhat khan ‘kumin 2020-2021-a cess kan collect kha engzatnge’ tih kha sawihonaah khan zawhna a awm a. Kan vanduaina Covid-19 avangin construction lampangah sawrkar a kal tam hleih theihloh avangin kumin hian kan cess lak khawm hi kum dang ai chuan a tlem a, chuti chung pawh chuan a tam khawp mai a, vaibelchhe 11,98,33,779 tun tumah hian, he kum kal lai 2020-2021-ah hian kan la lut a. Chutihlai chuan kan hmanchhuah hi a tam a, nichina kan sawi dang dangte piah lamah, Children Education Assistance te, Medical benefit etc. ah member-te kan pek zawng zawng hi vaibelchhe 37,59,79,508 a ni a, tun din hmunah Board hian sum vaibelchhe 23,52,78,561 kan la nei a ni.

Tin, skill development lama kan hmalakna thenkhatte han tarlang leh ta ila. Kan sawi ang khan skill development-ah hian entrepreneurship wing-ah lian tak maiin vocational training scheme pahnih kan kalpui a. Pakhat chu Government Training Scheme (CTS) kan ti a, pakhat leh chu Pradhan Mantri Kaushal Vikas Yojana (PMKVY) a ni. Heng scheme te kaltlang hian skill development lam te pawh nasa takin hma kan la a. Skill Eco-System Infrastructure Improvement Project pathum, heng hnuiah hian SANKALP te, STRIVE te, ESDI te kan ti a chung a kan hnathawh hrang hrang, ITI hmasawnna tur atana kan hmalakna te, Tin, short term training *six months course* tling lo deuh hlek PMKVY 2.0 scheme hnuiah kan kalpui, training provider 38 te kaltlanga job roll 25-ah training kan pek te pawh chipchiar zawka han sawi a chakawm viau rualin khami chin kha a tlangpuia ka han sawi ni ta se. Hemi hnuiah hian skill training kan neihna PMKVY hnuiah hian training tun kumah hian 12,869 an in enrolled a, chung zinga 8,460 ten training an zo a. 5,497 te hi an trained chhuah atanga an mahni phu tawk hna Mizoram chhung leh Mizoram pawn lamah hna an hmu a ni tiin office lamah record kan nei hial a, achievement lian tak hetah hian kan nei a ni.

Tin, SANKALP scheme hnuiah hian skill gap *study and analysis* nei turin Mizoram University incubation centre te nen Ni 10.2.2021 khan MoU kan sign a. Tin, STRIVE project kan sawi tel pakhat kha World Bank Project cent percent an mahniin a an rawn fund tur a ni a. Chutiang chuan he skill development lamah pawh hian nasa takin kan kal a ni.

A dawt lehah chuan LESDE hnuiah hian kan sawi, kan chhuan tak mai Mizoram Youth Commission hi a peng pakhatah a awm a, kan Assembly-in a kan din, Commission tangkai tak, kan House Leader Pu Zoramthanga, Chief Minister anih hmasak laia Mizo thalai kal zel turte welfare ngaihtuah tur tiin Mizoram Youth Commission hi din a ni. Kan lo hmathlir a tha hle mai a, vawiinah hian kan hmang tangkai hle mai tih hi a hmasain ka sawi tel duh a. Kan hriat tlan angin hun harsa, hun khirh kan tawh laiin MYC hmalakna-ah hian online job portal te siam a ni a, chu portal-ah chuan mi 18,000 zet hna zawng mekte leh hnathawh tur duh mihringte an in register a. Chu chu hna inpuiah chuan intawk

khawmin, mistiri duh chuan khatah khan an va zawng thei a, inhlawh duh chuan hnathawh tur neite an hmuh theihna, chutianga hetah a sang lam chauh nilo a hniam lamah pawh *unskilled* leh *skilled labour*-te tanah pawh an inhmuh khawmna tur, an intawh khawmna tur *online job portal* siam a ni a.

Tin, vawiina kan sawi chhuah ngaihnawm em em mai ‘Super IAS, 2020’ kan tih te kha, MYC hmalakna, kan Chief Minister zahawm takin a tuipuina huangchhunga kan hmalakna lian tak a ni a, Mizo nula/tlangvalte Central Service lamah te kan tam tawk loh avangin thahem ngaiin hengte hi hmalak a ni a. Hemi atan hian Mizo nula/tlangval ‘kei’ inti, thiam nia inhria mi 218 ten exam fair takin an han tel a. Chung zinga a thazual nia hriat mi 20 tlanchhuah niin Delhi-a coaching centre ALS leh Chanakya Academy-ah mi 10 ve ve dah an ni a, an kal kawng zawng zawng leh coaching centre-a an awm chhunga an senso zawng zawng hi Mizoram sawrkar hian an tum sak dawn a ni. Hetiang taka kan sawrkarin kan ram mamawh Civil Service, All India Service lamah kan than theihna tur atana Covid harsatna karah sum leh pai ui lova, a hmanna tur dik takah kan Chief Minister a rawn thil phal hi lawmawm ka ti a. Kan Chief Minister phei hi chuan kan meeting na ah pawh, ‘a tul anih phawt chuan tam zawk pawh kan nula/tlangvalte, All India Service lama tuimite atul anga sponsorship pe thei tur hian sawrkar hi kan inhuam a ni’ tih te pawh a sawi a. Mizo nula/tlangval lehkha thiam, hmalam beiseina thui tak neia thlirte tanah he sawrkar hnuiah kawng a eng hle a ni tih kha ka sawi tel leh duh bawk a ni.

Tin, MYC buatsaiah ALS, New Delhi nena tangkawp hian offline IAS coaching, Aizawl, Lunglei, Siaha leh Kolasib-ah te kalpui turin ruahman mek a ni. Champhai lam bialtu zahawmtak te, Lawngtlai lam bialtu te pawh khan kan bial lamah te pawh a tih ve theih lawm ni an han ti a, a hmasaah district khawpui pali-ah te hian kan han kal tir phawt ang a, a theih dan ang angin district capital dangah pawh hmalak chhoh zela puanin zauh te pawh kan tum turah ka ngai a. Tin, heng UPSC chang nilo, SSC lamah pawh exam-a tel tur ang chi te, IBPS, JEE, NEE, SMATEE kan tih ang chia exam tur ang chi hoah pawh hian coaching te pawh buatsaiah sak an ni.

Chulo lehah chuan Mizo thalai zingah hna tha tak mai sipaia tang duh tam tak kan thalaite zingah an awm a, MYC hmalaknain Army *pre-recruitment rally* te buatsaiah a ni a, Assam Rifles leh CIJW, Vairengte te nena tangkawpin recruitment rally te an buatsaiah a. Chung kaltlang pawh chuan thalai tam tak 56 zet chumi tum chuan Indian Army zawm turin lak an lo ni a. Tin, kan hma lawk May thla chho velah hianin army rally buatsaiah leh turin an inpuahchah chho leh mek a ni tih kha ka sawi leh duh bawk a ni.

Tin, thil lawmawm deuh pakhat, thalaite welfare ngaihsaktu tak kan nih tih lanna chu, tun Covid lai khan Mizo tlangval sipai (Assam Regiment) tang tur lak zawng zawng kha mi 145 an tling a, chungho chu Shillong training centre-a kal tur khan covid vanglai tak kha a ni a, state leh state pawh inkalpawh theihloh, transport-ah engmah vehicle kal theiloh anih lai khan training tan a ngai tawh a, anmahnzi zuk kal turte pawh training centre an luh

hmain quarantine centre-ah dah an ngai a ni. Chutihlai chuan kan sawrkar hmalaknain heng thalai 145 te, Deputy Commissioner leh Home Department te nen tangkawpin bus thahnam tak a hrampain an ruahman a, kan state thenawmte nen inbe remin a hmunah kan zuk dah thei a. Mi 145 hna hmu mai tur tangkhang te kha MYC ten an umzuinaah hna zawm thein, thalaite tan *Inpui* nih tling takin an welfare-ah pawh hian an tihhlawhtlinsak a ni tih kha ka sawi tel duh a ni.

Tin, Member-te sawi zinga thil pawimawh tak han sawi tel ngai nia ka hriat chu, Covid 19 avangin Mizoram pawn India ram state dangah zirlaite leh inhlawhfaa kal tam tak mahni khua, mahni state-ah an lo hawng a, chung zingah chuan abik takin inhlawhfaa kal te chu MYC-ah in report turin *returned migrant workers* zawng zawngte a theih ang anga an welfare lo ngaihtuahsaka, an eibar zawnna te an lo tih theih tak lovah chuan kalkawng dang kawhhmuhna tur atan MYC ten hmun remchang an lo buatsaiah a. Chutah chuan migrant workers 2,632 an rawn in report a, hmanni a list kan inpek tawh ang khan, chungte chu MYC-ah rawn inziak lut anni a. Chung chu kan MYC lam hruaitute'n NEC ah project an siam a, a phase-I, chung ho enkawlna atan chuan vaibelchhe 3 NEC-in a rawn sanction a, chumi hnuiah chuan mi 720 te skilled development training pek anni a, phase-II-ah vaibelchhe 2.7 NEC hian a rawn sanction leh a, hei hian mi 800 vel cover turin ruahmannna siam a ni a, kawng hrang hrangah anmahni phak tawkah eizawnna dang an neih theih nan hetah hian ruahmannna dang siam a ni.

Hengte bakah hian LESDE bika han react tur Lawngtlae 'E' bialtu leh Lawngtlae 'W' bialtute'n, 'Lawngtlaiah District office min siamsak ve thei ang em' an tih te pawh kha, District 11 kan lo awm ta a, tun dinhmunah LESDE hi District 4-ah establishment kan nei a, hna te a lak theiha department-a kan hotuten sum dinhmun te tlema a ziaawm deuha min siamrem theih hunah district tam zawk han cover te pawh kan tum ang a. Tukin zinga kan sawi pakhatah khanin, district-ah establishment kan neihloh avangin hna zawngtute tan harsatna awm palh thei ang te khan sawi a ni a, House information atana ka sawi duh chu, tunah hian sawrkar hnuiah hian Common Service Centre (CSC) kan tih hi 525 a awm a, tlema khaw lian deuh internet service that deuhnaah hi chuan CSC hi a awm tawh a. Lawngtlae district-ah pawh 65 awmin, active taka awm chu 40 vel kan nei a ni. Chung CSC kaltlang chuanin hna zawn chungchangah te, in register leh tul ang chi-ah khan headquarters nen a inthlunzawm theih thova, chungte chu kan thalaite hian hmang tangkai thei se tih hi tun bikah district establishment kan siam theihloh pawhin kan MLA zahawm takte in rawtna a zahawm rualin .. (**Pu C. NGUNLIANCHUNGA:** *Pu Speaker, khawngaih takin; keini MLA-te bika kha, khang mite contact-na tur kha min hrilh hre thei se session zawahh pawh).* Awle, a list te pawh a remchan dan anga inpek dan kan ngaihtuah dawn nia.

A dawt lehah chuan Pu Speaker, Demand No. 20, School Education hi Member 23, Member zawng zawngte khan kan sawi a, kan tuipui ber, vawiinah hian hun pawh la rei ber kha a ni a. Helai hi ka sawiah leh ka react-ah te pawh a vai vai chuan sawi lo mah ila, a tlangpui han hlawm theih ang chi te han sawi kan tum ang a. A khaikhawmna ka sawi hmain

react atana tul zual, Lawngtlai ‘E’ bialtu khan a bial lama Govt. Regional Higher Secondary School Science stream leh Blue Mountain Higher Secondary School Sangau building sak chungchang a sawi te kha, Samagra hian second installment kan nghak mek a, hengte hi kan neih theih ve leh an mahni building sakna tur ang chi te hi ruahmanna kan siam sa vek tawh e; Vairengte lam pawh kha a tel ngei e tih kha ka sawi duh a. Bialtu MLA zahawmtak hian ramri a ngaipawimawh a, ramri lamah Science Stream pawh kan dah a ni.

Tlabung lam bialtu sawi Higher Secondary School kha hman niah zaghna pawh a lo chhuak tawh a, a area saw a tul khawp mai tih pawh kha kan hria a, nakinah chu chu kan sawi tho ang a. Tunah sawn Higher Secondary School private-in an lo nei ve a, Dan-ah chuan, ‘km 7 km 8 radius chhungah Higher Secondary School dang a awm chuan dah theih loh’ tih a ni a. Saw saw permission an lo nei a, UDISE-ah an lo awm chuan saw saw a harsatna a ni mai thei tih hmanni khan ka chhang tawh a. Engemaw enfel ngaite a awm chuan nakinah en te a mamawh khawp mai. Kan senior Member, Pu Nihar sawi kha a awm pawh ka ti a, remchang a awm thei em tih te kan en zui dawn nia.

Tin, Member zahawmtak Pu VL Zaithanzama leh Aizawl South-II bialtu Pu Chhuanthanga rawn zaghna inang deuh hlek kha, ‘midday meal atan matching share tur dah a awmlo’ tih kha, midday meal min rawn ngaihpawimawh pui kha a lawmawm a. Amaherawh chu tuna kan hman lai mekah hian midday meal hi sanction kan neih mil ang zelin, kan pu berina a sawi, “A khawnpui” a tih ang deuh khan state matching share tura hi chu kan han dil apiangin min lo pe zel a, dah lawk dawn khan engzah nge min rawn pek dawn tih a hriatloh avangin alo match-na tur kha he laia state Khawnpui atang khan kan pe thin a ni.

A dawtah chuan, Pu Andrew sawi ‘Chalkunga High School building chhawng khat bo’ a tih kha enge maw hriatfiah tawkloh awm niin kan hria a. Khu building khu 2016-17-a NABARD IRDF sanctioned kha a ni a, a ruahmanna hmasa ah chuan a chhawng kha G+2 a sak tur a ni a, amaherawh chu khulai Bukpui-ah khuan a hma lawkin RMSA fund-in High School kha sak tawh tho anih avangin School mamawh chin chauh khawihin, estimate pawh G+1 a revised a ni a. Chuta pawisa a chhawng khat tura kha Bukpui Middle School renovate & repair-na a hman a ni a, hei hi government approval thlap leh loan min petu NABARD phalna thlapin, scheme dang atanga sum a lo luh tawh avangin, school sak a awm tawh a, an mamawh bak pek ai chuan a mamawh dang Bukpui-ah vek school dang renovate nan kan hmang ta a, government approval thlap a ni e.

Tin, “High School kalh reng a ni a, engtia tihtur nge” tih kha, a sak laia lo enkawltu, work supervisor tualchhung mi an hman te khan chabi an kawl a, school-in mamawh a neih harsatna an neih chuan tualchhungah chabi pawh a awm e tih kha House kal tlangin ka sawi tel bawk a ni.

Tin, Dampa Bialtu Pu Lalrintluanga Sailo in, ‘Elementary School text book-ah hian hnam mil deuh, hnam thinlungpuin zirlaibu hi duan ni rawh se’ a tiha kha, kan department nen kan lo kalpui chhoh leh tunah pawh NASA taka kan infuih leh kan kalpui mek a ni a. Tunah hian Elementary zirlaibu duan mekah pawh SCERT, Elementary Education-a Academic authority-in tunah ruahmanna a kalpui chho mek a. Tuna in ngaihpawimawhna in han sawi khan an rilru pawh a ti thar leh zualin, chu lampang hawi zawng pawh chuan uar zawkin kan kalpui theih kan beisei a. Zirlaibu kan siam kawngah hian Azim Premji University nena tangkawpin tha tak, changkang tak, naupangte *world class* an nih theih nan hma kan la mek a, thahnem an ngai bawk a, changkang zawk siam kan tum mek a ni. A bak chu kan sawi pahin kan react turah ka ngai a.

Hei vawiina kan sawiah khan.....(Pu C. **LALSAWIVUNGA**: *Pu Speaker, khawngaihin ka bial chhung Govt. Central School chhe lutuk khu Silpouline in kan khuh a ni tawh a, Chhunglamah a zahpuiawm khawp mai a. Tin, Govt. Bethlehem Vengthlang High School pawh khu sakthat a tul tawh khawp mai a, kha kha engtin nge niang aw?*) Aw, ni e, kha kha a dang ka sawi pahin ka rawn sawi ang ka ti a, amaherawhchu member zahawm takin ding chunga min zawh avangin ka rawn chhang mai ang a. Pu Speaker, tuna kan scheme tam ber a hi NABARD atangin school hi kan sain repair works hi kan kalpui a. NABARD chu thingtlang hmasawnna tura siam a ni a, a scheme hi khawpuiah kan hmang thei tlat lo a, chu chu harsatna liantak pakhat kan neih a ni a. Chief Minister zahawmtak min ruahmanpuiin SEDP hnuiah hian cheng nuai 1,800 zet heng infrastructure kan hman atan sawrkar kum kal laiah min siam sak a. Amaherawhchu Covid-19 avanga kan sum dawntur kan dawn lohte, tin, kan beisei loh lamah pandemic avanga pawisa kan hman takah khan khang kha kan kalpui thei ta lo a. Kan khawpui chhung zirna-in han siamthatna turt, Ramhlun Veng Sport Complex lamah te pawh a ni a, ruahmanna kan siam thlap thlap tawh kha, a sum source a kha harsatnain mi a tihbui tak avangin kan sa chhunzawm thei ta lo a, Central High School tak phei chu hman ni lawkah ka zuk tlawh a, tih sak tul tak a ni tih pawh a hmunah ka zuk hmu a ka hriatpui a. Eng emaw keimahni scheme piah lamah hian UD & PA nen pawh tan hoa, Smart City Project leh thil dang atang pawhin tih theih kan duh hle a. UD & PA ministry enkawltu te an sawi tlem a, khawpui chhung bik hi chu mi an peizawn a ngai hle mai, kan scheme neih ve hian a keng thei si lo a ni. Tin, Central Higher Secondary School phei chu anmahni veng lama awm project leh DPR siam thiam te, anmahni pawh forwarding te kan siam sak a, central lamah project move tir te pawh kan nei a, state sawrkarin forwarding te pein kan buaipui mek tih kha ka sawi tel duh bawk hrim hrim a ni.

Tukina kan sawi ang khan, School Education Department bika sawi tur hi a tam khawp mai a, Member tam takte khan an sawi tawh a. School Education Department hi mizoram department lian ber a ni kan ti a, hna thawktu hi chi hrang hrang, CSS hnuai te, Contract te, MR te leh hlawh kan pek kan chhawr hrim hrim hi mihring 20,745 thla tin hlawh pek kan nei a ni. Chu chu Mizoram sawrkar hnathawk 30% zet an ni mai thei tih kha a hmasain kan sawi duh a. Kan hriat tlan angin Covid-19 avangin School kan kal hlei thei

lova, hun rei tak kan khaihlak a, mahse department lam hotute nen engtin nge hemi hun chhunga school naupang School kal lo hi, awm awl ngawta an awm loh dan hi zawng teh ang kan ti a. School kal loh hun chhung zawnga in lamah naupang an tawm lai pawh khan kan hmang tangkai a. Tutorial class te leh online class te kan neihpui a, elementary school-te April Ni 13, 2020 atang khan kan pe tan a. Episode 264, Education Directorate-in 138 leh SCERT-in 126 an siam a, chung chu Doordarshan te, LPS leh Zonet kal tlangin zirtirna in lama an awm chhung khan kan pe ngar ngar a ni. Youtube lamah te kan upload a, a duh apiangin an en theih tur, nu leh pate pawhin an fate zirtir theihna turin kan theih tawkin Covid-19 inkhuahkhirh lai pawh khan kan kalpui a ni tih kha ka sawi duh a ni.

Tin, Academic Calender kan siam dawn a, a kal hleih theih bawk si lo a, school calender te pawh kan han duang dawn a, engtikah nge kan syllabus hi kan zawh theih ang te kan han ti a, a bik takin class V-VIII te hian an zirlai 30% an thiam ngei ngei tur bridge course angin ruahman a ni a. An zirlai bute pawh kan sem a, tunah hian class te pawh an han tan ve mek a. Tunah hian High School section Class IX atanga Secondary, class XII thleng chu regular class te an han kal ve thei ta a.

Vawiinah hian min thlirtute zawhna lian deuh awm theia chu, a te ber primary school class I-IV te engtin nge tih kha zawhna a awm thup mai a. Kan hriat angin tlema a fel deuh chin, a insa seng theih deuh chin SoP pawh zawnm thei tur deuha kan hriat te SEC ruahmannain school an han kal a. Class I-IV hi kum sawm hnuai lamte an la ni a, MHA guidelines-ah anni hi chu pawn chhuak tam rih lo se an tih avangin zirna an tan hun tur hi kan siam mai thei lo a ni. Vawiin lam khan state Executive te an thu a, anni te nen kan inrawn ang a, kan boruakte thlirin zirna Primary level hi class an kal ang nge, kal chiah lo pawhin tutorial class kan pek te, school-in assingment an pekte leh bridge course an thiam tur tawk zirtirna kan pekete hi an school-te nena assingment an tih kal tlang hian promotion kan pe mai dawn em tih te pawh kan ngaihtuah mek a. Hun reilo teah chumi chungchangah decision pawh kan siam theih kan inbeisei a ni.

Kan school academic session hrim hrim hi March thlaa tawp tur kha hri vangin thla khat kan pawt sei a; April-ah a tawp ang a, chawlh awm lovin session thar 2021-2022 hi May thla atangin kan tan nghal dawn a ni.

Kumin hi India ramah chhiarpui kum a ni a, (***Pu NIHAR KANTI CHAKMA : Pu Speaker, minister thu sawi lai khan react ka duh a awm a. Ka bial chhungah school naupang promotion exam dawn avanga school tan tur, mahse covid test paltlang ngai an awm a, vawiin atangin an lut tan dawn a, hi hi mahni pawisa chawia test ngai a ni. Hei hi sawrkarin a tih sak theih em tih kha min chhang se ka duh khawp mai.***) Covid-19 test hi Health department concern lam mah mah zawk a ni ang a, keini lam atang chuan zirtirtu, zirlai school kal tur leh hostel awm tur zawng zawng te chu anmahni sensoin an intest vek a. A then chu an school ten an tum sak thung a, chutiang vel chu kan kal dan a ni a. Sawrkar atangin test man tur tumsakna programme siam kan nei lo a ni.

Kan sawi ang khan chhiarpui a ni dawn a, puitling ziak leh chhiar thiam lo enge maw zat kan la neih avangin, kan chhiarpui hi kum 10 dawn lai tekhawngah kan hmang leh dawn si a, chumi avang chuan kan state hming that te kan duh leh dawn si a, a bik takin western belt lamah hian kan unau tlema ziak leh chhiar lamah hnufum deuhte an tam avangin, chung target chuan nasa takin hma kan la a, PLA project hmangin District 4 Lunglei, Siaha, Lawnglai leh Mamit district te puitling ziak leh chhiar thiam zirtir kawngah a bik takin hma la ila kan ti a. Tin, Total Literacy Drive pawh Siaha, Lawnglai leh Mamit district-ah te nei turin ruahmanna kan siam a ni.

Tin, chulo lehah chuan, Hindi zirtirtu central MHRD-in mi 665, a thawhkhata na atan lak phalna min rawn pe a. A bul berah chuan kan Chief Minister hmalaknain, ‘Mizoram-ah Hindi thiam a tul, India rama kan awm chuan, Hindi zirtirtu pawh tam zawk kan mamawh’ kan ti a, mi 950 vel sikul zawng zawngah, sawrkar enkawl leh thil school dang pawh pe thei turin 950 kan neih sa bakah min pe belh se tiin, chumi project chu kan siam a, a thawh khatnan 665 min rawn pe a ni. Amaherawhchu, lak turah khan qualification, All India kalphung, NCERT-in duhdan norms kha a rawn nei a. Kan han la a, 541 chiah qualified an awm thei a, a awm zawng zawng chu kan la vek lova, tlema harsatna nei leh thildangte avangin 541 chauh kan la la thei a ni. Tun atanga rei vak lovah hian batch eng emaw zat lo chhuak, hmun danga zir leh Mizoram Hindi Training College a zirchhuakte nang remchang turin recruitment thar siam leh kan tum a ni tih kha ka sawi duh bawk a ni.

Tin, headmaster indaihlohma kawng hrang hrang Primary, Middle, High School te kan sawi a, kan theih chin chinah chuan headmaster te pawh seniority promotion te, a then chu LDE-a tih ngai te a ni a. Primary bikah hian Headmaster te hi seniority promotion thei tur process mek a ni a, LDE promotion zawk te hi nikum khan mi 29 kan tifel a. Tin, chumi bakah chuan, High School Headmaster pawh 38 seniority promotion-in lak an ni bawk a. Hethi laia ka sawi duh chu, Primary, Middle, High School leh Higher Secondary te hi 50% seniority, 50% LDE tih a ni a, Higher Secondary School Lecturer te hian, “keini chu gazetted post a awm tawh kan ni a, 50% LDE hi kan remti ve lo e” tiin an khawmpui-ah an rawn pass a, an R.R. siamthat an rawn phut a. Chumi avang chuan anni bik hi chu an R.R. siamthatna tur pawh an remtihna angin siamthat tawh a ni. Amaherawhchu, R.R. siamthat hmaa Principal post hnawhkhahna tur atan quota insem kha a lo awm avangin a senior apiang kha a dah ngawt theih lova, LDE-a tih ngai chin kha a la awm a. MPSC in LDE kha exam a conduct dawn a, tumah exam an awm loh avangin tun hunah hian promotion tur kha pek theih kan nei lova. Heng promotion, Middle School, High School leh Higher Secondary School te chu state sawrkar tih mai theihlo, Public Service Commission-in gazetted post te hi an lak tur anih avangin an kutah kan dah a, chu chu court lam te leh thil dang harsatna a awmloch chuan Higher Secondary School Principal neilo Member-te sawi pawh kha, reilo deuhah chuan seniority-a kan hnawh theih te kan hnawh ang a, LDE quota hi write-off theih dan remchang kan neih theih chuan a senior-te hnawhkhah hi chu kan tum a ni.

High School Headmaster Member tam tak ten in bial chhunga in neihloh in rawn sawi kha sawrkar pawhin a hria a ni. Headmaster neih theihna turin kan Chief Minister, Finance Minister ni bawk leh DP & AR Minister-in post sanction te pawh min siamsak a, sawrkar atang chuan engkim phalna kan nei tawh a. MPSC-ah Headmaster 76 lak phalna pawh kan thawn chho vek tawh a, an ACR te nen a tul ang ti turin kan thawn a, LDE-a tih tur chi te pawh kan thawn a ni. Amaherawhchu, LDE quota exam dawn hnaiah a senior thenkhat te court-a lo kalin sukuk a awm leh a, chungte avang chuan exam turin harsatna kan han nei leh a, chuvang chuan fill up thei lovin kan la awm a. Chutiang chuan Middle School-ah pawh harsatna kan nei a. Sawrkar chuan sanction engkim lak phalna min pe tawh a, engemaw technical problem, court case leh thildang avangin heng harsatna te hi a awm mek a ni tih kha ka sawi duh bawk a ni.

Tin, Member zahawm tak tak ten in sawi kha, SEDP atangin High School zirtirtu 157 lak phalna kan Chief Minister-in min pe a, a lawmawm khawp mai a. Hei hi vawiina an sawi ang khan, *stop gap arrangement* atan chauh a ni. A hlawh kha Tuichawng bialtu zahawm tak khan ‘a va tlem ve maw le’ a ti a, tun bik stop gap atan bik a ni e tih kha hriat ni se. Post 157 hi a pangaia lak phalna kan nei tawh a, Covid avangin kan la thei si lova, academic session tan a ngai tawh si a, chumi avang chuan qualified an ni emaw, trained chiah lo mahse tualchhung mi class room a lo attend thei tur, khawtlang School Management Committee ten a fit tur an tih te an lo chhawr theihna turin helai hi kan ruahman a ni tih kha ka sawi duh a. Hna lak theih hun pangngaiah chuan hna hi kan la ang a, mumal zawkin hei hi fill up chhunzawm pawh kan tum a ni tih kha ka sawi tel leh duh bawk a ni.

Tin, lawmawm em em mai pakhat chu, Covid harsatna lian tak kan neih lai hian education hian *mel lung* lian tak thar kan nei a. Sawrkarin District thar pathum a siam Hnahthial, Saitual leh Khawzawl-ah te District Education Office kan hawng a, District SAMAGRA office pawh kan hawng tel a ni. Chutiang tak chuan he department hian hmalam panin District 3-ah establishment kan han nei thei te hi a ropui kan ti a, kan hotute hnathawhah lawmthu kan sawi a ni.

Tin, chhuanawm tak pakhat chu, National Level 65<sup>th</sup> National School Games 2019-2020-a kan state-in kan thlen tum khan kan performance kha National School Games Authority, All India Level Committee khan a han ngaihtuah let a, India ram state hrang hrangah category hrang hrang kan thleng darh a, keini khan Under-19 Boxing kan thleng a ni. Chumiah chuan rating hrang hrangah an han lakkhawmin tun January thla khan result an puang a, Mizoram kha National School Games thleng tha, thleng hlawhtlingah All India-ah lawman 2-na kan dawng a, trophy pawh kan hotute’n an zuk la a, kan House information atan pawh ka pe tel a ni.

Hei bakah hian vawiina an sawi SAMAGRA lampang kha Palak leh Lawngtlai ‘W’ bialtu zawhna pawh kha kan chhang dawn tho a, chulai chu han sawi ka duh a. SAMAGRA hi kan hriat fuh a ngai a. India sawrkar hian 2018 kum chanve khan India ram education a

enkawlna *administrative unit* khata a kalna tur atan a rawn duang a. Primary atanga Hr. Sec. School te, zirtirtu training TE kan tih zawng zawngte hi hmun khata kan kalkhawm theihna tur atana ruahmanna a rawn siam a. Ahma chuan Primary School-te kha SSA, P/S leh M/S enkawltu te kha SSA kan ti a, high school leh higher kha RMSA kan ti a, DIET lam hi teachers education TE tiin a kal a ni. Chung hlawm thumte chu a hrang hranga a kal khan administration leh fund flow-ah India ramah harsatna a awm nia hriat avangin India ram puma hman turin SAMAGRA, a khaikhawmtu *one unit*-ah awm rawh se tiin central-in a rawn tih avangin hei hi khaikhawm a ni a, central sorkar-in a rawn rawtna avanga tih a ni . Mizoram-ah pawh 30<sup>th</sup> January 2019-ah khan order kan siam a, SAMAGRA hi society-te pawh din a ni a. Chungteah chuan member zahawm tak Lawnglai ‘W’ bialtu leh Palak bialtu te khan, “6<sup>th</sup> Schedule to the Constitution-in keini hi elementary-ah thuneituah District Council ADC-te hi a dah a, hetianga in rawn thuikhawi ngawt hi chu constitution palzutna a ni” an tih kha hriatsual vang a ni mai thei a. India sawrkar, central sawrkar ruahmanna liau liau a ni tih kha, chu chu order engkim pawh kan nei a. Central sawrkarin hei hi a rawn khaikhawmna a rawn siam a, chumi chu kan zawm a ni tih kha ka sawi duh a ni.

**PU K.T. ROKHAW :** Pu Speaker, khawngailin. A awmzia chu Elementary Education hi District Council hnuasia awm a ni a, middle school-a teacher-te SSA hnuasia thawk an hlawh-te, an posting & transfer-te, appointment zawng zawng kha District Council kuta awm tur a ni a. SAMAGRA a lo awm hian, tuna kan Minister-in a sawi tawh angin DEO Mizoram kutah a awm ta a ni. Chu chu ME School kha District Council hnuasia awm a ni si a, an hlawhte, an posting & transfer-te, appointment-te Mizoram-in kan pek si chuan kha teacher-te khan District Council hotute thu leh hla kha engahmah an ngai tawh dawn lo a ni.

Chuvang chuan, Elementary Education hi District Council hnuasia awm anih chuan SSA middle school teacher-te kha District Council kutah dah ve tur a ni dawn lawm ni? Khami te kha a nia kan han sawi chhan chu.

**PU LALCHHANDAMA RALTE, MINISTER:** Pu Speaker, ka han sawifiah ang a, an hrethiam maiin ka ring a.

Elementary-a an thuneihna hi kan chhuhsak reng reng lo a, tunah hian EM, Education pawh a la awm vek a, anmahni District Council school leh a thawktu zawng zawng chu an hnuiah a la awm vek a, transfer & posting engkim pawh an la ti thei vek a ni.

**PU C. NGUNLIANCHUNGA:** Ni e, khalai tak kha, ka hrethiam a, a awm dan chu, All India-ah *One unit* atan tih kha. Chutiang chiah chuan Mizoram state chu Mizoram sorkar kutah a awm ta a a, SAMAGRA-ah hian central a rawn thu chuang lo a, khalai tak kha.

**SPEAKER :** Ngawi rawh aw, sawi zawk tir lawk teh. Khalai kha in ngaipawimawh a, kei pawhin ka ngaih pawimawhpui che u a. A chhang laklawh a, a hnuah a la fiah loh chuan hun ka la hawng tho ang. A chhan lai khan lo tibuai lo hram teh u.

**PU LALCHHANDAMA RALTE, MINISTER:** Pu Speaker, MHRD Order a kan hmuh dan chuan, ‘Whereas The Ministry Of Human Resources Development, Govt. of India has decided to implement the scheme through a simple state implement society as the state level as para 125 of framework for implementation of the SAMAGRA Shiksha Abhiyan’ a ti a. A hma lamah hian, “Govt. of India decided to adopt an integrated approach in the implementation of various centrally sponsored schemes such as Sarva Shiksha Abhiyan (SSA), Rastriya Madhyamik Shiksha Abhiyan (RMSA) and centrally sponsored scheme of restructuring and reorganization of teacher association” a rawn ti a.

Central order ang thlapin kan kal a, chu order siamtute chu 6<sup>th</sup> schedule hnuiah ADC a awm thu leh thuneihna pawh an ADC huam chhung Elementary-ah a nei a ni tih hretuten India ramah zirna kalphung unit khatah a awm tha an ti a, Mizoram sawrkar ngilneih zia hi ka sawi duh zawk a. Kan duh chuan hemi tan chhana kalpui thei kan nih lai hian, kan ADC-te zalenna zau tak, thui tak kan pe a, dan ang thlap *One unit*-a kal tura tih angin DIET-te, Hr. Secondary-te, High School, Middle School leh Primary School pakhat te chunga thu neitu DEO chu DPC, a pumpuia khaikhawmtu angin kan dah a ni. Amaherawhchu, danah rawn ziah leh tih tura an tih miah loh Addl. DPC Lawnglai-ah chuan Pu T. Hmangaih Johana, Taxation Officer, LADC Council mi kan dah a. Dy. DPC-ah pawh S. Lalrinsiama, Revenue Officer, LADC kan dah a. Chutiang chuan MADC-ah pawh Addl. DPC leh Dy. DPC-ah anmahni District Council officer-te kha kan dah a ni. Chu chuan anmahni chhungah Elementary pawh a tul angin fund te pawh an umzui theih turin an kutah kan dah a. ADC te harsatna ber zawka chu, an Account pumpuiah DPC, DEO Account-ah khan a rawn lut a, eng emawah khan thuneihna famkim kha an nei lo deuh khan an hria kha a ni a. Dan in a phal chhungah kan theih ang tawkin state sawrkar kan kal fan a. ADC zahawmna hum kan duh a, an hnuiah zirna tha zawk a kal theihna tur atan chuan an zahawmna te, an dikna te humhim turin anmahni ngei kha management khawih tuah kan dah zawk a ni. (*....Interruption....*)

**PU C. NGUNLIANCHUNGA:** Pu Speaker, khawngaih takin tuna a sawi kha dikna chin a awm a. Amaherawhchu, central sawrkar atangin India ramah chuan zirna siamthat duh avangin ‘One Unit’ a ti a, a dik chiah. Tunah hian Central sawrkar chuan he State-ah hian ‘State’ anih ang State thuneihna a dah a ni. Chutiang chiah chuan State-in thuneihna a neihna chinah Elementary-ah khan Autonomous Council thuneihna a ni ve a. Khami china kha chu District Council te kutah an dah ve mai tur a ni dawn lawm ni. Nichina demand kan sawi ang khan, SSA hun laia zirtirtu District Council-a lo thawk tawh, an lak tawte pawh thenkhat bang, thankhat thi an awm a. Chung ang post-te chu lak sakin District Council mi ni lo, helamah Aizawl lamah te lak phei an ni a, kha kha ‘inchhuhsak, inpaungsualna’ a ni lo em ni? Anih loh chuan saw tah, anmahni mi leh sa kha la se la, dah se la, an thuneihna

anih chuan sawlaia mite ngei khan thawk se la. Tin, a Dan-ah khan, ‘he mite hi 6<sup>th</sup> Schedule Area an ni’ tih kha ziah kil kelh kher a ngai lo. A awmdana chu, ‘93-ah khan Council of Ministers-in Terms & Conditions siamin Autonomous Council-te hnenah thuneihna Elementary-ah chuan a pe tawh a ni. Kha zawk a kha an implement tur a ni lo em ni?

Tin, Pu Speaker, khawngaih takin ka din lai law law hian; Central atanga an zaghna an lo chhanna kha khawngaih takin a copy kha min pek ve theih chuan, ka duh khawp mai.

**SPEAKER :** Ngawi rawh aw, helai chungchang hi Council lampang bialtute pawhin in vei em em a, in sawi tam a. Amaherawhchu, Minister in heta zaghna a rawn chhanna ka hmuh danah chuan, Central-in India ram pumpui kha uniform-in a rawn thuai buaib ta a, a rawn chhungkhawm a. Chutah chuan sawlai District Council pawh saw a hrinpain a siam lona chungin keini hian Assembly te dinhmun hriain, ‘anmahni kan la a ni, enkawl turin’ an ti a. Nangni District Council te khan keimahniah rawn dah ve rawh se, in ti ta a. Amaherawhchu, kha kha danah a lo awm chiah si lohna laiah a theih ang chin chin sawrkar in a dah tho e a rawn ti ta a. Tikhan, House-ah chuan kan sawi tam tawk tawh a. Nakinauh duh leh leng ta u la, Minister pawh a inhawngin ka hria a, a office-ah fiah takin a inhrilhriat lehzual theih ang, khalai chu duh tawk ang aw.

**PU C. NGUNLIANCHUNGA:** Pu Speaker, ngawi rawh, hei, 1993-ah khan Council of Ministers in Autonomous Council-te hnenah Elementary School a kha thuneihna a pe a. Kha kha chu sawrkar hian (...*interruption*...)

**SPEAKER :** Ngawi rawh aw, kha kha chu hman ni pawhin i sawi tawh a, hman ni pawhin sawi rik a ni tawh a. Tin, he State hian Council thuneihna 1993 a mi chu tun thlengin a la vawng nung reng a ni. Tin, 1993-ah *Samagra* a la awm lo va, Samagra hi a thar a ni a, chulai te chu a ni. Tichuan khalai kha chu a fiah tawkin ka hria. Awle, chhunzawm rawh le.

**PU LALCHHANDAMA RALTE, MINISTER:** Pu Speaker, India hmarchhak State dangah pawh hian ADC an awm a, a hrinpain tuman an pe bik tawh chuang lo; hei hi chu a chiang a. A tirah phei chuan, he thil hi, ka han sawi duh chu (...*interruption*....)

**PU C. NGUNLIANCHUNGA:** Pu Speaker, khalai tak kha, India hmarchhaka Autonomous Council te nen kan inanlohma chu danah khan keini bika kha a hranin kan awm a ni. Assam-a mite, Tripura-a mite, Manipur-a mite kan inang vek lo, Autonomous Council kha. Khalai tako kha hriat hran a tha khawp mai.

**PU LALCHHANDAMA RALTE, MINISTER:** Pu Speaker, a pawi ber chu Central order-ah hian, ‘Mizoram-a ADC te hi a hrangin lo ti rawh u,’ a ti lo hi a pawi ber a ni mai. (...*Interruption*...)

**PU K.T.ROKHAW :** Pu Speaker, education hi states subject a ni a. Chuvang chuan state sawrkar hian elementary education chu District Council hnuai ah a dah a ni a, SSA Samagra hnuai-ah pawh an hlawh te, posting & transfer te, appointment te hi District Council kutah awm rawh se a ti thei a ni. Chu chu state-in a ti thei a ni, state subject a ni.

**PU LALCHHANDAM RALTE, MINISTER:** Pu Speaker, MADC (Mara) lam pawh hian a tir khan an hrethiam lova. Ni 10, August 2020 khan sawrkar lakah lungawi lovin non-cooperation te pawh an puang a. State sawrkar min thawhpui duh lo a ni MADC Education khan, thil tam tak Diksha Training leh a dang dangah pawh an tel duh lova. Amaherawhchu, nikum December Ni 2 khan Siaha-ah ka va kal a, Council CEM leh hotute nen inkawm khawmin thil awmzia kan hrilh a. Chumi hnu ka haw phei veleh chuan min kawmserhna pawh kha an revoke-na order an rawn chhuah a, tha takin kan thawk dun chho leh ta a ni. All India-ah Unit khat tura ti chung chung pawhin kan unau MADC te rawtna angin Addl. DPC, Dy. DPC te pawh kan pe a, anmahni hian elementary chang rawh se, te an ti a, an tih angin kan tih tir zel a ni. Helaiah hian kan ti tha ve viauin kan inhria tih kha Pu Speaker, ka sawi tel hram duh a ni. Kha kha chu ka kal san tawh ang a.

A dawt lehah chuan, Samagra hnuaiah hian hostel 13 changlung tak kan kalpui a, naupang 800 chuang hetah hian kan enkawl a ni. Tin, Samagra scheme hnuai atang pawh Mizo hnamzia culture an hriat theihna tur, Mizo hnam lama an tui theihna turin festival te pawh kan neihpui a. Tin, science leh mathematics subject-ah naupangte an tui theih nan exposure tour leh science exhibition te pawh kan siam a ni.

Nichinah West Tuipui bialtuin ‘keini hi kan tel ve thei ang em,’ a tih laia pakhat han belh leh ka duh chu, kum thar lo awm tur 2021-22-ah hian High School 2, Higher Secondary school 3 (Arts) leh Higher Secondary school 4 (Commerce), a vaiin school 9 hi Samagra hnuaiah hian kan din thar dawn a, chung kan din turte chu nichina ka sawi ang khan kan bialtu MLA tam takte khan in bialah dah ve duh in neih in rawn sawi kha kan lo chhinchhiah a. Amaherawhchu Mizoram hi a thlangtu kan ni lova in duhna in rawn thlen te kha Pre-PAB-ah kan han thu khawm a, Delhi-ah kan keng thla a, chuta tang chuan ‘U-DISE’ report kan ti a, school tin chanchin an hriatna U-DISE report atangin, ‘helai hmunah hian Higher Secondary School din a tul a ni, hetah hian High School pek a ngai a ni,’ an lo tiha min lo pawmpui a ngai a, chulai chu chu anih thin avangin kan duh a, keini pawhin duhsak taka kan thawn thlak sak che u pawh kha Delhi-in a hmunah, ‘feeder tur naupang an tlem lutuk a ni, a area hi thil dang a awm a ni’ an lo tih hi chuan min lo ti tawp sak ve thin a ni tih kha ka sawi tel duh bawk a ni.

Tin, a dawt leha ka sawi tel duh chu, department lian tak mai kan nih avangin Council of Ministers meeting-ah pawh kan Chief Minister pawhin mi kam keu a nei tawh a, School Education Department hi restructure tul kan tih avangin tunah hian restructuring kan kalpui mek a. Thawktu sing hniih chuang enkawlku-ah Director leh Joint Director pahnih

enkawl-in kan kal a, a ngaihna awm tawhlo khawpin tunah chuan kan restructure loh chuan harsatna kan nei mek a ni tih kha ka sawi tel duh bawk a ni. Tin, School infrastructure development kha kawng chi hrang hrangin kan kalpui mek a, Article 275 hnuai atang te, NABARD hnuai atang te, tin, Samagra huang atang te leh SEDP atangin hmachhawp tam tak kan nei a, kan hotu tam tak ten in biala school sak ngai in sawi te, repair angai in tih te pawh kha kan theih ang angin kan lo note a, kan fund neih dan atanga a remchan dan angin kan rawn enzui dawn a ni.

Tin, *quality education* a awm theihna turin theih tawpin hma kan la a, NEP, 2020 pawhin a rawn rawt leh a ngaih pawimawh ang tak hian hun remchang hmasa berah School Accreditation Council, college lamah NAAC kan tih ang chi deuh a school grading petu tur ang chi deuh hi siama, school inelna ang chi deuh te hi siam a thain kan hria a, chutiang tur pawh chuan ruahmanna kan kalpui mek a. Kan zirlaibu te pawh hi All India Standard-a kal theihna turin kan syllabus te pawh academic authority, elementary SCERT leh secondary MBSE te hian theih tawkin an upgrade zel a, theih ang angin an buaipui mek a ni tih kha ka sawi duh bawk a ni.

Tin, chu lo leha ka sawi tel leh duh chu, covid-19 harsatna lian tak kan tawh lai khan School Education Department hi theih ang tawkin a thawk tute an luang chhuak a, kan zirtirtu zawng zawng kawng hrang hrang directorate leh secretariat staff te luang khawm khan cheng nuai 200 chuang Chief Minister Relief Fund an mahni sum leh pai atangin an rawn thawh khawm a. Tin, chu bakah chuan ambulance pawh 7, ICU khum, generator etc. thil tam tak School Education Department thawk tuten he sawrkarah hian covid dona-ah kan sawrkar thawhpui turin an rawn pe lut hum hum a. Heng kawngah hian Mizoram Teachers Federation te an thawk hlawk hle a, a lawmawm hle a ni tih kha ka sawi duh a ni.

Tin, member tam tak ten an sawi NEP, 2020 chungchang kha ka sawi dan kha a dik deuh tho a, amaherawhchu kan lam dik zui ngai dawn ta chu, tun hma zawng khan 2019 vela kan ruahman khan ‘New Education Policy’ tih kha a ni a, Delhi-a cabinet-in a pawm tawh hnu khan NEP kha ‘New’ ni tawh lovin, ‘National Education Policy’ tiin a kal tawh a ni. ‘New’ ni tawh loin, ‘National’ tih tawh tur a ni tih kha ka sawi tel duh hrim hrim a. National Education Policy chungchangah zawhna pawh kha kan dawng a vawiinah khan, kan inhriat siak deuh a, board exam te awm dawn tawh lo ang tein kan sawi a, kan NEP-ah hian *board exam* awmloh tur reng reng kha a awm lo. Board exam kha chu a pangaiin kan la kal chhunzawma rih dawn tih te kha han hria ila. Tin, School composite deuha awm dan tur ang chi te leh thil tam tak ruahmanna chu a awm a. Heng zawng zawngah hian kan theih ang tawkin NEP hi a zirtu committee, Expert Committee te, tin, chumi bakah chuan a working group hrang hrang te kan din a, chung chuanin kan state-a kan hman atana tha tur, kan education-in hma a sawn theihna tur, national level, international level-a kan ram education a kal theihna tur atana kan hman turte han zirin kan lalut dawn mek a, compulsory-a engkim hi tih ngei ngei tur tih a ni lova, policy a ni a, ‘Act’ a nilo a ni tih hi kan thinlungah awm se a tha hlein ka hria a ni.

A dawt lehah chuan, School upgradation chungchang kha kan sawi nual a, School upgradation hi Private School-te lump sum-a dah, lumpsum-a awmte adhoc-a dah, dhoc-a awm te government-a dah duhin hmun tam tak atangin lehkhya te pawh kan dawng a, kan hotute pawhin an ngaipawimawh viau a ni. Amaherawhchu, kan hriat tlan angin, khawvelin harsatna kan nei a, kan economy hi harsatna a tawh avangin tun dinhmun maiah hi chuanin school upgradation zawnga sum tam zawk han seng tur hian ke kan la pen hlei thei lo a ni tih hi kan MLA te pawhin minlo hriatpui se ka duh a. Sawrkar hian lei rem zawk te pawh a rah hunah chuan he lam pawh hi kan kalpui theih hun a awm ka ring a. Samagra Shiksha hnuaiia thawktu tam takte pawhin dinhmun tha zawk an beisei te pawh sawrkarin a hria a, amaherawhchu, tunah hian duh angin kan kal hleithei bik lo a ni tih hi min hriatpui kan duh a ni.

Tin, hei SCERT directorate bik pawh hi han sawi thuak thuak ka duh chu, kan building, DIET building pariat district hrang hranga awm hi tih changtlun chhoh mek a ni a, Samagra atangin building lian tak takte sak chhoh mek a ni a. Tin hei, Smart City Project-ah DIET Aizawl Campus-ah staff quarter tur leh faculty quarter sak turin kan ruahman a, Smart City Project-ah Chief Minister-in min tuipui a, krismas leh kumthar inkar, nikumah khan chawlh hun lai takin kan CM hian min veipui avangin a hmun kan han tlawh a, ruahmanna thui tak kan kalpui a, kan lawm em em a ni. Tin, NISTA programme hnuaiia training te NASA takin kan kalpui a, zirtirtu leh headmaster 2,576 training kan pe tawh a ni. Tin, Covid 19 hri len chhung hian zirtirtu leh zirlai te, an rilru tihharnha tur leh ngaihtuahna dik an hman theihna turin Online Poster Making Competition te kan siam a, chi hrang hrangin lawman te pawh kan pe a, chu chu kan kalpui a ni tih kha ka han sawi duh a ni.

Pu Speaker, ka zo tep tawh a. Mizoram Board of School Education hi kan school education hnuaiia pawimawh tak mai a ni a. Kan hriat tlan angin High School leh Higher Secondary School-ah te Academic Authority an nih angin zirlaibu han siam te leh thil tam tak, Board exam conduct te an kuta awm a ni a, an ni hian hma nasa takin an la a. Chung zingah chuan tunkum kan exam tur HSLC leh HSSLC-ah hian syllabus hi 30% a tihtlem a ni a, class kal a tlem si a 50%-a tihtlem pawh awm in ti maithei a, All India standard nakin lawkah NEET te, JEE te exam a awm dawn avangin CBSE kalphung anga kan kal ve a ngai a, 30% All India-ah cut anih avangin kan cut ve tih kha House information-ah ka han sawi tel duh a. Tin, Reduce Syllabus zulzui hian High School, Higher Secondary School leh DIET te tan ‘Scheme of Examination and Question Designs’ hi subject hrang hrangah kan siam a. Tin, week-wise plan te, Suggestive Activities plan te kar 16 chhung tun lockdown chhung pawh khan kan siam a ni. Tin, Board exam an hmachhawnna turah hian an lo hmeliariat thiam theihna tur leh inbuatsaihna an neih thiam theihna turin *sample question paper* hi High School leh Higher Secondary School te kha an siam sak bawk a ni.

Board exam tur hi, information atanah han pek tel hrim hrim ka duh chu February atanga March thla hi exam thin dan a ni a, mahse kuminah hian exam hun han sawn tlai a, HSLC hi April Ni 1 atanga 15 an exam ang a, candidate 18,738 kan nei a, June first week-

ah result tihchhuah tum a ni. HSSLC te hi hi April Ni 6 atanga 30, 2021-ah an exam ang a. Kuminah hian candidate 11,849 kan nei a, result hi June second week emaw, third week-ah emaw tihchhuah tumin ruahman na siam a ni.

House-ah ka sawi kher duhna chhan pawh kum dang ang anih loh avangin, chhungkua an inbuatsaih thiamna tur atanah hei hi ka han sawi lang bawk a ni. Tin, education-ah hian HRD, board kan la nei leh a, chu chu tawitein ka sawi leh ang a. Pu Speaker, HRD Board kan Chief Minister-in min siamsak hi kan hmang tangkai khawp mai a, SEDP hnuiai kan board hi kan chhawr hle a ni. Kawng hrang hranga education hma sawnna tur atan hian kan thawkho tha a, a bik takin Mizo tawng humhalh, tihhmasawn theihna tur kawng atan tea MBSE mawhpurna subject pakhat a ni a. Chutah chuan nasa takin board kaltlang hian lak a ni. Mizo Language Development Board din turin leh chu chu Session leh thlasik thutkhawmah hian emaw bill putluh theih turin ruahman kan tum a, tunah chuan draft bill pawh kan peih a, tun sessionah hian kan han thehlut hman ta lo zawk a ni. Education Infrusture tha zawk kan neih theihna turin DPR tam tak an siam a, staff quarter leh school sak thatna tur atan pawh hma nasa takin kan la mek a ni. Tin House information-ah vawiin khan engemaw zat kan memberte khan ‘hna nasa tak kum hnii chhungan kan la’ kan ti a, chung kan lakte chu a thenin sangkhat, sangkhat zanga, sanghnih te kan ti a. Pu Speaker, a tlangpuia ka han sawi duh lawk chu, CEO gazetted post hi pali 2019-20 chhung hian kan fill up a, MPSC kaltlangin regular zirtirtu 153 kan la a, MR Teacher 823 kan la a, Hindi Teacher (CSS) 541, SEDP Teacher High School bik tan 157, Samagra, Primary atanga Higher Secondary School atan 176 kan la bawk a, advertisement awm mek Samagra Higher Secondary School Lecturer kar leh a interview tute kan la nei bawk a. Tin IV-Grade 54 kan la bawk a, tun kumhnih kal chhung hian Covid harsatna hnuaih kan Cheif Minister hian education min ngaihpawimawh pui em avang hian hna, hna nghet ni chiahlo mahse eizawna an neih vena tur atan (**Pu ZODINTLUANGA RALTE:A sawi lai khan, SEDP atanga 152 kha engang nge recruitment in lak dan kha min hrilh fiah thei em aw, Pu Speaker?**)

Kan hna lak hi a vain 1908 a ni tih kha kan sawi duh a. Nichina kan sawi lai khan CLP Group Leader kha a awmloh lai em ni aw? Stop gap arrangement-in High School zirtirtu 157 lak phalna kan nei a. Amaherawhchu, tunah hna lak theihloh anih rih avangin a khaw mite tun bikah thla 10 chhung atan hnathawk turin, zirlai naupangte zirtir turin kan la tih kha, a khuate, tunah hian an khaw chhungah khatiang zirtir ni thei tur kha lo la turin kan ti a ni. Tin, kan hna lak hrim hrim hi ka sawi duh chu (**Pu ZODINTLUANGA RALTE:Pu Speaker, a la chianglo, lawk, 'lo la turin kan ti' atih kha tute nge an tih le?**) Aw, School Management Committee-ah kan ti a, a then chu bialtu MLA-ah te pawh, kan zawmpui hnaivai bialtu MLA te pawh kan hrilh bawk tih kha *frank* deuhin ka han sawi ang e. Pu Speaker, kan hna lak reng reng hi member thenkhatte pawh khan in han sawi a, political platform a ni a, min han tai deuh kher hi in han tum thin a, a then hian. Education Department-a kan hnacak hi vawiin thleng hian, a khawi pawh hi langtlang theiin kan la ti a ni tih hi ka sawi duh a, a theih chin chin hi kan ti tha ang kan ti a, MR Teacher kan lak emaw

Hindi Teacher kan lak emaw IV-Grade kan lak ani emaw, heng kan tih zawng zawngah hianin RTI hmanga en duh tan pawha en theih turin, he sawrkar hi a langtlang a ni, fair takin, tha takin kan la a ni tih hi ka sawi nawn duh a. Hei hi keini pawhin kan sawi uar em em a ni tih ka sawi leh duh a ni.

Pu Speaker, a tawpna tak tak lamah chuan, kan information hrim hrim atan, Education Department-in school kan enkawl zawng zawng hi, sawrkar school, private leh kohhran School zawng zawngte tiamin school 4,414 a awm a, zirlai 3,08,381, zirtirtu (sorkar leh private-ah) 24,532 an awm a. Teachers:pupil ratio (TPR) kan tih kha tunah hian 1:13 a ni tih nichina zighthna a awm avangin ka sawi tel duh a. Government School enrollment hi kuminah hian a pung chho viau a, tunah hian Government School-ah hian mi 1,28,993 an in enroll mek a, Private School leh Kohhran School (Zoram thingtlangah leh hmun tina Kohhran School) ah 1,53,055 awmin private-in an enkawl a. ADC ah eng emaw zat (2,000 chuang) an kal bawk a, Central Government School-ah 500, 600 vel an kal bawk a, chu chu kan school dinhmun a ni. (...*interruption...*)

**PU C. NGUNLIANCHUNGA:** Pu Speaker, a zo dawn a, ka zighthna kha min chhang tlat lo mai a, khawngaih takin nichina ka zagh Tejpal Singh, Under Secretary to the Govt. of India atanga zighthna chhanna kan sawi, autonomous district-a Samagra chungchang, hei hi subject-ah ‘implementation of Samagra Sikhsa in area covered by Autonomous District Council of Mizoram’ tih lehkha vawihnih lai a rawn pekna kha an chhanna kha a awm anih chuan khawngaihin, an chhang ta em, an chhang anih chuan an chhanna copy kha min pe ve thei em tih kha min chhang lova, khawngaihin.

**PU LALCHHANDAMA RALTE, MINISTER:** Pu Speaker, helaia member dangte pawhin react tur an tih te pawh kha han react chakawm viau mahse kan react kim thei ta lova min hriathiam ka beisei.

Pu Speaker, a tawpna atanah ka sawi duh chu, education hi kan ram thanna tur atanah a hnukpui anih angin, i dinglama awm leh i veilama awmte hi pheikhai ruala kan ram education siamthatna kawngah te hlawk taka kan thawh ho zel theihna turin tanrual puiah he House kaltlang hian ka sawm a ni. Pu Speaker, heng ka demand te –

Demand No.	Purpose	Amount (in ₹)
18	Printing & Stationery	14,72,06,000.00
20	School Education	15,30,33,70,000.00
28	Labour, Employment, Skill Development & Entrepreneurship	31,43,56,000.00
<b>TOTAL</b>		<b>15,76,40,32,000.00</b>

House zahawm takin min pass sak turin ka ngen e.

**SPEAKER** : Aw le, tunah chuan Minister zahawm tak Pu Lalchhandama Ralte, a department chan, demand-te House-ah pass a rawn dil ta a, remti apiangin, ‘remti’ ti rawh u le. Remti lo kan awm em? Kan awm chuan ‘remti lo’ ti ula. (*An awmlo*). Pu Lalchhandama Ralte, Minister zahawm tak Demand:

Demand No.	Purpose	Amount (in ₹)
18	Printing & Stationery	14,72,06,000.00
20	School Education	15,30,33,70,000.00
28	Labour, Employment, Skill Development & Entrepreneurship	31,43,56,000.00
<b>TOTAL</b>		<b>15,76,40,32,000.00</b>

House-in lungrial takin a pass ta a ni.

**PU LALCHHANDAMA RALTE, MINISTER:** Pu Speaker, ka lawm e.

**SPEAKER** : Aw le, tunah chuan Pu Tawnlulia, Dy. Chief Minister zahawm takin a department chan a rawn sawite kha rawn wind-up se la, sawifiah ngai a tihte pawh rawn sawifiah se la, tunah ka sawm e.

**PU TAWNLUIA, DEPUTY CHIEF MINISTER :** Pu Speaker, ka lawm e. A hmasa berin DP & AR hi a sawitu tlemte an ni a, sawifiah ngai te ka sawi hmasa ang a. Mizoram Sub-ordinate Service Selection Board hian hna an thawklo tih rawn sawina kha a awm a, mahse Pu Speaker, hna an thawk teh meuh mai. Tunah hian MSSSB din tirh atanga tun tleng hian Promotion (Incumbent)-393, Regularization (Incumbent)-11, Absorbtion (Incumbent)-36, Confirmation (Incumbent)-99, Conversion (Incumbent)-20, Upgradation (Incumbent)-7 leh Limited Departmental Examination vawi 2 an ching fel tawh a. Tin, February 2021 tleng khan DPC vawi 83 an thu tawh a ni. Chuvangin, hna hi an thawk nasa khawp a, MPSC hna tur nasa takin an chhawk zangkhai a ni.

Tin, direct recruitment hi ti mai turin hmanrua kan la neih lohte lamkhawm a ngai a, chuvang chuan, MSSSB-ah hian direct recruitment rang taka conduct tum a ni a. Direct Recruitment buatsainha tur khawl mamawh, Optical Mark Recognition (OMR) machine leh a tul dangte installation tih mek a ni a, hun reilote chhung hian tihfel beisei a ni a. Tichuan, direct recruitment tih tur awm pawh an kengkawh ve thei tawh ang tih ka sawi duh a ni.

Tin, kan MPSC pawhin Covid-19 chhung hian engemaw chen chu hna a lo thawk ve zel a ni tih te pawh ka sawi duh a. MPSC hian tun 2020-2021 chhung hian appointment, examination-te pawh board 46-ah an nei a, vawi 13 exam an nei tawh a, interview hi hna 15 atan an nei tawh a. Chutiang chuan tunah hian theih tawpin tan an la ve a, Covid-19 karah pawh MPSC hian hna nasa takin a thawk ve tih House-ah hian ka sawi duh a ni.

Tin, kuminah hian written examination hrang hrang department 6 atangin neih a ni dawn a, chutiang chuan hmachhawp lai mek a awm a ni. Tin, MCS combine examination post ruak 28 atan a awm a, hei hi advertise tura hmalak mek a ni a, Kumin (2021) chhung hian MCS Combine Examination hi conduct tum mek a ni tih vawiinah hian ka sawi duh a.

Tin, Pu Speaker, tunah hian sawrkar hnathawk lai mek hi 44,500 an awm a, Regular 28654, Contract 317, Provisional Employee (PE) 993 an awm a, vacancy post hrang hrang hi 14,536-a awm tih House information-ah kan sawi duh bawk a ni. Tin, Member zahawm tak ten an han sawiah khan han sawifiah lawk tur pahnih, Pu Zodintluanga han hriat duh kha tawi tein ka han chhang ang a.

Pakhat naah chuan MPSC hna laksungchanga eng emaw harsatna a awm deuh tih kha kei ni sawrkar lam atang chuan kan hriatpui lo a, kan hriat theih angin MPSC hi Autonomous Body a ni a, sawrkar chuan exam dan tur leh guideline tul ang te kha chu a siam a, chumi zulzui chuan heng examination leh interview-te an conduct thin a. Harsatna leh engemaw thil diklo a awm anih pawhin keini chuan kan va hriatpui lova, kha kha thil kalphung a ni tih ka han sawifiah duh a ni.

Tin, computer certificate chungchang pawh kha kum 2014 hmalam a computer zirna institute te certificate pekchhuah kha chu pawm vek a ni a. Amaherawhchu, MCSTE kha a lo awm ta a, MCSTE ina institute a recognize-a exam a conduct hnuah chuan MCSTE certificate chauh pawm a ni ta a. A chhan chu ACTE exam pass lote khan institution dang atangin a lem te lo siam a awm ve theih avangin, chumi atan chuan heng hi siam a ni e tih a kha ka sawifiah ni sela. Tichuan, Pu Speaker DP & AR-ah hian ATI, (Administrative Training Institute) kan nei a, chutah chuan sawrkar hnathawk ten intuaihriamna an nei a, kum 2020 chhungah erawh kha chuan Covid avangin training an ti thei lova, vawi 4 erawh chu SoP....(*...interruption...*)

**PU ZODINTLUANGA RALTE:** Pu Speaker, ‘Computer certificate Mizoram ringawt’ tih laia kha, kan sawrkar hmasak pawh khan a him tawk lo a, a chhan chu zirlai pawn lam, Mizoram aia institution tha tak tak atanga lo kal an awm a, khang kha a lem han tihsak ngawt theih a ni chuang lo a, Delhi-a zirlai te pawhin exam an rawn attend ve duh a. Chuvang chuan, All India-a institution thate kha chu kan pawm mai kha chu a va tha em, kan thalai te ho tan hian.

**PU TAWNLUIA, DEPUTY CHIEF MINISTER :** Awle, kan lo chhinchiah dawn nia. DP & AR ah chuan duhtawk mai ila a tha ang e.

A dawt lehah chuan, department danga sawifiah ngaithe han sawifiah leh ila. PHE Deptt.-a han react ngai te kha han sawi lawk ila.

Member zahawmtak Pu Lalrinsanga Ralte-in a bial chhung North Chhimluang Solar Pumping leh Saipum Solar Pumping chungchang a han sawi kha tunah hian estimate siamfel vek a ni tawh a, Kolasib Division hnuiah. Tun Financial year, 2021-2022 chhunga thawk turin a pahnih hian ruahman a ni e tih ka han sawi duh a ni.

Tin, Pu Lalsawivunga, South I bialtu-in Aizawl khawpuia tui harsatna chungchang a rawn sawi kha a dik a. Pu Speaker, tunah hian Phase-I leh II a kan tui khawl ti kaltu pump nana power kan lakna ber transformer chu Chawlhhmun-ah khuan a chhia a. Chu chu P & E in a repair ni lovin a thar in an thlak mek a, chumi chhung chuan power kan hmuh tlem avangin tui kan pump tam thei lova. P&E Deptt.-in NASA Taka Tan an la chungin ni 10 zet chu kan mamawh dawn an ti a, mipui te hnenah pawh “min lo ngai thiam teh u” kan ti a, chu hriattirna leh ngenna pawh chu TV ah leh Chanchinbu-ah te pawh kan chhuah tawh a ni.

Tin, Dihmunzawl-ah khuan dedicated power supply 132 kV Sub-station siam peihfel tawh a ni a, chu chu Phase-I & II bika hman turin direct-a power lo kal tur a ni a, tunah hian inspection nghah mek a ni a, chumi hnuah chuan *trial run* an nei ang a, chutia 132 kV substation kha a function chuan, hetianga hmun danga power a awmloh pawha tuar lovin Phase-I & II hian tui regular-in kan pump thei dawn a, chu chu kan inbuatsaihna a ni tih kha information-ah ka sawi ni sela.

Tin, Pu K. Pachhunga, MLA bial chhunga NH-54 kawng zauh avanga khaw 9-in tui lak chungchange harsatna an neih a sawi kha, NHIDCL hian a siamthat tur a ni a, 1<sup>st</sup> instalment cheng nuaih 743 hi PHE a enkawltu division-ah rawn dahluh tawh a ni a, thil tulte leiin tunah hian thawh zawm mek a ni. Tichuan, a pumpui siamthat nana mamawh zat chu ₹17.75 crore a ni a, hei hi NHIDCL-in approval, Ministry of Transport atanga a neih hunah a lo kal leh dawn a ni. He hi a buaithlak khawp mai a, kawng siam hian kan pipeline hi an tichhia a, agreement-a in siamrem pawh ni ila anmahni khan an tihdan phung pangngai an zawm a ngai a, keiniin chawp leh chilhin tui kan mamawh lai khan a hmanhmawh theih lova, chutiang chu saw laiah pawh sawn an tawng ve a, pawi kan ti viau a, mahse, theihpatawp kan chhuah a ni tih kha kan han sawi duh a ni.

Tin, Pu Ramthanmawia’n ama bial chungchang a han sawi pawh kha kan chhinchiah a, tunah hian theih tawp chhuahin a biala harsatna chungchang kha kan ngaihven a, kawng laiin pipeline an tihchhiat te pawh khawtlang nen tangralin Champhai-a kan EE hovin an bei ve tang tang a ni. Engpawhnise, tunah hian theihtawp chhuahin, nichina a han sawi a bial chhung ami pawh kha kan bawhzui zel a ni tih kha tawi tein ka han chhang a ni e.

Tin, Pu V.L.Zaithanzama’n Setlaklaichhuah Phase-III atana tui pump a thianglim tawk ang em a tih kha zawhna awm tak pawh a ni a. Kan thli hi Tuikual Lui-ah a luang lut a, tui pump-na bulah hian tui tihthianghlimna khawl bun a ni a, in tlakin a tithianghlim tura ngaih a ni e tih kha ka chhanna a ni a. Pu BD Chakma khan a bial chhungah tui connection pek tumna a awm em atih kha, tunah hian khaw tinah JJM Scheme hian tui pek tum a ni a,

a tah tawlin a lo kal dawn a, khawi khua mah kha kan hmah dawn lo e tih kha ka chhanna a ni. Longpuighat tui harsatna chungchangah chuan, kum 2021 -2022 chhunga thawh tura ruahman a ni a, *rainwater-based impounding dam system*-a tui pek tum a ni a, a estimate pawh ₹1,133 lakh a ni. Chutiang chuan Longpuighat-a tui pekna tur ruahman a ni e.

Tin, Pu H. Biakzaua, Lawnglai Greater Water Supply Scheme tan pawisa kumin atangin kan nei ve thei tawh ang em a tih kha, tunah hian a project hi buatsaih niin NLCPR-ah pawisa dil mek a ni tih kha kan chhanna ni se la. Tin, Pu Zothantluanga'n Sairang tuilak chungchang a han sawi kha, tunah hian a existing scheme khu furah tuihawk hian a tinu thin a, chutah chuan buaina a awm a, a tui khu chu a thain a la tam viau a. A tui nu thin khu kan hria a, department pawhin atih dan ngaiantuahin ruahmanna a siam mek a ni.

Tin, Sairang Dinthar Veng ta tur bik kha kan sawi zui ve leh lawk ang a. Inrinni khan Local Council hotute an lokal a, tui tha tak an neih thu an rawn sawi a. A hmasa berin ka lo chhuahchhal deuh a, “In va rawn sawi har ve, kan duh ber chu tui tha, lak tlak hi tunah hian kan zawng char char a, a lak tlak tak tak em ni?” ka ti a, “lak tlak lutuk e” an ti a. Kan ngaihthlak tak ang khan theih tawp chhuahin anmahni thahruuin lak thlen an lo tum a, chu chu an rawn report a. An ni pawh khan, ‘engtin nge min puih ve theih ang, kan tha a tlem deuh si a, min pui ve rawh u’ an rawn ti a. ‘Ngawi rawh u, a tui chu a tha tak tak anih chuan km 10 emaw 20 a mi pawh ni se gravitation-a kan pawh thlen theih dawn phawt chuan hma kan la ang’ ka ti a. Ka pu a tha lutuk an ti a, ka phur ta a. Kan CE ka ko va, tichuan kan sawi tlang a, tha kan ti a. CE pawh khan tunkar chho-ah a hmuna verify-a, a tul anga sak zui a tum a. Pu Speaker, tunah hian Mizoram-a khuaa tui in tur kan harsatna ber chu a hnar gravitation-a lak tham a awm tawh lo a, chuvang chuan tui pump-te a lo ngai a, solar pumping hi a tlawm deuh e kan ti a, chutiang chuan kan kaltlang pui a ni. Chuvangin helaia gravitation-a lak tur a awm hi kan thlahlel khawp mai tih kha ka chhanna a ni.

Tin, Pu Andrew H. Thangliana'n Bukpui Water Supply Scheme Phase-II a rawn sawi kha, Bukpui tuilakna tur hi JJM hnuiah proposal siam a ni tawh a, kum 2023 chhunga thawh zawh tur zingah a tel a, khawchhung hravaitute duhthlannain Existing Impounding Dam cheibawl thatna turin ruahmanna leh proposal siam a ni. Bukpui hravaitute ka hnenah an lo kal a, an ni hian department rawtna ai khan tuna Impounding Reservoir siam kha khawtlangin an duh thu an rawn sawi tlat mai a. EE ka phone a, “a hmunah en rawh u” ka ti a, an en a, hei hi an duhthlanna angin kan bawhzui dawn a ni tih kha ka chhanna ni se la.

Tin, Kolasib leh Kawnpui combined scheme Tlawng tui pump tura ruahmanna siam hi Ministry of Jalshakti-ah kan la bawhzui char char e. Hei hi chu banson lovin kan beisei zingah ala tel a ni. Tin, JJM Connection hnuia pek tawh tui la hniangnar lo chungchangah hi chuan India sawrkar hian Functional Household Tab Connection in tina tuipek hi, ‘a tui connection, hi priority pe ula, a tuia kha tunah augmentation ti thei lo mah ula secondary-ah dah teh u’ a rawn ti a, mahse kan pawm duh chiah bik lo a, a pahniha tih kawp, a

connection neih bawka a tui kha neih nghal bawk, chutiang tur chuan estimate kan siam a, chung chu a kalphung a ni e tih kha ka sawi ni sela.

Tin, Zero-Point tui harsatna chungchang pawh JJM hnuiah Solar Pumping Scheme ruahman mek a ni tih kha ka chhanna ni sela, hei hi Pu Rokhaw zawhna chhanna a ni e. Tuipang leh a chhehvel tana source thar chungchang pawh, Hrengva Lui hi lak tum a ni a, estimate amount chu nuai 62 a ni a, chu chu tunah hian a hma thei ang bera thawk turin buatsaih mek a ni e. Tin, Siaha augmentation atana sum la release loh kha PHE department-in tunah Finance-ah a dil leh mek a, reiloteah hei hi chu Finance pawhin an rawn tifel rang dawn e.

Tichuan, Reiek Pumping Scheme, bialtu Pu Lalrintluanga Sailo, MLA-in a rawn zawh kha, June thla-ah hian zawh theih kan inbeisei a, hei hi CS hian a interest a, a kutah ka dah tawp a, bialtu nen an vil dun niin ka hria a, ka lawm khawp mai.

Tichuan, Dr. Vanlaltanpuia khan Pangzawl composite scheme, Pangzawl-Rawpui-Thiltlang hi chak zawka hmalak theih dan a awm em a tih kha, hei hi 2020-2021 chhunga NABARD-a thun luh turin ruahmannza zingah a tel e tih kha ka han sawi a ni.

Pu Lalchhuanthanga'n, JJM hnuiah khaw engzatah nge hnathawh tawh tih kha, khaw 324 ah hmalak a ni a, Mizoram-ah chhungkua 1,26,827 a awm a, chhungkua 47,385 hnenah tunah hian tui pek a ni tawh e tih a ni.

Pu C. Ngunlianchunga'n, Mampui leh Diltlang South tui lak tur chungchang a sawi te pawh kha, 2021-2022 leh 2023 ah hian hmalak tel vek tur a ni e. Tin, Lawngtlaui tui khawp khamloh chungchang pawh kha ka sawi tawh a, estimate siam zawh tawh a ni a, funding kan zawng mek a ni. ka hriat dan chuan NLCPR-ah kan khung telin ka hria.

Tin, Pu Vanlalhlana'n, Durtlang tan Tuipawl hi khuaha pump theih ni se tih kha, kei pawh khi khi hman atanga ka hual a ni a, mahse tunah hian SIPMIU-ina kan thawh mek Phase-III kan tih mai hi Sihphir thlenga kan hman theih tura tih a nih avangin Tuipawl khuaha pump chhoh khi kan hawi rih lo a ni. Hei chu hman atangin kei pawhin ka hmeliat tawh, Durtlang bik tan chuan ti ila, hetah Bawngkawn pawh kan chawm ang ka ti a, mahse Tlawng tuiin khilam pang a thlen chhoh theih dawn chuan kha kha chu tunah chuan kan ti dawn lo ve tih kha kan chhanna ni sela. PHE bikah chuan duh tawk ila.

Pu Speaker, UD & PA lama kan hriat duhte pawh kha han sawi leh zung zung ila. Pu Lalrinsanga Ralte, Serlui bialtu MLA-in a bial bik Rengtekawn te, New Builum leh Gosen Hall sak chungchang te kha, vawiinah budget kan pass dawn a ni a, kan la enzui turah ka ngai a. Vairengte Dinhar supply godown inkar kawng tih pawh kha kan sum neih dan azirin kan en turah ka ngai a ni.

Tin, Pu VL Zaithanzama, Aizawl West III bialtu MLA-in Maubawk-in Hall kan nei lova a tih kha, Maubawk-ah hian State Priority Project Fund atangin cheng vaibelchhe 1.50 hmangin tunah hian sak mek a ni tih kha ka chhanna a ni e. (**Pu VL. ZAITHANZAMA : Pu Speaker, Khatla zawk mah mah a ni a, Maubawk Khatla Bungkawn tih kha ka han sawi a nih kha, Maubawk nilovin Khatla.**)

Mission Vengthlang Table Tennis Hall-cum-Basketball Court chungchang a bialtuin a han sawi kha, Table Tennis Board leh accessories te, basketball court carpet leh furniture te hi a project-ah khan a lo tel lova, estimate-ah a lo tel si lova, a hrampaa ngaihtuah a ngai a ni. Mission Vengthlang hotute pawhin Sports Department lamah dilna an siam mek e tih kha kan hriat zui dan a ni.

Tin, ‘Housing for All’ a state matching share dah chungchang hi Housing for All scheme Mizoram-a hman hi sawrkar hmasain bul a tan a, state matching share hi a tir atangin siam a ni lo hrim hrim tih kha ka chhanna ni sela a tha ang e.

Tin, Aizawl khawpui tan *Common Cemetery* siam nan hmalak a ni em tih kha, Aizawl khawpui tan common cemetery hmun 4-ah crore 40 man, concept note chu NLCPR atanga hmuh turin DoNER-ah December thla khan project hi thehluh a ni.

Tin, Pu Vanlalthlana, MLA, Aizawl North-II-ina Ramthar Veng Hall, ‘a tira chhawng ang zat kha tih theih a ni dawn lawm ni’ a tih kha, hei hi department lam pawhin uluk takin a en a, mithiamte pawhin an en a, building safety saw an ngaihtuah a, sum kan duhthusamin kan nei bawk lova kan zawng chawp bawk nen, a chhawng khat hi chu tel rihlo mai sela tih kha tunah hian sawrkar department ngaihdan a ni a. A veng neitute pawh an lo kal tawh a. Engpawh nise, chu chu kan dinhmun a ni a, inhrethiam tlang ila, tun kan dinhmuna kan tih theih chin hi kal tum ila kan ti a. Hei hi chu kan la sawitlang zel turah pawh kan ngai a ni a.

Tin, ‘SIPMIU hun tawp chu engtin nge an tih ang’ tih kha, SIPMIU project hi tun June thlaah hian a tawp dawn a, project hrang hrang thawh zawh tawhte hi chu concerned department-ah a kal mai ang a. Amaherawchu SIPMIU hi Covid avangin kumin June thlaah hian kan hna kan zo hman dawn lova. Tichuan, a hma khan a lo tawp tawh a, mahse kan CM-in a bawhzui a, ADB fund kha a ni a, kan CM hmalakna-in Urban Ministry-in kum 2 min extend sak a, crore 150-in hei hi zawh theih tur a ni ang kan ti a, chutiang chuan min extend a. Covid avangin tunah hian kan la kal chak tak tak thei lova, 80% vel hna hi chu thawh tawhah kan ngai a, chu chu kan din hmun a ni a. Tunah hian extend leh turin CM signature ngeiin dil leh tha kan ti a, Session zawh atang hi chuan extend tura dil leh kan tum mek e tih kha kan chhanna a ni.

AMC bawlhhlawh sawngbawlna chungchang harsatna engtiangin nge kalpui tum anih tih kha, AMC sawrkar thar kha March Ni 1, 2021-a lakluh a ni a, a tukah kan Mayor

leh a thawhpuite'n uluk takin an zuk tlawh a, hmalak dan tur pawh an ruahman mek a ni. SIPMIU nen tangkawpin bawlhhlawh tling khawm pawh chak zawka sawngbawl theih dan an ngaihtuah dawn a ni. Hei hi SIPMIU-in a enkawl a, tunah hian AMC-in a enkawl dawn a, eng emaw technical knowledge leh tih dan tur phung zir te a ngai ve a, a pumpuiin tunah hna an tan ve mawlh mawlh e tih kha ka han sawi a ni e.

Tin, Chanmari - Kulikawn proposed elevated road endik a ni tawh em tih hi, UD & PA hnuiah chuan elevated road project kalpu tumna a awm lova. Amaherawhchu fly-over Vaivakawn leh Bawngkawn ami tur erawh chu kan CM ruahmanna anih angin PWD kutah hlan a ni a, bawh zui kal lai mek a ni tih kha ka chhanna a ni.

Pu KT Rokhaw zaghna, Palak playground chungchang te, Phura leh Chapi playground chungchang a rawn sawi te kha, heng hi UD & PA department hi chuan notified town-ah chauh hma kan la thei a, chutianga notified town an nih loh avangin UD & PA atanga hmalakna hi chu an hmang ve thei lo tih kha kan chhanna ni sela.

Pu Lawmawma Tochhawng, MLA-in Lunglei chungchang a rawn sawi, footpath siam bill leh PAHOSS release hma tura tih kha, footpath siamna tur fund hi tunah Finance K-Deposit ah hian a awm mek a, chu chu theih tawpin Finance lamah pawh an rawn release theihna turin kan sawiin kan thlen ve mek a. Tin, PAHOSS, Lunglei District bik atan cheng vaibelchhe 4 dah a ni a, Kolasib leh Champhai tan cheng vaibelchhe 2 leh a chanve ve ve dah a ni a, chutiang chuan hmalak mek a ni. Lunglei-ah chuan Committee pawh siam a nih tawh in ka hria a, tin, Lunglei atan phei chuan *recommended list* pawh a lo thleng tawhin ka hria. Chutiang chuan Finance-in sum min rawn pek ve leh kha kha chu sak theih a ni ang. ‘Lunglei Master Plan’ tih pawh hi a siamna atan hian state fund atangin pawisa dah a niin bul kan tan dawn e. Tin, Lunglei Eastern ‘by-pass road’ pawh hi sum awm dan a zirin kan en ang.

Tin, Solid Waste Managemen, Centre, Lunglei chungchang hi, Lunglei tana bawlhhlawh sawngbawlna hmun tur Scientific Solid Waste Management Centre atana DPR hi NEC, DoNER Ministry-ah thehluh a niin, approved tawh a ni a. Preparatory Fund cheng nuai 10 pawh dawn a ni tawh a, document ngaite Planning Department, Govt. of Mizoram-ah thehluh niin approved vek tawh a ni. First installment hi Ministry lam atanga release hun kan ngaichang mek a ni a, kan kal thui tawh khawp e tih kha kan chhanna a ni e.

Awle, Dr. Vanlaltanpuia zaghna, ‘Serkawn bazaar-shed sak that a ngai takzet a, hma min laksak thei em’ tih kha, hei hi department-in a hre tawh a, a hmunah te pawh a enfiah tawh a, tuna kan dinhmun ena hmalak theih mai turin chhinchhiah zingah a tel e tih a ni.

Tin, Pu Laldenga hriatrengnan Pukpui khuaah infrastructure tha tak siam ni se tih kha, kan dinhmun a zirin tih ni se, hei hi chuan beng a verh khawp mai, Pu Speaker. UD & PA hnuai Lawngtlai khawpui-ah fund lut engzah nge tih Pu C. Ngunlianchungan zaghna

kha, SEDP atangin hna 22, a man cheng nuai 167 leh sing 73,000 hi Lawnglai khawpuiah hian UD & PA atangin hna kan thawk ve tawh e tih kha ka chhanna a ni.

Awle, Pu Speaker, kha kha kan han react chin ni se. (*Pu C. NGUNLIANCHUNGA: Pu Speaker, khawngaih takin, a react lai khan, PHE bikah khan Mampui leh Diltlang chauh min react sak a, Thingkah leh Bungtlang ‘S’ kha min hriat tel sak se a va tha ve. Thingkah pawh kha Lawnglai town chhunga awm tho mahse tuna scheme-ina ava cover phak loh deuh kha a ni a.*) A scheme-ah khan Thingkah pawh kha a tel thei e.

Awle, Pu Speaker, PHE department hi ka sawi zui ang a, hun te a rei deuhhlek tawh a, sawi thiam pawh a har viau a. Amaherawhchu, a tawi tak tak thei lo tih kha chu kan pawm tlang thei turah ka ngai a ni.

Tunah hetianga kan hmalam atana theihtawp chhuaha hma kan laknaah hian, PHE-ah pawh hian theihtawp chhuahin tan kan la ve zel a ni a. Tunah hian JJM leh solar pumping te hi kan tui lak dan kalphung tlangpui a ni mai a. A chipchiar in sawi dawn ila, hunin a dailh dawn lova. JJM hian khaw tin hi a cover dawn a ni.

JJM Scheme hian kum 2024 thleng a awh dawn a, mahse keini chuan theihpatawp kan chhuahna azarah central-in ‘nangni chu 2023-ah zawk tum rawh u’ min ti a, tunah hian kan tang tang tang a, pawisa pawh JJM Scheme atan Finance changtu kan Chief Minister pawhin mi a hriatthiampui a, state matching share hi tihian a rawn match char char zel a, kan lawm em em a ni. March thla tawp lamah phei hi chuan incentive crore 35 hi ‘ziak ngeiin kan pe ang che u’ an ti a, an rawn zawm loh chuan thu hran ni se. Pu Speaker, kan officer te, kan department te hnathawh that azarah central lam pawhin min recognized ve a ni tih kha ka sawilang duh pahfawm a. Kha kha chu kan sawi tawh angin a chhanna pawh khati zat kha a ni a, sawi nawn tehchiam pawh ngaiin ka hre lova.

Tin, tunah hian JJM bakah chuan nichina kan sawi tak leh zawkna-ah te pawh awm tawh, solar pumping-ah khan khaw 20 chuangah hma kan la mek a, a khua zawng zawng sawi sen a ni lova. Chubakah chuan Reiek te, Biate te, tin, Alternative gravity water supply scheme, Tawi tlang atanga tui pawh thlak kan tih te, tin, Champhai-ah Keilungliah Tuikhua te hmalak mek a ni tih kha tawitein ka sawilang duh a.

Tin, chubakah kan information atan, tunah hian khawpuiah hian kan chhinchhiah dan chuan tui connection nuai 14,050 vel zet pek tawh a ni a, tin, thingtlang khuaah 24,775 vel hi tui connection pek tawh a ni bawk a. Tichuan, kumin 2020-2021 February thla tawp thlenga tui bill kan lakkhawm hi nuai 4,381.77 a tling ve tawh a ni. Chutiang chuan PHE pawhin revenue chu tlem chuan alo collect ve thin tih kha sawi ni se.

Tin, NABARD hnuiah hian eng emaw zat kan thawk a, chungte chu a kal mek bawk a. Tin, chubakah chuan kan tui lak hi solar pumping, nichina kan sawi ang khan a ni deuh

zel tawh a, electric khawla pump ai chuan a hautak lo zawk a, a maintenance a awlsam a, tunah hian pumping a ngaih phawt chuan solar pumping hian kan kal char char mai a ni. Chu chu kan kalphung a tlangpui ka sawi theih ni sela. Tin, chuloah chuan, Swatchh Bharat Mission (Rural) hi PHE-ah hian kan thawk a, chu chu thinglang khaw tihthianghlim hna a ni. Hetah hian theihpatawp chhuahin *solid waste management* leh *plastic waste management* hmanga khaw tin tihfaina hna pawh hi kan thawk ve a ni. Tin, chulo lehah chuanin PHE atang hian kan ngaihpawimawh em em chu, tui thianghlim ...(...*interruption...*)

**PU K.T. ROKHAW** : Pu Speaker, khawngaihin kan Minister din lain, Saikao Solar Water Pump min siamsak tura ka tih kha khawngaihin min chhang thei em aw? Saikao kha kan missionary te thuthmun a ni a, khawngaiha solar water pumping min siamsak thei chuan, gravity-a tih tur chuan a hmun kha a sang lutuk a, tui lak tur a awm si lova, solar pumping min tih sak thei ang em?

**PU TAWNLUIA, DY. CHIEF MINISTER:** Serkawr kha, ni e, kan lo chhinchhiah dawn nia. Khawtin huapa hmalak tur a ni a, a hun kha chu engpawh nise kan lo chhinchhiah dawn nia. Tin, PHE atang hian khaw tin tan hma kan la mek a, khawpui deuh tan pawh pumping kan ti mek a, kan kal tha ve viau chuan kan hria a, hma pawh kan sawn a, kan lawm hle a ni.

Tui chungchang sawi takah chuan, tunhnai maia Luangmual a electric khawl chhiat avanga Aizawla kan harsatna kha kan hria a. Chawlhei zanah khan Champhaiah harsatna lian deuh, kan khawl hman lai a chhe rup mai a, a stand-by kha alo hman theih tawh bawk si lova, tui nei lovin kan awm a. Niminah khan bialtu Minister leh MLA te kha an mangang a, kan sawiho a. CM hnenah ka han thlen phawt ang e ka ti a. CM chuan, ‘khawl thar in mamawh anih chu, chah nghal mai rawh u’ a ti a, tukin khan kan chah nghal a. Nichina information ka dawnah chuan, tunah hian Kolkata atangin khawl thar chu a lo chhuak thei dawn a, CM chungah kan lawm hle a. Tui hi a loa kan awm theih loh, hautak em em si a ni a. Chuti karah chuan kan CM-in min hriathiam pui a, kan lawm khawp mai tih kha ka sawi duh a ni.

Tin, Pu Speaker, UD & PA-ah ka kal tawh mai ang e, zawnha-ah te thil tamtak kan sawi tawh a, thildang kha han sawifiah vak pawh ngaih ka hre lo a. UD&PA ah hian Parking House Support Scheme, ‘PAHOSS’ kan tih hi a lar khawp mai a, a lawmawm pawh ka ti a. Heihi kan CM-ina ama ngaihtuah chhuah liau liau a ni a, kei phei chu damloin Delhi damdawiin-ah ka awm daih a. Hei hi 2019 February thla khan ama hoa bul tan niin, vawiin thleng hian min la monitor-pui a ni a. Tunah hian sawrkarin cheng nuai 7,002.00 (cheng nuaih sang sarih leh pahnih) PAHOSS atan min pe tawh a. Tichuan, eng emaw zat hman a ni tawh a, kan ngaihthlak tak ang khan vawiinah hian cheng nuai 4,137 kha la hman lohin a awm a, nuai 10 vel hi hman tawh a ni a. Tunah hian diltu mi 1,436 an awm a, chung zinga mi 403 chu verified vek tawh an ni a, chutah chuan LMV hi 4,764, two-wheeler 8,994 park theih tura ngaih a ni a. Amaherawhchu kan hriat angin kumin Covid-19 chho-ah khan

hnathawktute pawhin hna an thawk zung zung thei lo a, chutih karah payment kha kan duh angin sum chungchangah a kal thei bik lo a. Sawihonaah khan ‘budget-ah pawh reflect a nilo, kumin chu engmah in dah lo’ min ti a, kan Chief Minister zahawm tak khan a sawifiah tawh a, tuna la hman loh pawh hi a tam ren rawn viau a, amaherawh chu, hman loh tih lemah khan hmu tur thlan fel tawh a ni a, chumi pek chhung chuan mamawh belh a nih pawhin kan CM hian a tul chuan kan ngaihtuah mai ang a ti a, budget-ah pawh kan dah belh rih lo a ni. Chutiang chuan kan kal a ni tih kha PAHOSS chungchang ka han sawi ni sela.

Tin, SIPMIU kha ka sawi tawh a, hei pawh hi UD & PA hnuiaia enkawl chhoh mek a ni a, hengah hian nichina ka han sawi tak *dedicated power supply*, 132 kV power supply, Dihmunzawl-ah a bik liau liauin SIPMIU atang hian khawl thar kan bun fel tep tawh a, chumi chuan kan tui supply hi a ti phuisui hle dawn a ni tih kha ka han sawi ni sela.

Tin, nichina kan sawi tak Phase-III kan tih mai, Tanhril rama Setlak lui chhuah (Tlawng) dawta Laipuitlang-a tui pump chhoh hi km 15-a thui a ni a, km khat leh a chanve vel hi pipe la phum loh a ni. Pu Speaker, hetah hian Vaivakawn khawtlang hrugaituten pipe phum tur chungchangah venthawn an neih thu an rawn thlen a, department hotute nen power presentation te neiin an hrethiam dawn niin kan hria a, la sawiho zel tur a ni. Hei hi ‘37 MLD’ kan ti a, chu chu anih chuan Phase-I leh II ai hian Laipuitlang-ah khian tui a thleng tam ang a, Aizawl khawpuiah sem darh turin distribution line hi tun aia lian zawka siamin thawh mek a ni a, SIPMIU bawk hian Sihphir thlengin distribution line hi an phum chho tawh a ni. Aizawl khawpuiah pawh hmun tam takah an zawm tawh in thawh chhunzawm zel a ni.

Tin, Chite Lui-ah khuan bawlhhlawh sawngbawlna Sewerage Treatment Plant commission theih tawh a ni a, Session zawahhi chuanin muang marin kan la hawng thei turah ngai ta ila. Tin, SIPMIU atanga kan thawh pakhat chu, Aizawl chhuah lampangah hian veng engemaw zatah ek-in atanga ek leh tui chhia te septic tank-a lut lovin, sock pit-ah pawh lut lova direct-in Chite Lui-ah chhun thlak tur a ni a, veng eng emaw zatah hi chuan siam zawh tawh a ni a. Chu pawh chu tunah khuan a function thei tawh a, In sangthum vel tih turah a chanve connect tawh a. Tichuan sock pit leh septic tank te kha a ngai tawh dawn lo a ni. Sewerage Treatment Plant-ah lutin lei tha leh thil dangah siam chhuah a ni dawn a ni. Chutiang chuan hma kan la dawn a ni.

Tin, a dawt lehah chuan, Pu Speaker, UD & PA hnuiah hian AMC hi a awm a. Kan hriat angin AMC hi Autonomous body ni mahse sawrkar nen kan inpeizawn lo thei lova, state sawrkar hi *Pa* a ni a, AMC hi *Fapa* ang a ni; *Pafa* ang an ni e ka ti thin. Chutiang chuan an kal dun a ni. Hmanniah election kan nei a, mipuite duhsaknain MNF party kaihruaiin he sawrkar pawh hi a kal thei dawn a kan lawm hle a, chu chuan tha tharin Aizawl khawpuiah kawng hrang hrangin hma a la dawn a ni tih kha ka sawi duh a. Tichuan, tunah hian AMC thuneihna, a function chungchangah zawhna a tam mai a, Constitution leh keimahni Act-ah AMC hian subject 18 lai hi enkawl tur an nei a. ‘In la pekim lo’ tih te a awm a. AMC-ah

hian subject 15 hlan fel thlap a ni tawh a mahse Fire Service te, Water Supply te leh Road and Bridges heng pathumte erawh hi chu tunah hian an hnena pe mah ila thawh theihna tur technical hand (mithiam) an la nei lova. Chuvangin, AMC saw siam len zel loh chuan khang subject pathumte kha an kuta awm turin a la tih theihloh a ni. Services te, Road & Bridges te enkawl tur leh Water Supply, domestic leh industry-a hman tur te enkawl turin an kuta hlan ala theihloh a ni. Khang pawh kha zawi zawiin theihtawp chhuahin, sawrkar hian an hnena hlan thei turin hmalak a tum bawk a ni tih kha ka sawi tel duh a ni.

Tin, Pu Zodintluanga khan niminah leh vawiinah khan a sawi a, Chief Minister zahawm takin a sawi ‘US dollar 245 zet pawh kan hmu dawn e atih kha budget-ah hian in reflect lo’ a ti a. Ni e, Budget enhchian hi a ngai thin a, tunah khan han en ta ila, PHE Demand-ah khan, ‘Sustainable Urban Transport Project’ atan hian US dollar million 248 estimate siam a ni a, chumi hmahruai atan chuan project ready-made financing-ah 5 million dollar dawn beisei anih avangin tunah hian kan budget 2021-22-ah pawh cheng nuai 3,600 a bul tanna atan dah a ni tih kha ka sawi duh a ni.

Sustainable Urban Transport Project (SUTP) hi Mizoram Sawrkar chuan Department of Economic Affairs (DEA) kal tlangin Ministry of Finance, Govt. of India-in Asian Development Bank tanpuinaa thawh turin, Aizawl Sustainable Urban Transport Project U.S. dollar million 248 (India pawisa chuan crore 1,860) man tur project hi a theh lut a, he project hi Aizawl city leh a chheh vel Greater Aizawl City Development Area zawng zawnga transport system tichangtlunna atan a hmang ang a, Non-motorized transport te, sub-Urban connectivity improvement te, junction improvement te, parking management leh Aizawl transport system tichangtlunna tur hrang hrang bakah Rope-way, (North to South bik) kha chu nakinah a chin tur kha an la siam ang a, chung zawng zawng pawh chu a huam vek a, consultant tur pawh kan nei vek tawh a ni. Hei hi a kal thui tawh khawp mai a, vawiinah pawh video conference an ko a, kan Secretary pawh kha “Session-ah kan thu hman tawh lo” a ti a. Chutiang chuan hei hi kan beisei a. Mahse a project hi a len em avangin chutianga kal zung zung theih a ni lo a, a procedure kha a tam tlat mai a. Chuvang chuan, kan CM zahawm takin a sawi kha a takin a rawn zimar chho mek a ni tih kha ka han sawi duh a.

Tin, Pu Speaker, ka han sawi leh duh chu, ‘Cable Car’ tih hi a ni a. Aizawl khawpui chhunga traffic tawt lutuk tihziaawm nan *cable car system* ruahmannu turin central sawrkarah rawtna thlen a ni a. NITI Aiyog lamin a thuphung (in-principle) in an remti a, Consultant, Earnest & Yach-ten feasibility report an siam tawh a. He report hi ministry hrang hrang nena meeting koh a niin sum mamawh tur cheng vaibelchhe 1193, 10% GBS for North-East pawh khawm atanga ruahman turin pawm fel a ni tawh a ni.

Hei hi kan project lian deuh mai pakhat, Cable Car, Aizawl City East-West corridor ami tur a ni. Cable Car pakhat, SUTP ami kha Norh & South a ni ang a, tuna mi hi chu East-West, Zemabawk – Luangmual a ni a, chuta tang chuan MZU-Airport rope-way siam turin

ruahman a ni. Hei hi ngaih pawlh awl deuh mahse a hrang ve ve a ni. Hengte hi project lian annih avangin a kal zung zung thei lova, thui tak a kal tawh a, a puitling ngei turah kan ngai a ni. Vawiinah chu chu House information atan pawh ka sawi duh a ni. Sustainable Urban Transport kha chu tunah pawh hian thui tak a kal tawh a, consultant tur pawh tender chhuah tawh a ni. Tender chhuah tawhah paruk vel short list an ni a, pakhat kha thlan tur a ni. Chutiang chuan thil hi a kal thui ve tawh viau a ni. Theihtawp kan chhuah ang a, heng project lian pui pui pawh hi a lo la thleng turah ngai ila. Kan Chief Minister-in central-ah nasa takin hma a la a, an tawngkam mai ni loin, a takin hetiang hian department bawhzui theihin vawiin thleng hian hmasawnna kan la nei tih kha ka sawi duh pakhat chu a ni.

Tin, Poverty Alleviation lam te pawh hi programme zingah hian a awm a, kha kha chu vawiin hian sawi chipchiar pawh ngai tawhin ka hre lo a, Zawhna leh Chhanna lamahte pawh kan sawi tawh kha a ni a.

Tin, Pu Speaker, vawiin hian Aizawl Municipality inthlanna kan neih zawh takah khan mipuiin hnehna min pekna te tihiawtling turin kan AMC lam pawhin theihtawp an chhuah a ni tih kha ka sawi uar duh khawp mai. Hetah hian sawrkar nen theih tawp chhuahin kan tang tlang ang a, an ni pawh tluang takin an kal thei turah ka ngai a ni.

Tikhan, Pu Speaker, ka duhtawk mai ang a. Ka demand-te:

Demand No	Purpose	Amount (in ₹)
13	Personal & Administrative Reforms	4,91,84,000.00
25	Public Health Engineering	4,63,99,95,000.00
46	Urban Development & Poverty Alleviation	4,26,28,62,000.
<b>TOTAL</b>		<b>8,95,20,41,000.00</b>

House zahawm tak hian min pass sak turin ka rawn ngen e. Ka lawm e.

**SPEAKER** : Awle, tunah chuan Deputy Chief Minister zahawm tak Pu Tawnluia'n a department enkawlte hman tur:

Demand No	Purpose	Amount (in ₹)
13	Personal & Administrative Reforms	4,91,84,000.00
25	Public Health Engineering	4,63,99,95,000.00
46	Urban Development & Poverty Alleviation	4,26,28,62,000.
<b>TOTAL</b>		<b>8,95,20,41,000.00</b>

House-ah pass a rawn dil ta a, remti apiangin ‘remti’ ti rawh ule. Remti lo kan awm em? Kan awm chuan, ‘remti lo’ ti ula. (*An awmlo*) Awle, deputy Chief Minister zahawm tak Pu Tawnluia demand No.13, 25 leh 46 te chu House-in lungrial takin a pass ta a ni.

**PU TAWNLUIA, DEPUTY CHIEF MINISTER :** Pu Speaker, ka lawm e.

**SPEAKER** : Vawiina kan tih tur business chu kan zo leh ta a, kan chawl leh rih ang a, naktuk Ni 10.3.2021 (Nilaini) chawhma dar 10:30-ah kan thukhawm leh dawn nia.

*Sitting is adjourned (8:33 PM)*